

# ತಂಗಳಿರ ಕಥೆಗೂಡ್

(ಕಥಾ ಸಂಕಲನ)

ಬೆಂಜಾಂಡ ತಂಗಳಿ, ಕಾರ್ಯಪ್ಪ



ಕರ್ನಾಟಕ ಕೂಡವ ಸಾಹಿತ್ಯ ಅಕಾಡೆಮಿ, ಮುಡಿಕೇರಿ

BVP-1058-9/1/17  
(1) 1049-85/87.

ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ

ಮಡಿಕೇರಿ

ಪ್ರಕಟಣೆ ಸಮಿತಿ

---

ಮೇಕೇರಿರ ಕೆ. ಕಾರ್ಯಪ್ಪ, ಅಧ್ಯಕ್ಷ

ಕೊರವಂಡ ಡಿ. ಗಣಪತಿ, ರಿಜಿಸ್ಟ್ರಾರ್

ಅಜ್ಜಿನಿಕಂಡ ಸಿ. ಮಹೇಶ್ ನಾಚಯ್ಯ, ಸದಸ್ಯಂಗ

ದೇಯಂಡ ರುಕ್ಮಿಣಿ ಕುಶಾಲಪ್ಪ, ಸದಸ್ಯಂಗ

ಕಾಮೆಯಂಡ ಎ. ಮುತ್ತಣ್ಣ, ಸದಸ್ಯಂಗ

ನರವಂಡ ಎಂ. ಉಮೇಶ್, ಸದಸ್ಯಂಗ

# ತಂಗಳಿರ ಕಥೆಗಾಡ್

ಕಥಾ ಸಂಕಲನ

ಬೆಂಜಾಂಡ ತಂಗಳಿ ಕಾರ್ಯಪ್ಪ



ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ, ಮಡಿಕೇರಿ

"THANGACHIRA KATHEGOODU" is the bunch of small Poems  
written by **Benjanda Thangachi Cariappa** Published by the  
**Karnataka Kodava Sahithya Academy, Madikeri.**

ಕ್ರಯ ಉ. 8.50

ಹಕ್ಕು :- ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ, ಮಡಿಕೇರಿ

ಬೆಂಗಳೂರು :-

ರಿಜಿಸ್ಟ್ರಾರ್

ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ

ಸ್ಯಾಟ್ಸ್ ಐಂಡ್ ಗ್ಯಾಡ್ಸ್ ಕಟ್ಟಡ

ಮ್ಯಾನ್ಸ್ ಕಾಂಪೌಂಡ್ ಪಕ್ಕ

ಮಡಿಕೇರಿ : 571 201 ಫೋನ್ : 29074

ಅಚ್ಚು ಮಾಡ್ನವು :-

ಗುಡ್‌ಟಚ್ ಪ್ರಿಂಟರ್ಸ್

ಜಯಲಕ್ಷ್ಮಿಪುರಂ,

ಮೈಸೂರು.

ಫೋನ್ :- 512626, 517919

## ಮುಂಜೊಲ್ಲೆ

ಕೊಡಗ್ ನಾಡ್‌ರ ವಿಶಿಷ್ಟವಾನ ಕೊಡವ ತಕ್ಕೊ-ಸಾಹಿತ್ಯ, ಜಾನಪದ-ಸಂಸ್ಕೃತಿ, ಆಚಾರ-ವಿಚಾರ, ಕಲೆನ ಪೋತಿ ಬೊಳ್‌ತುವ ಖನ ಉದ್ದೇಶತನ ಕರ್ನಾಟಕ ಸರ್ಕಾರ "ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ" ರಚನೆ ಮಾಡಿತ್ ಇಲ್ಲಿಕೆತ್ತನೆ ಅಕಾಡೆಮಿ ಈ ನಲ್ಲ ಕೆಲಸ ಮಾಡಿಯಂಡ್ ಬಂದಂಡುಂಡ್.

ಬೆಂಜಾಂಡ ತಂಗಚ್ಚಿ ಕಾರ್ಯಪ್ಪ ಇಯಿಂಗ "ತಂಗಚ್ಚಿರ ಕಥೆಗೂಡ್" ಎಣ್ಣುವ ಚೆರಿಯ ಕಥೆರ ಈ ಪುಸ್ತಕತನ ಎಳೆದಿತ್ ಜನ ಖುಶಿಪಡುವನ್ನೆ ಮಾಡಿತ್. ಇಯಿಂಗಕ್ಕೂ ಪಿಂಞ ಈ ಪುಸ್ತಕತನ ಮುದ್ರಣ ಮಾಡ್‌ನ ಗುಡ್‌ಟಚ್ ಪ್ರಿಂಟರ್ಸ್ ಕಾರಕೂ ನಾಡ ವಂದನೆ.


02-06-2001

ಮಡಿಕೇರಿ

ಮೇಕೇರಿರ ಕೆ. ಕಾರ್ಯಪ್ಪ

ಅಧ್ಯಕ್ಷ

ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ



## ಕುಂದಾನ ಕರಕನ ಮಂಜಿ

ಗಂಗು ಬೇಜಾರತ್ ಮರಕ್ ತಾಂಗಿ ಅಳತಂಡ್ ಬೇರ್ ಚಿಟ್ಟಂಡಿಂಜತ್. ಬೀಜಿಯಂಡಿಂಜ ತಂಪುಕಾತ್, ಮೂಕಕ್ ಬಡಿಚಂಡಿಂಜ ಕಾಫಿ ಪೂವ್‌ರ ಗಮನ, ಮಾಂಗಮರತ್ ಕೊಡಿಲಿಂಜ ಕೋಗಿಲೆರ ಕುಹೂ ಕುಹೂ ರಾಗ ಏದೂ ಅವಕ್ ಮನಸ್ಸಕ್ ಸಮಾಧಾನ ಕೊಡ್‌ಪನೆಕೆ ಇಂಜಿಲೆ. ಎನ್ನುಂಡೇಂಗೆನ್ನಾ? ಮನಃ ಶಾಂತಿಯೇ ಇಲ್ಲತ ಪಿಂಞ! ವಡಿಯನೆನ್ನೋ ಅಕ್ಕಕೊಮ್ಮ ಸಮಾಧಾನ ಪರೆಪ. ಅಚ್ಚಕೂ ಒರ್ ತಂಪು ಮನಸ್ಸಕ್. ಆಚೇಂಗಿ ಮಾಂವಿ? ಅವ ತಾನೂ ಒರ್ ಪೊಣ್ಣ್ ಎಣ್ಣಾವಾನ ಮರಂದ್‌ಟಿತ್ ಕಾಂಬ. ಇಲ್ಲೇಂಗಿ ಇಚ್ಚಕ್ ಅನುಭವ ಇಂಜಿತೂ ವಿದ್ಯೆ, ಬುದ್ಧಿ ಇಲ್ಲತ ಮೂಢಂಗಳೆನಕೆ ಪರೆವಾ? ತಡಿಯೆನ್ನೋ ನಾಡದೇ. ತಡಿರೊಳಲ್ ನಡ್‌ಪ ಕ್ರಿಯೆ ನಾಡ ಮನಸ್ಸ ನರಿಂಜಿತ್ ನಡಪಾ? ಥತ್! ನಾಡೋರ್ ಬದ್‌ಕೇಂದ್ ತನ್ನ ತಾನೇ ಬಜ್ಜಂಡಿಂಜವಡ ಬೋಳೆಕಾಲೆ ಕೈ ಇಟ್ತ್ ತಬ್ಬಿಯಂಡತ್ ಮುತ್‌ಕುಂಞಿ. "ಎನ್ನಂಗ್ ಮೋಳೆ ಬಂದಿಯಾ ಈ ಬೆದಲ್?" ಅವಳ ಮಡ್‌ಲಳೆಪಿಚಿಟ್ಟಂಡ್ ಕೇಟತ್. "ಅಲ್ಲಿ ಅವ್ವಯ್ಯ ಬರಕೂಟಿಯಂಡುಂಡ್. ಮಾಮ ಬಂದಿತ್ ಮನೆಕ್. ಏಳ್ ಪೋಕನಾ" ನೆಲಕ್ ಕೈಕುತ್ತಿ ಎದ್ದತ್ ಉಸ್ಸಪ್ಪಾಂದೆಣ್ಣಿಯಂಡ್ ಮುತ್‌ಕುಂಞಿರ ಕೈಪುಡಿಚಂಡ್ ಮನೆಕತ್ತಟಿ ಪೊರಟತ್. "ಮಮ್ಮಿ, ಮಾಮ ಬಲ್ಯ ಬ್ಯಾಗ್‌ಲ್ ಎಂತದೆಲ್ಲೊ ಎಡ್‌ತಬಂದಿತ್." ಬಾಯಿನೀರ್ ಕುಡಿಚಂಡೆಣ್ಣ್ ಚಿ ಕುಂಞಿ "ಹಾಂ, ನೋಟನ ಏಳ್," ಕುಣು ಕುಣು ನಡಂದತ್ ಮೋವ ಅವ್ವಂಡ ಕೂಡೆ. ಅಂದ್ ವಾಸು ಮನೆಲಿಂಜಿಲೆ. ಎಲ್ಲಿಯೋ ಮಂಗಲಕ್ ಪೋಯಿತಿಂಜತ್.

"ಇಂದ್ ನೀಡ ತಂಗೆ ಅಡಿಗೆಯೂ ಮಾಡತೆ ಪೋಯಿತ್ ಅಳತ್ ಬೆಚ್ಚಿತ್ ನೋಟಪ್ಪ. ಅವಡೋರ್ ಪೊಕ್ಕಬಳ್ಳಿ ಪೂತ ಜಾಗ ಉಂಡ್ ಅಲ್ಲ." ಮಾಂವಿ ಬರಕೂಟಿಯುಂಡಿಂಜದ್ ಕೇಟತ್ ಒಳ್ಳಾಕ್ ನುಗ್ಗುವಕ "ಅಣ್ಣಯ್ಯ ಚಾಯಿತುಳ್ಳಿಯಾ, ಮೊಮ್ಮಮಕ್ಕ ಎಲ್ಲ ಚಾಯಿತುಂಡಾ?" ಕಾಲ್‌ಕ್ ಬಗ್ಗಿಚಿ. "ಎಲ್ಲಾರೂ ಚಾಯಿತುಂಡ್. ನೀನೇನ್ನನೆ ಉಳ್ಳಿಯಾ? ಎಣ್ಣಾ" ತಂಗೆರ ಕಣ್ಣಾಲ್ ಕಣ್ಣಾಟ್ಟುಂಡ್ ಕೇಟತ್ ಮಂದು. ಈ ಕುರಿ ತಂಗೆರ ತಡಿ ಇಳೊಂಜಿಪೋಯಿತ್. ಮೂಡ್ ಚಪ್ಪೆ ಕೆಟ್ಟಿಪೋಯಿತ್. ಕಣ್ಣಾಲ್ ಮಿಂಘತ ಬೊಳಿ ಇಲ್ಲೆಂದ್ ಅಣ್ಣಂಡ ಕಣ್ಣಾ ಒರ್‌ಗಳಿಗೆಲ್ ಗೊತ್ತಮಾಡಿರ್‌ತ್. "ಇದಾ ಒಳ್ಳಾಕ್ ಎಡ್‌ತಪೋ. ಮೊಮ್ಮಂಗ್ ಬಪ್ಪಕಯಿಂಜಿಲೆ. ನಾನೊಬ್ಬನೇ ಬಂದ. "ಕೂಪದಿ ಎಡ್‌ತಬಂದ ಬ್ಯಾಗ್‌ನ ತಂಗೆಕ್ ಕೊಡ್‌ತತ್. "ಅಣ್ಣ ಕೂಪದಿ ಕೊಂಡಬಕ್ಕೂಂದ್ ಸೊಪನ ಕಂಡತೆನ್ನೋ. ಅದ್‌ಂಗಾಯ್ತಿ ಅಡಿಗಿ ಮಾಡತೆ ಅಳತಿಯ ಕಾಂಬ." ಮಂದುಕ್ ಕುಡಿಪಕ್ ಕೊಡ್‌ತಂಡೆಣ್ಣಾಚಿ ನೀಲಕ್ಕಿ. ಗಂಗು ಉಸಾರೇ ಬುಟ್ಟಾಲೆ. ಬೆರಿಯ ಬೆರಿಯ ಅಡಿಗಿ ಮಾಡುವ ಕೂಡ್‌ಚಿ. ಅಣ್ಣಂಗ್ ಗದ್ದಾಳವೂ ಮಾಡ್‌ಚಿ. ಮೊಮ್ಮ ಅಯೆಚ ಕೂಪದಿ ಕೂಳ್, ಯರ್ಚಿಕರಿ, ಪಲ್ಮ ಅದ್ ಇದ್‌ಂದ್ ಸುಮಾರಿಂಜತ್. ಎಲ್ಲಾನೋ ಮಾಂವಿಕೂ, ಮಕ್ಕಕೂ, ಅಣ್ಣಂಗೂ ಕುಶೀಲ್ ಬಳಂಬಿತ್ ಉಂಬಿಚಿಟ್ಟಿತ್. ಮಕ್ಕ ಸರೂ, ಸವಿ, ಮುತ್‌ಕುಂಘಿ ಮಾಂವಂಡ ಪಕ್ಕ ಅಳತಂಡ್ ಪೊಟ್ಟೆದುಂಬ ಉಂಡತ್. "ಇವು ಉಂಬಕ್‌ಂದೇ ಪುಟ್ಟ್‌ನವು. ಇಯಂಗಳ ಮನೆಲಿಂಜಿ ಉಳ್‌ಪಿತಾಕಣೆ ನಾಡ ಮೋಂವೊ ಪಾಪರ್‌ಚೀಟಿ ಎಡ್‌ಕಂಡಿಚಾಪೋ ಎನ್ನೋ" ಕುತ್ತಿ ಪರಂದತ್ ನೀಲಕ್ಕಿ, ಮಂದುಕ್ ಕೂಳ್ ತೊಂಡೆಂಜಿ ಕುತ್ತ ಇಳೊಂಜಿಲೆ. ಎದ್ದಿತ್ ಕೈ ಕತ್ತಿರ್‌ತ್.

ಅಣ್ಣನ ಓಣಿಕೆತ್ತಣೆ ಬುಡುವಕ್ ಪೋಚಿ ಗಂಗು. "ನೀಡ ಮಾಂವಿ ಚೆನ್ನ ತೇಂಜವಳೇ. ತಾಂಡ ಕ್‌ರ್ಮಕ್ಕೇ ಅನ್ನನೆ ಪರಂದತಲ್ಲಾ" ಮಂದು ಬೇಜಾರತ್ ಎಣ್ಣಾಚಿ. "ಅಯ್ಯೋ ಇಂತ ಕುತ್ತ ನಾಕೂ ನಾಡ ಮಕ್ಕಕೂ ಮಾಮೂಲಾಯಿಪೋಯಿತ್. ಈ ಕುರಿಯೇಂಗಿ ದೇವ ಕಣ್ಣಾ ತೊರಕುವೊ ಎನ್ನೋ. ನಾಡ ಅದ್ಯಷ್ಟ ಎನ್ನನುಂಡೋ" ಕಣ್ಣೀರ್ ತುಳಿಕೂಟಿ ಬುದ್ದತ್. "ನೀನ್ ಕಯಿಂಜಕುರಿಯೇ ಆಪರೇಶನ್ ಮಾಡಿಚಿಟ್ಟಿರಂಡಿಂಜತ್ ಗಂಗು. ಆ ಮುದ್‌ಕಿರ ತಕ್ಕ ನೀನ್ ಕೇಟದೇ ತಪ್ಪು" ಚೆಡಿಲ್ ಪರಂದಂತವೊ. "ಎನ್ನ ಮಾಡಡ್"



ಅಣ್ಣಯ್ಯ, ವಂಶಕೋರ್ ಆಂಗುಂಚಿ ಬೋಂಡವಾ? ಅಡಕತೆ ಮನೆಕ್ ಬಾಂದ್ ಆಸ್ತೆಲೇ ಪಾರ ಅಳತಿತ್ ಕೂಟಿಯಂಡ್ ಬಂದ್‌ರಾತಲ್ಲಾ. ಅಮ್ಮಂಡ ತಕ್ಕನೋ ಕೂಟಾಕಾಲೆ. ಇದ್ ಎಲ್ಲಿಕೆತ್ತುವಕುಂಡೋ." ಕಣ್ಣ್ ತೇಟಿಯಂಡ್ " ನೀನ್ ಪೋಯಿತ್ ಬಾ ಅಣ್ಣಯ್ಯಂದೆಣ್ಣೆತ್ ಅಣ್ಣನ ಅಯೆಚಿತ್ ಬಾತ್. ಮನೆಕ್ ಬಂದಿತ್ ನುಗ್ಗುವಕ ಮಾಂವಿ ಕೊಡಿಯಲೆ ಚರಿವುಂತಂಡ್ "ನೀನ್ ಯಾಂವಂಡ ಕೂಡೆ ನನ್ನ ಎಚ್ಚಕ್ ದೂರಿಚೇಂಗೂ ನಾಕ್ ಪೋಡಿ ಇಲ್ಲೆ. ಈ ಕುರಿಮಾತ್ರ ಕಣ್ಣುಕುಂಚಿ ಆಕತೆ ಪೋಚೇಂಗಿ ನೀನ್‌ಮನೆಕೇ ಬರಂಡ. ನೀಡ ಅಣ್ಣಂಡ ಮನೆಲೇ ಇಂಜ. "ತಾಕೀತ್ ಮಾಡ್‌ಚಿ ಮೈಮಕ್." ನಾನ್ ದಾರ್‌ನೋ ದಾಡಕೂಡೆಯೂ ದೂರುವಕ್ ಪೋಯಿತಿಲ್ಲೆ. ನಾಡ ಹಣೆಲ್‌ಬರೆನ ಬಜ್ಜಂಡಿಯೆ ಅಚ್ಚಿಕೇ" ಗಂಗು ಎಣ್ಣೆಚಿ. "ಹುಂ, ನಾನೆಲ್ಲ ಕೇಟಂಡಿಂಜ. ಪೋ ಒಳಾಕ್. ಒರ್ ಗುಡ್ಡ ಪಾತ್ರ ಕತ್ತುವಕುಂಡ್". ಪಿಚಕ್ಕಂದ್ ಕೊಡಿಯಲೆ ರಸತ್‌ನೊಮ್ಮ ತುಪ್ಪುವಂಜಿ ಕುರ್ಚಿಲ್ ತಾಂಗಿ ಅಳತತ್. ಒಳಾಕ್ ಪೋಕಣೆ ಸರೂ, ಸವಿ ಪಾತ್ರತ್‌ನೆಲ್ಲ ಕತ್ತಿತ್ ಬೆಚ್ಚಂಡಿಂಜತ್. "ಹ್ಂ ಇಚ್ಚಕ್ ನಲ್ಲ ಬುದ್ಧಿ ಕಾರ ಮಕ್ಕಡಕೂಡೆ ತಾಯಿ ಆಯಂಡ್ ಒರ್ ನಲ್ಲ ತಕ್ಕ ಪರೆವುಲೆ. ಎಕ್ಕೋಲು ಕುತ್ತಿ ಪರೆವದೇ ಆಯಿಪೋಚಿ" ಊಜಳೆ ಬುಟ್ಟಿಂಡತ್ ಗಂಗು.

\* \* \*

ಗಂಗುನ ಸರಕಾರಿ ಅಸ್ಪತ್ರೆಲ್ ಅಡ್ಡಿಟ್ ಮಾಡಿತ್ ಬಾತ್ ವಾಸು. "ಎಕ್ಕೋಲು ಅವಕ್ ಅಡ್ಡ ಬೂವಕೊಂದೂ ಪೋಂಡ ನೀನ್. ಮಕ್ಕ ಸ್ಕೂಲ್‌ಲಿಂಜಿ, ಬಪ್ಪಕ ನೋಟಿಯಂಡ್ ಬಕ್ಕಡ್. ಇದ್ ತೊವ್ವಡೆ ಒಂದೂ ಅಲ್ಲಲ್ಲ. "ಎಂಗ್‌ಚಿ ನೀಲಕ್ಕಿ. "ಅನ್ನನಲ್ಲ ಮಮ್ಮಿ ಡಾಕ್ಟರ್ ಅವಳ ಪರೀಕ್ಷೆ ಮಾಡಿತ್ ಅವಡ ತಡಿಲ್ ಚೋರೆಯೇ ಇಲ್ಲೆ. ಆಪರೇಶನ್ ಮಾಡಂಡಿಯಾಕು ಎಣ್ಣೆಚಿ. ನಾಕೆನ್ನಂಗೋ ಚೆನ್ನ ಪೋಡಿಯೇ" ಎಣ್ಣೆಚಿ. "ಒಂದೂ ಆಪುಲೆ ಮುಂಡತಿರ್. ಚೋರೆ ಎನ್ನಂಗ್ ಇಲ್ಲತಾಪ್ಪೋ? ಮೂಂದ್‌ನೇರ ಕೆಪ್ಪನೆ ತಿಂಬುಲೆಯಾ?" ಕೂತ್‌ಟ್ಟಿತ್ ಅವ್ವೊ. ತಿಂದ್‌ರಾತೇಂಗಿ ವಾದಿಯಾ? ನೀಡ ತಕ್ಕ ಕೇಟತೇಂಗಿ ತಿಂದಕೂಳೂ ಮೈಪತ್ತುವಕಿಲ್ಲೆ. ಮನಸ್ಸಕ್ ಸಂತೋಷ ಎಣ್ಣುವದ್ ಉಂಡಾ? ಎಕ್ಕೋಲು ನೀಡ ಪಿರಿಪಿರಿಯೇಂದ್ ಎಣ್ಣಂಡೂಂದ್ ಬಾಯೆಡ್‌ತಂವೊ. ಬೋಂಡ ವಕ್ಕಬಪ್ಪನೇರಾಚಿ ನಾಡ ಮೀದ ಬಂದ ಚೆಡಿನ ಅಯಿಂಗಡ ಮೀದ

ಆಯಿರಾತ್. ಕಂಬಳಿ ಮುಸಾಕಾಟ್ಟಂಡೇ ಮೊರಟತ್. "ದೇವಕ್ ನಾಡ ಮೀದ ಕರುಣೆ ಇಲ್ಲೆ. ನೀಡವ್ವೊ ನನ್ನ ಇರಾಂಜಿ ತಿಂದಾರುವಾ"ಂದೆಣ್ಣಿಯಂಡ್ ಗೋಳಾಡ್ಚಿ. ಅಲ್ಲಿಕ್ ಬಂದ ನರ್ಸ್ ಬಜ್ಜತ್. ನರ್ಸ್‌ರ ಕೂಡೆ ಗಂಗು ಎಲ್ಲಾ ಎಣ್ಣೆ ತಿಂಜತ್. "ನಿಂಗಕ್ ಕುಂಞಾನ ಬೋಂಡತೆ ಪೋಚೇಂಗಿ ನಾಕ್ ತಾರಿ. ನಾನ್ ಚಾಕಿಯವಿ. ಮೂಡಿಕುಂಞಿ ಆಚೇಂಗೆನ್ನಾ? ಇಕ್ಕ ನಂಗೆಲ್ಲಾ ಮೂಡಿಯಾಯತೇ ಪುಟ್ಟಿತ್ ಅಕ್ಕ, ತಂಗೆಯಳಾಯಿತ್, ಪೊಣ್ಣಾಯಿತ್, ಮಕ್ಕಕ್ ಅವ್ವನಾಯಿತ್ ಬದಾಕಿಯಂಡಿಲ್ಲೆಯಾ? ನಿಂಗಡ ಅವ್ವೊ ಏದ್ ನೂರಾಂಡಲ್ ಉಳ್ಳದೋ? ಅವು ಪೊಣ್ಣಿಲ್ಲಾ?" ಎಣ್ಣಿಯಂಡ್ ದಂಡಾಳ್ಕೂ ಸಮಾಧಾನ ಪರಂದಿತ್ ಪೋಚಿ.

ನೀಲಕ್ಕಿಕ್ ಅವಡ ಪಕ್ಕತ ಮನೆಕರ್ತಿನ ಕೊಂಡ್ ವಿಷಯ ಗೊತ್ತಾಚಿ. ಅವಡ ಕೂಡೇ ತಾಂಡ ಚೆಡಿನ ಕಕ್ಕಿಯಂಡತ್. "ಬುದ್ಧಿತಿಕ್ಕಡ್ ತಾಮನೆಲೇ, ನಾಡ ಮೋಂವಂಗ್ ಇಂಞೋರ್ ಮಂಗಲ ಕೈಪಿ ನೋಟಿಯಾ." ಅವಳೊ ಚೆನ್ನಘಾಟಿ. "ಸೆರಿಯಪ್ಪ, ಒಂದಲ್ಲ ದೆಂಡ್ ಮಂಗಲ ಕೈ, ಅಯಿಂಗಕೂ ಕ್ಕಣ್ಣುಕುಂಞಿ ಆಕತೆ ಪೋಚೇಂಗಿ ಎನ್ನ ಮಾಡುವಿಯಾ ಅಕ್ಕಾ"ಂದ್ ಕೇಟತ್. "ನೋಟನ, ನಾಡ ಹಣೆಬರೆ ಅಚ್ಚಕ್ ಪಾಳಾಯಿತಿಕ್ಕುವಾ? ಇವಳ ಮಾತ್ರ ಬುಟ್ಟಲೆಕ್ಕವೇ. "ಅದ್ ಅಚ್ಚಕ್ ಸುಲಭ ಒಂದೂ ಇಲ್ಲೆ. ಪಯ್ಯು ಗೋಡ್ಡೀಂದ್ ಪೇಟೆಲ್ ಮಾರುವಂಜಿ ಪುದಿಯ ಪಯ್ಯು ಎಡ್‌ಪನೆಕೇಂದ್ ಗೇನ ಮಾಡಿತುಳ್ಳಿಯಾ?" ತೆಳಿಚಂಡೇ ಅವ ಕೇಟತೇಂಗಿಯೂ ನೀಲಕ್ಕಿಕ್ ಚೆಡಿ ಬಾತ್. "ನೀನಿಕ್ಕ ಮುಂಡತೆ ಪೋಯಿರ್. ನನ್ನ ಕೇಕತೆ. "ಎಣ್ಣಾಚಿ. "ಅದೆಲ್ಲಾ ಪೋಡ್. ಬಪ್ಪಿಯಾ ನೀನ್ ಆಸ್ಪತ್ರೆಕ್ ಕುಂಞಿನ ನೋಟುವಕ್?" ಅವ ಬಪ್ಪುಲೇಂದ್ ಗೊತ್ತಿಂಜಿತೂ ಪುನಃ ಕೇಣಾಚಿ. "ಹಾಂ, ಅದಾಂಡ ಮುಸುಣೆ ನೋಟುವಕೂ ನಾಕ್ ಇಷ್ಟ ಇಲ್ಲೆ. ನೀನೆ ಪೋಯ" ದುಂಡ್ ತಿರಾಕಿಯಂಡ್ ಮನೆಕತ್ತಟ ತಿರಾಚಿ. "ಕೇಟಿಯಾ ವಾಸು" ಮೋಂವನ ಕಾಕಿಯಂಡೇ ಬಾತ್. ಅಂವೊ ಅಕ್ಕ ತೋಟತಿಂಜಿ ಬಂದಿತ್ ಕಾಫಿ ಕುಡಾಚೆಂಡಿಂಜತ್. "ಎಂತ ಮಮ್ಮಿ?" "ನೀಡ ಪೊಣ್ಣ್ ಪಂದಿಕುಟ್ಟಿ ಇಟ್ಟನೆಕೆ ಕಾಲಕೋರಂದೇ ಮೂಡಿನ ಪೆತ್ತಗುಡ್ಡೆ ಇಟ್ಟತೇಂಗಿ ನಂಗಡ ಸಂಸಾರತ್‌ರ ಗತಿಯೆನ್ನಾಂಡೂಂದ್?" ವಾಸುಕ್ ಕುಡಿಚೆಂಡಿಂಜ ಕಾಫಿಯೂ ಕೈಪು ಕೈಪಾಚಿ. "ಅದ್ ಅವಡ ತಪ್ಪಾ? ನೀನೂ ಒರ್ ಪೊಣ್ಣಾಯಂಡ್....." "ಮುಚ್ಚಾರಾ ಬಾಯಿ. ನಾಕೇ ಬುದ್ಧಿ ಎಣ್ಣಾವಕ್ ಬಕ್ಕತೆ" ಗೊಣಂಗಾಚಿ ನೀಲಕ್ಕಿ. ವಾಸು ಧಡಕ್ಕಾಂದ್

ಎದ್ದಿತ್ ಪೊರಟಿತ್ ಬಟ್ಟೆ ಮಾತಿಯಂಡ್. "ಎಲ್ಲಿಕ್‌ರಾ? ನೀಡ ಕೊದಿಕುಂಞಾನ ನೋಟುವಕ್ ಪೊರಟಿಯಾ?" ಕೇಟಂಡ್ ಅವಂಡ ಎದಿಕೆ ನಿಂದತ್. "ನೀನ್ ಆ ದಿಕ್ ಪೋಯಿರುವಕಯ್ಯ" ತಾಕೀತ್ ಮಾಡ್‌ಚಿ ಮೋವಂಗ್ ನೀಲಕ್ಕಿ. ಸದ್ಯ ನೀಡ ಬುದ್ಧಿ ನಾಕ್ ಬಂದ್‌ಲೆಲ್ಲಾಂದ್ ಸಮಾಧಾನ ಮಾಡಿಯಂಡತಂವೊ.

\* \* \*

ಗಂಗುಕ್ ಒರೇ ಸಮಾಧಾನ. ಮಾಂವಿ ಎಗರಿಕಳಿಚತೇಂಗಿಯೂ ವಡಿಯ ದಿವಸಕೊಮ್ಮೆ ಬಂದಿತ್ ಎಂತ ಬೋಂಡೂಂದ್ ಕೇಟಿತ್ ಎಡ್‌ತಬಂದಿತ್ ಕೊಡ್‌ಪಂಜತ್. "ನಾನ್ ಭಾವಂಗ್ ಎಣ್ಣೆಯೆ ಗಂಗು. ನಿನ್ನ ಅವನೇ ಬಂದಿತ್ ಕೂಟಿಯಂಡ್ ಪೋಪ. ನೀನ್ ಅಲ್ಲಿಯೇ ಇರ್. ಮಕ್ಕಡ ಚಿಂತೆ ನೀಕ್ ಬೋಂಡ. ಅಕ್ಕಣೆ ಮಮ್ಮಿರ ಬುದ್ಧಿನ ಎನ್ನೇಂಗಿ ಬದ್‌ಲ್ ಮಾಡುವಕಯ್ಯವಾ ನೋಟುವಿ. " ಎಣ್ಣೆ ಚಿ. "ನೀಡ ಅವೊ ಬದ್‌ಲಾಪದೂ ಸೂರ್ಯ ಪಶ್ಚಿಮತ್ ಪುಟ್ಟುವದೂ ದಂಡೂ ಒಂದೇ. ನಾಡ ಕುಂಞಿಕ್ ಆ ಮನೆಲ್ ಬದ್‌ಕುವ ಯೋಗ ಉಂಡೋ ಎನ್ನೋ" ಕುಂಞಿರ ಬರಿಕ್ ತಿರಿಯಂಡತ್ ಕಣ್ಣೀರ್ ಕಾಟಿಯವ ಕಾಗಾಂದ್. ವಾಸು ಕುಂಞಿನೊಮ್ಮೆ ಎಡ್‌ತಂಡ್ ಅದ್‌ಂಡ ನೆತ್ತಿಕ್, ದವಡೆಕೆಲ್ಲಾ ಮುತ್ತ್‌ಕೊಡ್‌ತತ್. "ನಾನ್ ನಾಳೆ ಬಪ್ಪಲೆ. ಬೇಜಾರಮಾಡಿಯಂಡ್ ಪೋಕೆತ್" ಎಣ್ಣೆತ್ ಪೋಚಿ ವಾಸು. ಮನೆಲ್ ಮಕ್ಕಡ ಕೂಡೆ ಅವೊ ಕುಶೀಲ್ ಇಪ್ಪಂಜತ್. ಅವ್ವಂಡ ಕೂಡೆ ಮಾತ್ರ ಕೇಟಾಂಗೋರ್ ಜವಾಬ್ ಅಚ್ಚಿ ಕೇ. "ಇದೆಲ್ಲಾ ನೀಡವ್ವಂಡ ಉಪದೇಶಾಂದ್ ಕಾಂಬ." ಚೆಡಿಬಪ್ಪಕ ಕ್‌ರ್‌ಮೋವಡ ಮಂಡೆಕೊಂದ್ ಕುಟ್ಟುವಂಜತ್ ನೀಲಕ್ಕಿ. "ನಾನೆಂತ ಮಾಡ್‌ನ ಅವ್ವಯ್ಯಾ"ಂದ್ ಕೇಪಕ "ಹ್ಂ ನೀನೇದ್ ನಿಸೂರ್‌ಕೊಳ್ಳಿ. ನೀಡವೊ ಪಳ್ಳೆಕುಟ್ಟಿ ಇಟ್ಟಿತ್‌ಂದ್ ನಾಕೆಣ್ಣಿಯಾ? ಮೆಲ್ಲೆ ಅವ್ವಂಡಕೆಮಿಕ್ ಪಚ್ಚಿ ಕೊಡ್‌ತಿಯಲ್ಲಾ?" ಸರೂ ಉಸರ್‌ರೇ ಬಡುವಂಜಿಲೆ. ಇನ್ನನೇ ಮಕ್ಕಡ ಚೆರಿಯಕೊರಿಯ ತಪ್ಪುನೇ ಬಲ್‌ಂಜನೆ ಬೈಯ್ಯುವದೂ ಪೊಯ್ಯುವದೂ ಮಾಡುವಂಜತ್.

ವಾಸುರ ತಂಗೆ ಕಾಂತಿ. ಅವಡ ವಡಿಯ ಹಾಸನತ್ ಬ್ಯಾಂಕ್‌ಲ್ ಚಾರ್‌ರಿಲಿಂಜತ್. ರಜತ್ ಮನೆಕ್ ಬಾತ್. ತಾಮನೆಲ್ ದಂಡ್‌ದಿನ ಇಂಜಿತ್ ಬಕ್ಕಾಂದೆಣ್ಣಿಯಂಡ್ ಕುಶೀಲ್ ಬಾತ್. ಇಲ್ಲಿ ಬಂದಿತ್ ನೋಟುವಕ ವಿಷಯ

ಬಲ್ಲಾದೆ. ಅವೊ ವೋವಳ ಕಂಡಿತ್ ಕುಶಿಪಟ್ಟತೆಂಗಿಯೂ ಮೂಡ್ ಪೊಲಂದಂಡಿಲ್ಲೆಂದ್ ಗೊತ್ತಾಚವಕ್. ಗಂಗು ಆರೈಕೆಕ್ ತಾಮನೆಕೇ ಪೋಯಿರ್ತಂದ್ ವಾಸು ಎಣ್ಣೆಚಿ. "ನೀನೋರ್ ಮನುಷ್ಯ. ನಲ್ಲದೂ ಕೆಟ್ಟದೂ ಒಂದೂ ಅರಿಚಿಡುಲೇ. ತಂಗನ ಮರಂದಾರ್ತುಳ್ಳಿಯಾಂದ್" ದೂರ್ಚಿ ಅಣ್ಣನ. "ಅರೇ ಇದ್ ಏದ್ ಸಂತೋಷತರ್ ಸುದ್ದೀಂದ್ ಅರಿಚಿಡಡ್ ಕಾಂತಿ? ಅಂತೂ ಇಕ್ಕ ಗೊತ್ತಾಚಲ್ಲ?" "ಎನ್ನನುಂಡ್ ಮಮ್ಮಿ ಕುಂಞಿ?" ಕೇಟತವ್ವನ. "ಅದ್ ಎನ್ನನುಂಡೇಂಗನ್ನ? ಕಂಡಂವಂಗುಳ್ಳದೆನ್ನೆ?" ಧೋರಣೆರ್ ತಕ್ಕ. "ನೀನ್ ವಡಿಯನ ಮಕ್ಕಳ ಎನ್ನಂಗ್ ಕೂಟಿಯಂಡ್ ಬಂದಿತಿಲ್ಲೆ?" ತಕ್ಕ ತಿರ್ಕಚಿ. "ಅಯಿಂಗಲ್ಲ ಒರ್ ಪ್ರೆಂಡ್‌ರ ಮೋವಡ ಮಂಗಲಕ್ ಪೋಯಿತ್. ನಾಲ್‌ದಿನ ಆಂಡು ಬಪ್ಪಕ್. ನಾನ್ ಇಲ್ಲಿಕ್ ಬಂದ. " ಎಣ್ಣೆಚವ. ವಾಸುರ ಮೂಡ್‌ಲೂ ಗೆಲು ಇಲ್ಲತದ್ ಕಂಡತ್. ಅವೊ ಮಕ್ಕಳಕೊಂಡ್ ಪಣಿ ಕೆಯಿ ಚಿಡುವದ್ ಕಂಡಿತ್ ಬೇಜಾರಾಚಿ. ಮಕ್ಕಡ ಕೈಲ್ ಚೀಪೆ, ಬಕೆಟ್ ನೀರ್ ಕೇಟಂಡ್ ತಾನೇ ಒಡ್‌ಕಚಿ. ನೆಲ ತೇಟ್‌ಚಿ. "ಏಯ್ ಕಾಂತಿ, ನೀಕೆನ್ನಂಗ್ ಈ ಕೇಮೆ? ಕೊಡ್ ಅಯಿಂಗಕ್ ಮಾಡಡ್? ತಿಂದಕೂಳ್ ಕರುವಕ್ ಅಚ್ಚಕೇಂಗಿ ಮಾಡತೆಪೋಚೇಂಗಿ ಎನ್ನೆ?" ಕಾಂತಿ ಅವ್ವಂಡ ತಕ್ಕನೊಂದೂ ಕೂಟಾಕಿಲೆ. ಪಿತ್ಯಾಂದ್ ವಡಿಯ ಶಶಿ ಮಕ್ಕಳ ಕೂಟಿಯಂಡ್ ಬಾತ್ ವಾಸುಕ್ ತಾಂಡ ಮಕ್ಕಡ ಕಳಿ ತೆಳಿಕೂ ತಂಗೆರಮಕ್ಕಡ ಕಳಿ ತೆಳಿಕೂ ವ್ಯತ್ಯಾಸ ಉಂಡಂದ್ ಗೊತ್ತಾಚಿ. ಈ ಮನೆಲ್ ಎಂತದೋರ್ ಕೊರವು ಉಂಡಂದ್ ಶಶಿಕೂ ಗೊತ್ತಾಚಿ. ಅಪರೂಪತ್ ಬಂದವಂಗ್ ಎನ್ನಂಗ್ ಬೋಂಡತ ವಿಚಾರಾಂದ್ ಮುಂಡತೆ ಕೂಡಿರ್‌ತ್. ಒರ್‌ದಿನ ಒಳಿಂಜಿತ್ ಪೋಪದೂ ಕೆಜ್ಜತ್ "ನಂಗ ಪೋಪಾಂಡೊಳ್‌ಲೊಮ್ಮ ಮನೆಕ್ ಬಾ" ಅಣ್ಣನ ಕಾಕಿತ್ ಪೋಚಿ ಕಾಂತಿ.

\* \* \*

ಪೂಪಾತಿಲ್ ಕಳಿ ಬಲ್‌ಚಂಡಿಂಜ ಕಾಂತಿಕ್ ಅಣ್ಣನ ಕಂಡಿತ್ ಕುಶಿಯಾಯಿರ್‌ತ್. ತಕ್ಕ ಪರಂದಚ್ಚಕೂ ಪೋರ. ಮಕ್ಕ ಮಾಂವಂಡ ನಳ ಬುಡತೆ ಇಪ್ಪಂಜತ್. "ವಾಸು, ಮನೆಕ್ ಬಂದಿತಿಪ್ಪಕ ನಿನ್ನ ತಕ್ಕಕೇ ಕಟ್ಟುವಂಜಿಲೆ. ಇಲ್ಲಿಯೇಂಗಿ ಎದೆ ತೊರಂದಿತ್ ಪರೆ. ಕಯಿಂಜಕುರಿ ಮುತ್‌ಕುಂಞಿನ ಪೆತ್ತಲ್ಲಿ ಮಮ್ಮಿಯೇ ಆರೈಕೆ ಮಾಡ್‌ಚಿ. ಇಕ್ಕೆನ್ನಂಗ್ ತಾಮನೆಕ್ ಅಯೆಚಿಯೇ"ಂದ್ ಕೇಟತವ. "ನೀಕ್ ಮಮ್ಮಿರ ಬುದ್ದಿ ಗೊತ್ತಲ್ಲತದಾ? ಅವ ಸುರೂಲೇ

ಎಣ್ಣೆ ತಿಂಜತಲೋಗಂಗುಕ್. ಈ ಕುರಿ ಮೂಡಿಕುಂಞಿ ಆಯಿರ್ತೇಂಗಿ ತಾಮನಲೇ ಬುದ್ಧಿ ತಿಕ್ಕಂಡೂಂದ್. ಅವಕ್ ಕ್ಕಣ್ಣ ಕುಂಞಿರ ಪೂದಿ ಪುಡ್ಚಿಪೋಯಿತ್. "ಬೇಜಾರತ್ ಪರಂದತ್ ತಕ್ಕ ಪರಂದಂಡಿಕ್ಕಣ್ ಶಶಿಯೂ ಬಾತ್. "ಓಹೋ ಹೋ ಎನ್ನ ಭಾವ? ತಂಗೇರ ಮನೆಕ್ ಬಟ್ಟೆ ಕಂಡತಾ?" "ಹಾಂ, ಇಕ್ಕ ಬಟ್ಟೆ ತೇಡಿಯಂಡಾಚೇಂಗಿಯೂ ಬರಂಡುವಲ್ಲಾ?" "ಎನ್ನ ವಿಶೇಷ?" ಕುಂಞಿಕ್ ಪೆದ ಇಡುವಾಂಗ್ ಕಾಕುವಕಾ?" ಶಶಿ ಕೇಟತ್. " ಪೆದ ಇಡುವಕ್ ನಾನೇ ಪೋಪುಲೆ. ನಿಂಗಳೆನ್ನನ ಕಾಕಡ್?" "ಎನ್ನಂಗ್?" " ಎಲ್ಲಾ ನಾಡ ಮಮ್ಮಿರ ಕೈಪೆ. ಅದಾಂಡ ಕೂಟ್ಕ್ ಇಕ್ಕ ಪುದಿಯೋರ್ ಸವಾಲ್ ಇಟ್ಟುಂಡುಂಡ್". "ಎಂತದೋ?" "ನಾಕ್ ಇಂಞಿೋರ್ ಮಂಗಲ ಕೈಪಲೋ. ಎಲ್ಲಾಡೂ ಕೂಡೆ ಇಧೇ ತಕ್ಕ." ಕಾಂತಿಕ್ ಚೆಡಿಯೇ ಬಂದಾರ್ತ್. "ಮಮ್ಮಿಕೆನ್ನ ಮಂಡೆ ಕೆಟ್ಪೋಯಿತಾ? ಬೋಂಡತಾ ಪಂಚಾತಿಗೆ. ಏಳಿ ಕೈಕಾಲ್ ಕತ್ತಿ. ಉಂಬಕ್" ಉಂಡಂಡ್ ಮೂಂದಾಳೂ ಇದೇ ವಿಷಯ ಪರಂದತ್. " ಅಲ್ಲಾ ವಾಸು, ಇಕ್ಕ ನಾನಿಲ್ಲೆಯಾ ದಂಡ್ ಮೂಡಿಮಕ್ಕಡ ಅವ್ವನಾಯಿತ್? ನೀಡ ಭಾವಂಗೂ ಆತರ ವರೀಸೊಂದೂ ಇಲ್ಲೆ. ಮಾಂವಿಕೂ ಇಲ್ಲೆ. ಇದೆಲ್ಲ ನೋಟುವಕ ನಾನೇ ಪುಣ್ಯವಂತೆ. ಅಲ್ಲಾ ಶಶಿ? ಅಲ್ಲ ನೀಕೂ ಎನ್ನೇಂಗಿ ಕ್ಕಣ್ಣ ಕುಂಞಿ ಬೋಂಡೂಂದೆಣ್ಣಾವ ಚೆರಿಯ ಗೇನ ಉಂಡಾ?" ಕಣ್ಣ ಚಿಮ್ಮಿಯಂಡ್ ಕೇಟತ್ ಕಾಂತಿ.

"ಉಳ್ಳಾನ ಚಾಕಿತ್ ಮೋಳ್ಕೇತನ. ಇಲ್ಲತಾಂಗೆನ್ನಂಗ್ ಆಶೆ?" ಕೂಳ್ಕ್ ಮೋರ್ ಬೂಕಿಯಂಡ್ ದುರೂಬುರೂಂದ್ ಏಂದಿಯಂಡೆಣ್ಣಚಿ. ಎಚ್ಚಕೋ ನೇರ ಪೂರಮೆ ಅಳತಂಡ್ ಪಳಮೆಪರಂದತ್. ಕಾಂತಿಕ್ ಅವ್ವಂಡ ಕೀಂಜ ಮನಸ್ಸರ ನೇರಾನ ಚಿತ್ರ ಕ್ಕಟ್ಟಚಿ. ಬೈಟ್ ಉಂಡಿತಾನದೂ ಸೋಫತೇ ಅಳತಂಡ್ ವರಿಯಂಡಿಂಜ ವಾಸುನ ಕಾಂತಿ ಬೇಜಾರತ್ ನೋಟ್ಚಿ. ಅಪ್ಪರ ಅವ್ವನೋ ಬುಟ್ಟಾಂಗಯ್ಯ ಇಪ್ಪರ ಪೋಣ್ಣನೋ ಬುಟ್ಟಾಂಗಯ್ಯ. ಪಾಪಾಂದಾಚವಕ್ ಎಚ್ಚರ ಮಾಡಿತ್ ಒಳ್ಳಲ್ ಬುದ್ಧವ ಕೆಣ್ಣಚಿ. ಪಿತ್ಯಾಂದ್ ಪೋಪಕ ಅಣ್ಣಂಗ್ ಕೆಮಿತಕ್ಕಣ್ಣಿತ್ ಅಯೆಚೆತ್. "ನೀನ್ ಕೈಪೆ ಇಲ್ಲತ ಕೋಳಿರೆನಕೆ ಕಳಿಕತೆ. ಅವ್ವಂಡ ಕೊಟ್ಟಾಕ್ ತಾಳ ಇಟ್ಟುಂಡುಂಡೇಂಗಿ ನೀಡ ಮಕ್ಕ ಚಿಕ್ಕವ್ವಂಡ ಕೈಸೆರೆಲ್ ಚಿಕ್ಕಿತ್ ನರಳಂಡು ಅಚ್ಚಿಕೇ. ನೀನ್ ಮಮ್ಮಿನ ಬೊತ್ತಿಚಿಡ್. ನೀನ್ ಇನ್ನನೇ ಕಳಚಂಡುಂಡೇಂಗಿ ನಾನಾ ಗಂಗುನೋ ಮಕ್ಕಳೋ ಕೂಟಿಯಂಡ್ ಬೋರೆ

ಮನೆ ಮಾಡಿಯಂಡಿಪ್ಪೀಂದೆಣ್ಣ್." ವಾಸು ಕೊಂದೊಳಿ ತೆಳ್ಳಚಂಡತ್. ಶಶಿ ತಮಾಷಿ ಮಾಡ್ಚಿ. "ಭಾವಾ, ಈ ಕುರಿ ಮೂಡಿ ನೋಟುವಕ ಅವಕ ಕಣ್ಣ್ಕುಂಚ್ಚಿ ಆಪ ಯೋಗ ಉಂಡಾಂದ್ ಶಾಸ್ತ್ರ ಕೇಟಿತ್ ಅರಿಂಜಿತೇ ಮೊಟ್ಟಡಿ." " ಪುನಃ ಅದೇ ತಕ್ಕೆನ್ನಂಗ್? ಅದನ್ನೆ ಮಮ್ಮಿ ಮೋಂವಂಗ್ ಇಂಚೋರ್ ಮಂಗಲ ಕೈಪಾಂದ್ ನೋಟಿನ. ನೀನ್ ಬೇಜಾರ ಮಾಡತ ಪೋ ವಾಸು" ಅಣ್ಣನ ಸಮಾಧಾನ ಮಾಡಿತ್ ಅಯೆಚತ್.

"ಎಲ್ಲಿಕೊರೇ ಎಣ್ಣತೇ ಪೋಯಿಟಿಯಾ? ನಾಡ ಮೀದ ಚೆಡಿಂಜಂಡ್ ಪೋಯಿಟಿಯೆನ್ನೋಂದ್ ಗೇನ ಮಾಡ್ನ" ಮೋಂವಂಗ್ ಬಿಸಿಯಾಯಿತ್ ಕಾಫಿ ಕೊಂಡ ಬಂದಿತ್ ಕೊಡ್ಪಂಜಿ ಪಕ್ಕ ಅಳತತ್. "ನೋಟ್, ನಾನ್ ಕಣಿಯೆ ತಿಮ್ಮಂಡ ಪಕ್ಕ ಪೋಯಿತ್ ಶಾಸ್ತ್ರ ಕೇಟಿತ್ ಬಂದಿಯೆ." ಎಣ್ಣಚಿ "ಹುಂ, ಎನ್ನೆಣ್ಣಚಿ? ಇಂಚೂ ದಂಡ್ ಪೋಣ್ಣ ಕೆಟ್ಟಿ ಮೋಂವಂಗ್ ಮನೆ ದುಂಬ ಕಣ್ಣಮಕ್ಕಳೇ ಆಪಾಂದೆಣ್ಣಿಚಾ?" "ತಮಾಷಿ ಕಳಿಕತೆ ನೀನ್. ನೀಕ್ ಕಣ್ಣ ಕುಂಚ್ಚಿರ ಯೋಗ ಉಂಡ್ಂದೆಣ್ಣಿಚಿ. ಆ ಚೆಂಬೆನ ಮರಂದ್ಕಾರ್. ನಾನೆಣ್ಣನೆಕೆ ಕೇಳ್." ನೀನಿಂಚೂ ಪದಿನೆಟ್ಟಿನೇ ನೂರಾಂಡ್ಲೇ ಉಳ್ಳಿಯಾ. ಪುಟ್ಟನ ಮಕ್ಕಳ ಕೂಲಿ ಮಾಡುವಕ ಬುಡುವಂಜಿ ಇಂಚೋರ್ ಪೋಣ್ಣ ಕೆಟ್ಟಿಂಡುವಾ? ಒರ್ ಪೋಣ್ಣ ಬಿಂವತಿಪ್ಪಕ ಇಂಚೋರ್ ಪೋಣ್ಣ ಕೆಟ್ಟುವದ್ ಕಾನೂನ್‌ಕ್ ವಿರೋಧ. ಅದ್ ಅಪರಾಧ, ಗೊತ್ತುಂಡಾ ನೀಕ್?" ವಾಸು ಕಡ್ಪತೇ ಕೇಟಿತ್. ಕಾಫಿ ಕಪ್ಪನ ಅಲ್ಲಿಯೇ ಕುಕ್ಕಚಿ. "ಚುಡ್ ನೀಡ ಕಾನೂನ್‌ನ. ನಂಗಡ ಸುಖ, ಸಂತೋಷ್ತರ ನಡೂಲ್ ನೀಡ ಕಾನೂನ್‌ನ ಬಲಿಕತೆ. " ನೀಲಕ್ಕಿಯೂ ಚೆಡಿಲೇ ಪರಂದತ್. "ನಾಡ ಮಕ್ಕ ಚಿಕ್ಕವ್ವಂಡ ಕೈಸೆರೆಲಿಪ್ಪದ್ ಬೋಂಡ. ನೀಕೂ ಅಯಿಂಗಳ ಕುಶಿ ಇಲ್ಲೆ. ಅದಂಗೇ ನಾನ್ ಒರ್ ತೀರ್ಮಾನಕ್ ಬಂದಿಯೆ." " ಎಂತದಾರೇ ನೀಡ ತೀರ್ಮಾನ?" ಕೇಟಿವ ಜೋರ್ಲಾ. ನಾನ್ ಗಂಗುನೋ, ಮಕ್ಕಳೋ ಕೂಟಿಯಂಡ್ ಟೌನ್‌ಲ್ ಪೋಯಿತ್ ಬೋರೆ ಮನೆ ಮಾಡಿಯಂಡಿಪ್ಪಿ" ಎಣ್ಣನದ್ ಕೇಟಿತ್ "ಉಯೀ, ತಾಯ್ಂಡ. ಇದೇಯಾ ನಿನ್ನ ಪೆತ್ ಚಾಕ್‌ನ ಅವ್ವಂಗ್ ತಪ್ಪ ಮರ್ಯಾದಿ?" ತಿರೀತ್ ಕೇಟಿತ್. "ನೀಕ್ ಮೋಂವಂಡ ಮೀದ ಪ್ರೀತಿ ಇಲ್ಲೆ. ಮೈಮಡ, ಕೊರಮಕ್ಕಡ ಮೀದ ಕನಿಕರ ಇಲ್ಲೆ. ಇಂಚಿ ನಾನೆನ್ನಂಗ್ ನೀಕ್ ಮರ್ಯಾದಿ ತಕ್ಕಂಡು?" ಇಚ್ಚಕ್ ಪರೆವಂಜಿ ಎದ್ದಾರ್ತ್.

\* \* \*

ಮನೆಕ್ ಬಂದಯಿಂಗಲ್ಲ ನೀಲಕ್ಕಿರ ತಕ್ಕ ಕೇಟಿತ್ ಬಯ್ಯುವಂಜತ್.

"ನೀಕ್ ಬಯತಾನ ಮುಂಡತೆ. ಮಕ್ಕಳ ಕಣ್ಣ, ಮೂಡೀಂದ್ ನಂಗಕೆನ್ನೇಂಗಿ ತಿದ್ದುವ ಕಯ್ಯುವಾ? ಅಡಕತೆ ಪೋಯಿತ್ ಮೈಮಳ ಕೂಟಿಯಂಡ್ ಬಾ. ಇಲ್ಲಿ ಪಾಪ, ಆ ಮಕ್ಕಡೋ ಗೋಳ್. ಅವಂಗೂ ಮನಃಶಾಂತಿ ಇಲ್ಲೆ. ನೀಡ ಪಿರಿಪಿರಿ ಕೇಟಿತ್ ಮದಿಯಾಯಿತಿಕ್ಕು." ಉಹೂಂ, ನೀಲಕ್ಕಿರ ಬುದ್ಧಿ ಬದಲಾನದೇ ಇಲ್ಲೆ. ಬದಲಾಕ್ ಅವಡ, ಇವಡ ಕೂಡ ವೋಂವಂಗೋರ್ ನಲ್ಲಮೂಡಿನ ತೇಡಿತಾಂದ್ ಎಣ್ಣೆವಂಜತ್. ಒಬ್ಬ ಅವಕ್ ಕುತ್ತಿ ಪರಂದತ್. "ಕಣ್ಣ ಕುಂಞಿ ಉಳ್ಳೊ ವಡಿಯ ಚತ್ತದೋ, ಬುಟ್ಟದೋ ಆನಂತ ಒರ್ ಪೋಣ್ಣನ ತೇಡ್. ನೀಕ್ ಕಣ್ಣ ಕುಂಞಿ ಬೋಂಡು ಅಚ್ಚಕೆನ್ನೆ?" "ಥತ್! ನೀಡ ಬುದ್ಧಿ ಎನ್ನ ಕೆದಪುಡ್ಚಿ ಪೋಯಿತಾ? ಆ ಕುಂಞಿ ಅವಡದಾಕುವೇ ಹೊರ್ತು ನಾಡ ವೋಂವಂಡದಾಪೆನ್ನೆ? ಬಾಯ್ಕಿಚ್ಚಿಯಂಡ್ ಪೋಂದ್" ಪಡಕಿರ್ತ ಅವಳ. ನೀಡ ಪುದಿ ಅಡಂಗ್ ಬೇಂದ್ ಮನಸಾಲೇ ಬಜ್ಜಂಡ್ ಜಾಗ ಬುಟ್ಟತವ. ದಿನ ಪೋನನೆಕೇ ಅವಕ್ ಹಟ ಜಾಸ್ತಿಯಾಚಿ. ಮಕ್ಕಡ ಕೈಲ್ ಏರ ಕೆಲಸ ಮಾಡಿಚಿಡುವ ಕೂಡ್ಚಿ. "ಅವ್ವಯ್ಯ ನಂಗಕ್ ಸ್ಕೂಲಾಕ್ ನೇರಾಪ. ಹೋಂವರ್ಕ್ ಆಯಿತಿಲ್ಲೆಂದೆನ್ನೇಂಗಿ ನೆಂವನ ಎಡ್ತತೇಂಗಿ ಬೆನ್ನಕ್ ಬೂವಂಜತ್ ಗುದ್ಲ, ಇದ್ನೆಲ್ಲ ಮಕ್ಕ ಅಪ್ಪಂಗ್ ಎಣ್ಣೆವಂಜಿಲೆ. ವಾಸುಕ್ ಎಲ್ಲಾ ಗೊತ್ತಾಪಂಜತ್. " ಅಲ್ಲಾ ಮಮ್ಮಿ, ಮಕ್ಕಳ ಚಿಕ್ಕವೊ ಗೋಳ್ಕೆಟ್ಟುವಾಂದೆಣ್ಣೆವದ್ ಲೋಕಾರೂಡಿ. ಇಲ್ಲಿ ನೀನೇ ಚಿಕ್ಕವನಾಯಿಟಿಯಾ? ನೀಡ ಕೊಣಿಕ್ ನಾನ್ ಇಂಞೋರ್ ಮಂಗಲ ಕೈಚಕ ಅವಳೂ ಇನ್ನನೆನ್ನೆ ಈ ಮಕ್ಕಳ ಚಾಕುವೊ? ಮಂಗಲೋ ಬೋಂಡ. ಮಾದೋ ಬೋಂಡ " ಎಣ್ಣೆನಂವೊ ಮಕ್ಕಳೆಲ್ಲ ಪೊರಡಿಚಿಟ್ಟತ್. "ಎಲ್ಲಿಕ್ ರೇ ಕೂಟಿಯಂಡ್ ಪೋಪಿಯಾ?" "ಸುಡ್ ಗಾಡ್ ಕ್, ನೀಕ್ ಬೋಂಡತ ಮಕ್ಕ ಎಲ್ಲಿಕ್ ಪೋಚೇಂಗನ್?" ಎಣ್ಣೆವಂಜಿ ಬಟ್ಟೆ ಪುಸ್ತಕ ಸಮೇತ ಪ್ಯಾಕ್ ಮಾಡಿಯಂಡ್ ಮನೆಲಿಂಜಿ ಇಳಿಂಜತ್. ನೀಲಕ್ಕಿ ಉಸ್ ರಿಲ್ಲೆತೆ ಅಳತತ್.

"ಪಪ್ಪಾ, ಇಕ್ಕ ನಂಗ ಎಲ್ಲಿಕ್ ಪೋಯಂಡುಳ್ಳೊ?" ಸರೂ ಕೇಟತ್.

"ಮಮ್ಮಿರ ಮನೆಕ್" "ಓ! ಅಂದಕ ನಂಗ ಇಂಞಿ ಅಲ್ಲಿಯೇ ಇಪ್ಪದಾ?" ಸವಿರ ಪ್ರಶ್ನೆ. ಮುತ್ತ ಕುಂಞಿಕಂತೂ ಕುಶಿಯೋಡ್ ಕುಶಿ. "ನಲ್ಲದಾಚಿ, ನಂಗಲ್ಲ

ತಂಗಿ ಕುಂಞಿರ ಕೂಡ ಕಳಿಕಲು." "ಕಳಿಪಕಲ್ಲ, ನಿಂಗ ಅಲ್ಲಿಂಜೇ ಸ್ಕೂಲ್‌ಕ್ ಪೋಕಂಡು" "ಓಹೋ! ಅದಂಗೆನ್ನ? ಅಲ್ಲಿ ಮಾಮಿ ಅವ್ವಯ್ಯಂಡನೆಕೆ ಪಣಿ ಕೆಯಿಚಿಡುಲೆಲ್ಲಾ. ಇಲ್ಲಿ ನೋಟ್ ಪಪ್ಪಾ, ನೀರ್ ಬಲ್‌ಚೀ ಬಲ್‌ಚೀ ನಾಡ ಕೈಲ್ ಎನ್ನನೆ ಗುಳ್ಳೆ ಬಂದಿತ್ ನೋಟ್" ಚೋಂದಿತೆ ಗುಳ್ಳೆ ಬಂದಿತ್ ಒಡಂದ ಕೈನ ಕಾಟಿಕೊಡ್‌ತತ್. ವಾಸುಕ್ ಕೆಲ ಉರಿಂಜತ್. ಇಂಜಕಿಂಜನೆಕೇ ಕೆಟ್ ಮೂಟೆ ಆಯಿತ್ ಬಂದಿತ್‌ಳಿಂಜ ವಡಿಯನೋ ಮಕ್ಕಳೋ ನೋಟಿತ್ ಗಂಗುಕ್ ಉಸ್‌ರ್ ಚಿಕ್ಕನೆನಕೆ ಆಚಿ. ಎನ್ನಂಗೆ? ಮಾಂವಿಕೆನ್ನೇಂಗಿ ಹುಷಾರಿಲ್ಲೆಯಾ? ಅಲ್ಲ ಜಗಳಮಾಡಿಚಾ? ಗೇನ ಮಾಡಿಯಂಡೇ ಮಕ್ಕಳ ಮುತ್ತಂಡತ್, ವಡಿಯನೊಮ್ಮ ನೋಟ್‌ಚಿ. "ಗಂಗು, ಮಕ್ಕ ಇಲ್ಲಿಯೇ ಇರಡ್. ಇಲ್ಲಿಂಜೇ ಸ್ಕೂಲ್‌ಕ್ ಪೋಕಡ್. ಅಲ್ಲಿ ಉಂಡೇಂಗಿ ಅಯಿಂಗ ಮನೆಪಣಿ ಕೆಚ್ಚಿತೇ ಚೋತ್‌ಪೋಪ. ಮಮ್ಮಿಕ್ ಅಯಿಂಗಡ ಮೀದ ಇಂಞೆನ್ನ ಪಗೆಯೋ. ಪೋಯ್ತ, ಗುದ್ದೂ ಬೋರೆ, ನೋಟೀ ನೋಟೀ ಸಹಿಸುವ ಕಯ್ಯತೆ ಕೂಟಿಯಂಡ್ ಬಂದ್‌ಟ." ಚುಮ್ಮಿ ಕುಂಞಿರ ಮಂಡೆ, ಮೇಲ್‌ನೋಮ್ಮ ಬರ್‌ಜಿಯಂಡ್ ಪರಂದತ್. "ಪಪ್ಪಾ, ಚುಮ್ಮಿನ ನಾಡ ಮಡಲ್ ಬೆಚ್ಚಿತಾ" ನೆಲತ್ ಕಾಲ್‌ನೋಟಿ ಅಳಾತಂಡೆಣ್ಣ್ ಚಿ ಸರೂ. ಬಾಕಿ ದಂಡಾಳೂ ಆಬರಿಲೊಬ್ಬ ಈಬರಿಲೊಬ್ಬ ಅಳತಂಡತ್ ಕಾಲ್‌ನೊಬ್ಬ, ಕೈನೊಬ್ಬಂದ್ ತೇಟಿಕಳಿಚತ್. ಮಕ್ಕಡ ಆಶೆ ಪ್ರೀತಿ ನೋಟಿತ್ ದಂಡಾಳೂ ಕುಶಿಪಟ್ಟಂಡತ್. ಮಕ್ಕಕ್ ಇಂಞೂ ಒರ್ ಕುಶಿ ಎಣ್ಣಿ ಚೇಂಗಿ ಎಕ್ಕೋಲು ಸ್ಕೂಲ್‌ಕ್ ಬಸ್‌ಲ್ ಪೋಕಲೂಂದ್. ಗಂಗು ಒತ್ತಂಡತ್, ಅವಡ ಮೊಮ್ಮನೂ "ನಲ್ಲದಾಚಿ. ಇಲ್ಲಿಯೇ ಇರಡ್‌ಂದೆಣ್ಣ್ ಚಿ. ಚೆನ್ನ ಸಮಯ ಕಯಿಂಜದೂ ಕುಂಞಿನ ಮನೆಲೇ ತೊಟ್ಪ್‌ಕ್‌ಟ್ಟತ್. ಶ್ವೇತಂದ್ ಪೆದ ಇಟ್ಟತ್. ಜನಳೊಂದೂ ಕೂಟಿಲೆ. ಸುತ್ತಮುತ್ತ ಇಂಜ ಎಟ್ಪಪತ್ ಜನ ಮಾತ್ರ.

\* \* \*

ನೀಲಕ್ಕಿಕ್ ಇಕ್ಕ ಚೆನ್ನ ತೊಂದರೆಯೇ. ಬಗ್ಗಿ ಎದ್ ಪಣಿ ಕೆಯ್ಯವಕಯ್ಯಲೆ. ಸೊಂಟ ಪುಡಿಚವ. ನೀರ್ ಬಲ್‌ಚಿ ತಾಪ್ಪಾಂದ್ ಮೋಂವಂಗೆಣ್ಣಂಡು, ಓರಮ್ಮ ಅಡಿಗೆ ಮಾಡುವಕೇ ಕಯ್ಯತೆ ಬುದ್ಧವಂಜತ್, "ಇಕ್ಕ ಗೊತ್ತಾಪ ನೀಕ್? ಮನೆಲುಳ್ಳ ಜನಡ ಕೂಡ ಒತ್ತೊಮೆಲಿಂಜತೇಂಗಿ ಎಚ್ಚಕ್ ನಲ್ಲದ್‌ಂದ್? ಗಂಗು ನೀಡ ಆಸ್ತಿನ ಒಕ್ಕಿಚಿಡುವಕ್



ಬಂದವಾಂದೆಣ್ಣವನೆಕೆ ಕಳಿಪಂಜಿಯೂ, ಮಕ್ಕಡ ಮೀದವೂ ನೀಕ್ ಪ್ರೀತಿ ಎಳ್ಳರಚ್ಚಕೂ ಇಂಜಿಲೆ. ಇಕ್ಕ ಅನುಭವಿಚಿಡ್." ವಾಸು ಚೋತಿಯೂರ್ ದಿನ ಎಣ್ಣೆಚಿ. "ಅಕ್ಕುವಪ್ಪಾ, ಎಲ್ಲಾ ತಪ್ಪು ನಾಡದೇ. ಪರಿಯಯಿಂಡ ತಕ್ಕ ಎಕ್ಕೋಲು ಕೈಪೇ. ನೆಲ್ಲಿಕೆ ತಿಂಬಕ ಸುರೂಲ್ ಕೈಪ. ಬಯ್ಯಂಜಿ ಅವುಂಜಿ ಅವುಂಜಿ ತಿಂಬಕ ಅದಂಡ ಚೋದೇ ಬೋರೆ ಅಲ್ಲ ಅನ್ನನೇ." ನೀಲಕ್ಕಿಯೂ ಬರಕೂಟಿಯಂಡತ್. ಅಂತೂ ಅವಡ ಬಾಯಿಲ್ ಗಂಗುನ ಕೂಟಿಯಂಡ್ ಬಾಂದೆಣ್ಣವ ತಕ್ಕ ಪೊರಬುದ್ದಲೆ. ಏರ ಪರಂದತೇಂಗಿ ಅವುಂ ಅಂದೆಣ್ಣನೆಕೆ ಬೋರೆ ಸಂಸಾರ ಮಾಡುವ ಕೂಡಿರೂಂದ್ ಪೋಡಿ ಬೋರೆ. ಅನ್ನನಾಯಿತ್ ನೆರಕಿಯಂಡ್, ಸೊಂಟ ಉದ್ದಿಯಂಡ್ ತೆರಂಗಿಕಳಿಪಂಜತ್.

ಒನ್ನಾಂದ್ ಧಿಡೀರಂದ್ ಕಾಂತಿ ತಾಮನೆಕ್ ಬಾತ್ ಒಬ್ಬಳೇ, ಬಲ್ಯ ಬ್ಯಾಗ್ ಪೊಟ್ಟಿ ಅಡಕ ಬಂದವಳ ಕಂಡಿತ್ ಚೆನ್ನ ದಿನ ಇಪ್ಪಕ್ ಬಾತೆನ್ನೊಂದ್ ಕುಶಿಪಟ್ಟತ್ ನೀಲಕ್ಕಿ. ಎನ್ನೆಂಗಾಡ್ ನಾಡ ನೆರಕಟ ದೇವಕ್ ಕೇಟತೆನ್ನೋ, ಇವಳ ಉಂದಿಯಂಡ್ ಬಾತ್ಂದ್ ಗೇನ ಮಾಡಿಯಂಡತ್. ಒರ್ವಾರ ಮೋವ ಅವ್ವಂಗ್ ಚೋದಾಯಿತ್ ಅಡಿಗ ಮಾಡಿತ್‌ಟ್ಟತ್. "ನೀನ್ ಬಂದದ್ ನಲ್ಲದಾಚಿ ಕಾಂತಿ. ಇಲ್ಲೇಂಗಿ ನಾಕ್ ಕಂಜಿಕೂಳ್, ವಣಕ್ ಬ್ರೆಡ್ಡೇ ಗತಿ. ಮಮ್ಮಿಕ್ ಪೊಲಾಕ ಏವಕೇ ಕಯ್ಯಲೆ." ವಾಸು ಎಣ್ಣೆಚಿ. "ಆಚಿಬುಡ್, ನಾನಿಂಞಿ ಇಲ್ಲಿಯೇ ಇಪ್ಪಿನಲ್ಲಾ, ಅಡಿಗರ ವಿಷಯ ಚಿಂತೆ ಬೋಂಡ ನೀಕ್" ಕಾಂತಿ ಎಣ್ಣೆವಕ ಅವ್ವನೂ, ಮೋಂವನೂ ಮೂಡ್‌ಮೂಡೇ ನೋಟಿಯಬುದ್ದತ್. "ಹಾಂ, ಸರಿಯಾಚಿ. ಅಲ್ಲಿ ಭಾವಂಡ ಮಕ್ಕಡ ಗತಿ?" "ಮಾಡಿಯಂಡ್ ತಿಂಗಡ್. ಧೋರಣೆಲ್ ಪರಂದತ್. "ಅಲ್ಲಾ ಕುಂಞಿ, ನಾನಂದೇ ಕೇಕಂಡೂಂದಿಂಜ. ನೀನೊಬ್ಬಳೇ ಎನ್ನಂಗ್ ಬಂದಿಯೆ? ಮಕ್ಕಳೇಂಗಿ ಕೂಟಿಯಂಡ್ ಬಪ್ಪಕೆನ್ನಾಚಿ?" ಮೋವ ಉದಾಸೀನತೇ ಪರಂದತ್. " ಅಯಿಂಗಳೊಮ್ಮ ಎನ್ನಂಗಿಲ್ಲಿ? ನೀಕ್ ಪಂಡೇ ಮೂಡಿಮಕ್ಕಡ ಮುಸಾಣೆ ಕಂಡಕ ಆಪುಲೆ. ಅದೂ ಅಲ್ಲತೆ ಅಯಿಂಗಳ ಸ್ಕೂಲ್ ಪಾಳಾಪಲ್ಲ?" ಚೆನ್ನನೇರ ಮುಂಡ ತಿಂಜವ "ನಾಕ್ ನೆಲ್ಲೋರ್ ವಡಿಯನ ಕಟ್ಟಿತ್ಂದ್ ಕುಶಿಲಿಂಜ, ಇಕ್ಕನೋಟುವಕ.." ಎನ್ನಂಗವ್ವ? ಎನ್ನಾಚಿ?" ಅವ್ವಂಗ್ ಕೆಲಉರಿ. "ಎನ್ನಾಪೊ? ನೀಡ ಮಾದಾರಿಯೇ ನಾಡ ವಡಿಯಂಗೂ ಕಣ್ಣು ಕುಂಞಿರ ಅಲ್ಪು ಶುರುವಾಯಿತ್. ಚೆನ್ನಪಣ ಕಾಸ್ ಕೂಡಿತ್ ಪುದಿಯ

ಆಸ್ತಿ ಎಲ್ಲಾ ಎಡ್‌ತ್‌ತಾಪಕ ಅದಂಗೊರ್ ವಾರೀಸ್‌ದಾರ ಬೋಂಡೂಂದೆಣ್ಣುವಾ".

"ಅದಂಗೆನ್ನಲೋ? ನೀಕೆನ್ನ ಅರುವದ್ ಬಯತಾಯಿರತಾ? ಋಣ ಉಂಡೇಂಗಿ ಇಯ್ಯಾಂಡೇ ಆಪಕೂ ಮದಿ. ಎಳಿಯವಕ್ ಎಚ್ಚಕ್ ಇಕ್ಕ? ಆರ್ ಬಯತಲ್ಲಾ" ತಾನ್ ಮಾಡ್‌ನದ್ ತಪ್ಪಲ್ಲಾಂದ್ ಸಾಧಿಚಿಡುವಕ್ ಇದೋರ್ ಸಂದರ್ಭ ಕ್ಕಟ್ಟಿಚವಕ್. "ಹಾಂ, ನೀಕೆನ್ನೊ ಪಿರಾಂದ್ ಮಮ್ಮಿ, ಇಕ್ಕಾಕಣೆ ಅವಂಗ್ ಈ ಗೇನವೇ ಇಂಜಿಲೆ. ಉಳ್ಳಯಿಂಗಳ ಚಾಕಿತ್ ಮೋಳ್‌ಕೇತನಾಂದೆಣ್ಣಿಯಂಡಿಂಜತ್" ಕಣ್ಣ್‌ಲ್ ನೀರೂ ಬಾತವಡ. "ಅದಂಗ್ ಮೊರಡುವೊ ಎನ್ನಂಗ್? ಅವೊ ಬಕ್ಕಡ್ ನಾನೇ ಎಣ್ಣುವಿ. "ಮೋವಕ್ ಸಮಾಧಾನ ಪರಂದತ್". "ನೀನ್ ಪರಂದಕೋ ಫಲ ಇಲ್ಲೆ. ಎನ್ನಂಗೆಣ್ಣಿಚೇಂಗಿ ಶಶಿ ಅಕ್ಕಲೇ ದಂಡನೆ ಮಂಗಲ. ಕೈಪಕ ಮೂಡಿ ತೇಡಿಯಂಡುಂಡ್. ಇದೇ ವಿಷಯತ್ ಅಪ್ಪರಿಪ್ಪರ ತಕ್ಕಾಚಿ. ಅವೊ ಹಟ ಪುಡ್‌ಚಿಟಿತ್. ನಾಕೂ ಚೆಡಿಬಾತ್, ಸೀದ ಪೊರಟ್ ಬಂದ್‌ಟ, ನಾಕ್ ಡೈವೋರ್ಸ್‌ ತಂದ್‌ರುವಲೋ." ಅವ್ವಂಡ ಮೂಡೇ ನೋಟ್‌ಚಿ. "ಇರ್, ವಾಸುರ ಕೂಡೆ ಎಣ್ಣಿತ್ ಅವನೇ ಅಯೆಪಿ, ತಕ್ಕ ಪರಯಡ್." "ಅಂದ್ ಬಂದಲ್ಲಿ ಅಚ್ಚಕ್ ಚಾಯಿಲಿಂಜಂವಂಡ ಮಂಡೆ ಎನ್ನನೆ ತಿರೀಪೋನ? ಇದ್‌ಲ್ ದಾಡೇಂಗಿ ಕುಮ್ಮಕ್ಕುಂಡೆನ್ನೋ" ಸಂಶಯಪಟ್ಟತ್ ಅವೊ. "ದಾಡೊ ಕುಮ್ಮಕ್ಕಿಲ್ಲೆ. ನಾಕಿಂಚ್ ಮಕ್ಕ ಆಪ ಸಾಧ್ಯತೆ ಇಲ್ಲೆಂದ್ ಡಾಕ್ಟರ್ ಎಣ್ಣನದೇ ಹೇತು. ಬೋಲೆ ಬೋಲೆ ಮೂಂದ್ ಡಾಕ್ಟರುವಳೊಂಡ್ ಪರೀಕ್ಷೆ ಮಾಡಿಚಿಟ್ಟ. ಎಲ್ಲಾರೂ ಅನ್ನನೇ ಎಣ್ಣಿರ್‌ತ್. ಪುನಃ ಮಕ್ಕ ಆಚೇಂಗಿ ನಾಡ ತಡಿಕೇ ಅಪಾಯಂದೆಣ್ಣಿರ್‌ತ್." ನೀಲಕ್ಕಿ ದವಡೆಕ್ ಕೈಕೊಡ್‌ತಂಡ್ ಅಳತಂಡತ್. "ಬೋಂಡ ಬುಡ್ ಮೋಳೆ, ಮುತ್ತರಂತ ದಂಡ್ ಮೂಡಿಮಕ್ಕ ಉಂಡಲ್ಲಾ ಮದಿ." "ನಾನೆನ್ನೋ ಮದೀಂದ್ ಅಳತವಿ. ಅವೊ ಕೇಕಂಡುವಲ್ಲಾ. ನಾನಂತೂ ಅವೊ ಇನ್ನನೆ ಬದ್‌ಲಾಕೂಂದ್ ಸೊಪನತೂ ಗೇನಮಾಡಿತಿಂಜಿಲೆ. ಎಲ್ಲಾ ನಾನ್ ಪಡಂದಬಂದದ್. ಇಂಚೊಬ್ಬನ ಕೆಲ ಉರಿಚಿಟ್ಟತೇಂಗಿ ಆ ಶಾಪ ನಂಗಕೂ ತಟ್ಟುವಾಂದೆಣ್ಣುವದ್ ಪೊಟ್ಟಲ್ಲ" ಓಂಗೊಬ್ಬಲಿ ಪೊಯಿತೊಬ್ಬಲೀಂದ್" ಪರಂದತ್ ಕಾಂತಿ. ನೀಲಕ್ಕಿಕ್ ಆ ತಕ್ಕ ಪಟ್ಟಲೆ.

\* \* \*

ಮನೆಲ್ ಪಣಿ ಕೆಜ್ಜಿತ್ ಚೋತಿತ್ ಕೈಕಾಲೇ ಬರತೆನಕೆ ಆಯಿತಿಂಜ ನೀಲಕ್ಕಿಕ್ ಮೋವಡ ತಕ್ಕ ಕೇಟಿತಾಪಕ ಇಂಞಚ್ಚಕೂ ಸುಸ್ತಾನೆನಕೆ ಆಯಿರ್ತ್. "ಅಂವೊ ಎಲ್ಲಿ ಇಂಞೋರ್ ಮಂಗಲ ದುಡ್ಕಿತ್ ಕಯಿಚಿರುವೋ, ನಾಡ ಕುಂಞಿರ ಬಾಳ್ಪಾಳಾಯಿರುವಲ್ಲಾ ಎಣ್ಣುವ ಕೊರಗ್ ಶುರುವಾಚಿ. ಮೋವ ಎಕ್ಕೋಲು ಮೂಡ್ ತೂಕಿಯಂಡ್ ಇಪ್ಪದ್ ಕಂಡ ಕೆಲ ಉರಿವಂಜತ್. ಒರ್ ದಿನ ಅಂವೊ ರಜತ್ ಬಂದದ್ ಅರಿಂಜಂಡ್ ನಾನೇ ಪೋಯಿತ್ ಬಪ್ಪಿಂದ್ ಮೋವಡ ಮನೆಕ್ ಪೊರಟತ್. "ನೀನ್ ಪೋಯಿತೊಂದೂ ಮಾಡುವಕಯ್ಯಲೆ. ನಾಡ ಮೊರೆಪಡೆ, ಚೆಡಿಕ್, ತಕ್ಕಕೇ ಬೆಲೆ ತಕ್ಕತಂವೊ ನೀಡ ತಕ್ಕಿಡ್ಪದೂ ಅಚ್ಚಕಾತೇ ಉಂಡ್. ಅಡಕತೆ ಅಳೆ "ಪೊರಟವಳ ತಡ್ತತ್" ಆ ಕ್ಕಣ್ಣನೂ ಎಣ್ಣಾನ ತಕ್ಕ ಕೇಪುಲೆ. "ಅಯಿಂಡಯಿಂಡ ಮಂಡೆಕ್ ಅಯಿಂಡಯಿಂಡ ಕೈಂ" ದೆಣ್ಣಿಯಂಡ್ ಕೈ ಓಂಗಿರ್ತ್. ನೀನ್ ಜಿಂವತೋಡೇ ಇಂಜನೆಕೇ ಅಂವೊ ಎನ್ನನೆ ಇಂಞೋರ್ ಮಂಗಲ ಕೈಪೊ ನಾನೂ ನೋಟುವಿ." ನೀಲಕ್ಕಿ ಪಾರಿಕಳಿಚತ್. ಇನ್ನನೇ ಅಪ್ಪರಿಪ್ಪರ ತಕ್ಕಾಯಂಡಿಪ್ಪಕ ವಾಸು ಬಾತ್. "ಎಂತದ್ ಕಾಂತಿ? ಪೆರ್ತ ಬಲ್ಯ ವಿಷಯತ್ ಚರ್ಚೆ ನಡಂದಂಡಿಂಜತ್ ಕಾಂಬಲ್ಲಾ. ಮಮ್ಮಿರ ದುಂಡೆನ್ನಂಗೋ ತೇಂಗಲತ್ರೆನಕೆ ಉಂಡಲ್ಲಾ" "ನೀನೂ ಬಂದಿಯಾ? ಉರಿವಾಂಗ್ ಉಪ್ಪಾಡುವಕ್?" ಕೇಟತ್ ನೀಲಕ್ಕಿ. "ನೀಡ ಭಾವಂಡ ಕೊಣೆನೊಮ್ಮ ಅಡಕಂಡು. ಮಂಗಲ ಕೊಣೆನ ನೀಕಂದೇ ಎಣ್ಣಾನ ಪೋಯಿತ್ ನೆಲ್ಲೋಣೆ ಒಲಿಪಂಜಿ ಬಾಂದ್. ನಾಡ ತಕ್ಕಕೆಂತ ಬೆಲೆ?" ಕಾಂತಿ ಓರೆ ಕಣ್ಣಲ್ ಅಣ್ಣನ ನೋಟ್ಚಿ.

ವಾಸು ಒರ್ಗಳಿಗೆ ಮುಂಡತೇ ಇಂಜಂವೊ "ನೀಡನೆಕೇ, ನೀಡ ಮೈಮನೂ ನೀನಿಕ್ಕ ತುಳ್ಳಿಯಂಡಿಲ್ಲೆಯಾ? ಪೊಣ್ಣಾರ ಮೀದ ಪೊಣ್ಣಾ ಕೆಟ್ಟುವಂಜಿ ಮೋವಂಡ ಮನೆನ ಕುರುಕ್ಷೇತ್ರ ಮಾಡುವಕ್ ಪೊರಟಿತಿಲ್ಲೆಯಾ?"ಂದ್ ಕೇಟತ್. ನೀಲಕ್ಕಿ ಉಸಾರೇ ಬುಟ್ಟಾಲೆ. ಧಡಕ್ಕಂದ್ ಎದ್ದಿತ್ ಪೋಯಿರ್ತ್. ಅಣ್ಣನೂ ತಂಗೆಯೂ ಎಚ್ಚಕೋ ನೇರ ಪಳಮೆ ಪರಂದಂಡಿಂಜತ್. ಬೈಟೇತಾರ ಅಡಿಗ ಕಾಂತಿ ಮಾಡುವಲ್ಲಾ ಎಣ್ಣಿಯಂಡ್ ಪೋಯಿತ್ ಬುದ್ದಂಡತ್. ಅವಕ್ ಎಲ್ಲಾ ಗೇನ ಬಪ್ಪಕೂಡ್ಚಿ. ಎಣ್ಣಾನಾಂಗಲ್ಲ ಬಾಯಿ ತೊರಕತೆ ಮೂಕೆತ್ತರೆನಕೆ ಕೆಜ್ಜಂಡಿಂಜ ಮೈಮಳ ಗೇನಬಾತ್ ಪೂವಾಕಾಯಿರಂತ ಮಕ್ಕಡ ಕೈಲ್

ಪಣಿಕೆಯಿಚಿಟ್ಟುಂಡಿಂಜದ್ ಗೇನ ಬಾತ್. ಶಶಿ ಹಟ ಪುಡಿಚತೇಂಗಿ ನಾಡ ಕುಂಞಾಕ್ ಬಾಳಿಲ್ಲೆ. ಬೋಂಡಪ್ಪ, ಉಳ್ಳಮಕ್ಕ ಮದೀಂದ್ ಇಪ್ಪಕೆನ್ನ? ಕಾಣ್ಣನೋ ಮೂಡಿಯೋ ಏದಾಚೇಂಗೆನ್ನ? ಇದಲ್ ಅವ್ವಂಡ ತಪ್ಪಂತ? ಮಕ್ಕಡ ತಪ್ಪಂತ? ಇದೆಲ್ಲಾ ನೋಟಿಕಾಂಬಕ ನಾನ್ ಮೈಮಳ ಆತರ ಮಾಡ್ನದ್ ತಪ್ಪಲ್ಲಾ? ವಾಸುನ ನಾಳೆಯೇ ಅಯೆಚಿರುವಿ. ಪೋಯಿತ್ ಗಂಗುನ ಮಕ್ಕಳ ಕೂಟಿಯುಂಡ್ ಬಂದ್‌ರಡ್. ಅಯಿಂಗಡ ಕೂಡ ಕುಶೀಲಿಪ್ಪದ್ ಬುಟ್ಟಿತ್ ಇದೆಂತೋರ್ ಒಂಟಿಬಾಳ್? ಂದೆಲ್ಲಾ ಗೇನ ಮಾಡಿಯುಂಡಿಂಜವಕ್ ವರ್ಕ್ ಪತ್ತಿರಾತ್. ಕಾಂತಿ ಉಂಬಕ್ ಕಾಕುವಕ್ ಎದ್ ಬಾತ್. ಹಾಲ್‌ಲ್ ಶಶಿ ಅಳತಿತಿಂಜದ್ ಕಂಡತ್. ಭಾವನೂ ಮಚ್ಚಿಣನೂ ತಕ್ಕ ಪರಂದಂಡ್ ಅಳತಿತಿಂಜತ್. ಮೈಮೊ ಎದ್ದಿತ್ ಸೌಖ್ಯತುಳ್ಳಿರಾ ಮಾಂವೀಂದ್ ಕೇಟಂಡ್ ಕಾಲ್‌ಕ್ ಬಗ್ಗಿಚಿ. "ನಾನೇದ್ ಸಾಲ್‌ಲ್ ನೀಕ್ ಮಾಂವಿ? ನೀನಿಕ್ಕ ಪುದಿಯ ಬೆಂದೂರ್ತ ಕೆಟ್ಟುವಕ್ ಪೊರಟ್‌ತುಳ್ಳಿಯಲೋ. ಎನ್ನಂಗಪ್ಪಾ ನಾಡ ಮೋವ ನೀಕೆನ್ನ ಅನ್ಯಾಯ ಮಾಡಿತ್‌ಂದೊಮ್ಮ ಎಣ್ಣೆತಾ " ಅಲ್ಲಿಯೇ ಒರ್ ಕುರ್ಚಿಲ್ ಅಳತಂಡ್ ಕೇಟತ್. "ಹೂಂ ನೋಟಿ ಮಾಂವಿ, ನಾನಿಕ್ಕ ಇರುವದ್ ಏಕ್ರೆ ಪುದಿಯ ಆಸ್ತಿ ಏಡ್‌ತಂಡಿಯೆ. ಆ ಆಸ್ತಿಕ್ ಒರ್ ವಾರೀಸ್ದಾರ ಬೋಂಡವಾ? ಅದಂಗೇ ಈ ಏರ್ಪಾಡ್." "ಅಕ್ಕ ನಾಡ ಕುಂಞಾಕೂ ಅವಡ ಮಕ್ಕಕೂ ಕಣ್ಣ ಚರಟೆಯೆ ಗತಿಯೆನ್ನೋ" "ದಾರೆಣ್ಣೆಯೆ? ನಿಂಗಡ ಮೋವ ಬಂದಿತ್ ಇಲ್ಲತಾನೆಲ್ಲ ಕೆಮಿಕ್ ಉರ್‌ಪಿತಿಕ್ಕು ಕಾಂಬ. "ಎನ್ನ ಭಾವ? ಮಾಂವಿ ಎಂತದೆಲ್ಲೊ ಪರವೆಲ್ಲಾಂದ್" ಕೇಟತ್. "ಹಾಂ, ಎಲ್ಲಾಡೊ ಮನರ ದೋಸೆಯೂ ತೂತೇ ಬುಡಿ" ಎಣ್ಣೆ ಚಂವೊ. ಶಶಿ ಪುನಃ ಅವಳ ಕೆಣಕುವನೆಕೆ ಜೋಬ್‌ಲಿಂಜಿ ದಂಡ್ ಮೂಡಿಯಡ ಪೋಟೋ ಎಡ್‌ತಿತ್ ಕಾಟ್‌ಚಿ. "ಇದಲ್ ಒಬ್ಬಳ ಸೆಲೆಕ್ಟ್ ಮಾಡಿ ಭಾವ" ಎಣ್ಣೆತ್ ವಾಸುರ ಕೈಕ್ ಕೊಡ್‌ತತ್.

ವಾಸು ಅದನೊಮ್ಮೆ ಇದ್‌ನೊಮ್ಮೆ ಪರೀಕ್ಷೆ ಮಾಡುವನೆಕೆ ನೋಟ್‌ಚಿ. ಅಕ್ಕಣೆ ಕಾಂತಿಯೂ ದುಂಡ್ ತೂಕಿಯುಂಡ್ ಬಾತ್ "ನೀಕ್ ಕೊಣೆ ಉಂಡೇಂಗಿ ದಾರ್‌ನೇಂಗಿ ಕೈಚವೆನ್ನ. ಅದ್‌ನೊಮ್ಮೆ ಅವನಂತ ಕೇಕಂಡಿಯೆ?" ಪೋಟೋತನ್ ಬಲ್‌ಚಿ ಚಾಡ್‌ಚಿ. "ಅರಿಯತೇ ಮಂಗಲ ಕೈಚಂಡತ್‌ಂದ್ ದಾರೂ ದೂರುವಕಾಗಲ್ಲ. ಅದಂಗ್ ಮಾಂವಿ ಭೊತ್ತಿಯುಂಡುಳ್ಳನೆಕೆ ನಿಂಗಕ್ ಕಣ್ಣ ಚರಟೆ ಒಂದೂ ಪುಡಿಪಿಚಿಡುಲೆ. ನಿಂಗ ಬೋಂಡುವೇಂಗಿ ಇಲ್ಲಿಯೇ ಇಂಜವಲು. ನಾಡ

ಮನೆಲೂ ಇರಲು. ಖರ್ಚ್ ವೆಚ್ಚ ಎಲ್ಲಾ ನಾನಾ ನೋಟ್ಯವಿ" ಎಣ್ಣೆ ಚಿ. ಉಂಬನೇರ ಆಚೀಂದ್ ಕಾಂತಿ ಎಲ್ಲಾರನೋ ಎಪ್ಪಾಚಿ. ದಾರೂ ಸೆರಿಕ್ ಉಂಡಾಲೆ. "ಮೊಮ್ಮನೂ ನೀಡ ಬರಿಕೇ ತಿರಿಯಂಡತಾ?" ಸುಮಾರ್ ನೇರ ಕಯಿಂಜದೂ ಕೇಟತ್ ನೀಲಕ್ಕಿ. "ಹಾಂ, ಅವಡದೇ ವರಾತ. ಸುರುಸುರೂಲ್ ಅವಕೂ ಬಲ್ಯ ಕಾಯಿಷ ಇಂಜಿಲೆ. ಇಕ್ಕ ಒರ್ ತಿಂಗತಿಂಜಿ ಮನೆಲ್ ಇದೇ ತಕ್ಕಾ." "ಬೋಂಡ ಮೋನೆ. ಮೊಮ್ಮಂಡ ಕಾಲ್ಪುಡಿಚಿವಿ ನಾನಾ ಬಂದಿತ್, ಮಂಗಲತ್ ರ ವಿಷಯ ಮರಂದ್ ರ್. ಕಾಂತಿಕ್ ದ್ರೋಹ ಮಾಡತೆ" ನೀಲಕ್ಕಿ ಎಣ್ಣೆ ಚಿ. ಕೂಳಾನ ಪಾದಿ ಬೆಚ್ಚಿರುವಂಜಿ ಎದ್ದಾರ್ತವ ಕಾಂತಿ ವಡಿಯನೊಮ್ಮ, ಅವ್ವನೊಮ್ಮ ತೆರೆಕಣ್ಣಲ್ ನೋಟಿಯಂಡ್ ಕೂಳಾನ ಕೆದಕಿಯಂಡಿಂಜತ್.

"ಅದೆನ್ನನೆ ಮಾಂವಿ? ಇಕ್ಕ ನಿಂಗ ನಿಂಗಡ ಮೈಮಕ್ ಮಾಡ್ ನದ್ ದ್ರೋಹ ಅಲ್ಲಾ? ಮೈಮಕೇ ಒರ್ ಕಾನೂನ್, ಮೋವಕೋರ್ ಕಾನೂನಾ?" ಚೆಡಿಂಜಂಡೇ ಕೇಟತ್ ಶಶಿ. "ಇಲ್ಲೆಪ್ಪಾ ನಾಡದೇ ತಪ್ಪು. ನಾಕೂ ಇಕ್ಕ ಬೇರಾಚಿಟ್ಟತಾಪಕ ನಾಡ ತಪ್ಪು ಅರಿವಾಚಿ. ವಾಸುಕ್ ಮಂಗಲ ಕೈಪ ಗೇನ ಕೈಬುಟ್ಟಾಚಿ. ನಾಳೆಯೇ ಗಂಗುನ ಮಕ್ಕಳ ಕೂಟಿಯಂಡ್ ಬಂದ್ ರ್ ಮೋನೇಂದ್" ವಾಸುಕೆಣ್ಣೆ ಚಿ ನೀಲಕ್ಕಿ. "ಇದ್ ಸತ್ಯತ್ ತಕ್ಕಾ ಮಾಂವಿ"? ಕೇಟತ್ ಶಶಿ. "ನಾಡ ಕುಂಞಾರ ಆಣೆ ಸತ್ಯ" ಮೋವಡ ಮಂಡೆ ತ್ ಟಾಚಿ. "ನಾನಾ ನಂಬುಲೆ. ನಾಕ್ ಅಯಿಂಗಳೆಲ್ಲ ಇಲ್ಲಿ ಕಂಡತೇಂಗಿ ಮಾತ್ರ ನಂಬಿಕೆ ಬಪ್ಪೊ. ಎನ್ನೆಣ್ಣುವಿಯ ಭಾವ?" ಕೇಟತ್ ಶಶಿ. "ಎಲ್ಲಾಂಗೂ ನಾಳೆ ಪೊಲವಡ್. ಅಕ್ಕಣೆ ಮುಮ್ಮಿ ಬಡಿಮರ್ಂಜತೇಂಗಿಯೂ ಆಚಿ. " ತಂಗೇನ ನೋಟಿಯಂಡ್ ಕಣ್ಣೆ ಚಿಮ್ಮಾಚಿ. "ಎಲ್ಲಾಂಗೂ ಇರಡ್ ರ್ ಒರ್ ಬಾಡಿಗೇ ಮನೆ ನೋಟಿತ್ ಅಡ್ಬಾನ್ಸ್ ಕೊಡ್ತಿತ್ ಬಂದಿಯೆ" ಎಣ್ಣೆ ವದೂ ನೀಲಕ್ಕಿ. "ಅಪ್ಪಾ ಮೋನೆ, ನನ್ನ ಇಂಞೂ ಕೆಲಉರಿಚಿಡತೆ. ನಾನಾ ತಪ್ಪುನ ಒಪ್ಪಿಯಂಡನಲ್ಲಾ, ಪುನಃ ಬೋರೆ ಪೋಪೊ ತಕ್ಕಿನ್ನಂಗ್? ನಾಳೆ ನೀನ್ ಪೋಯಿಲೇಂಗಿ ನಾನೇ ಪೋಯಿತ್ ಗಂಗುನ ಮಕ್ಕಳ ಕೂಟಿಯಂಡ್ ಬಂದ್ ರ್ ರುವಿ. ತೀಂದತಲ್ಲಾ "ಎಲ್ಲಾಡೊ ಎದಿಕೆ ಮೊರಡುವೊ ಎನ್ನನೇಂದೆಣ್ಣಿಯಂಡ್ ಬಾತ್ ರೂಮ್ ಪೋಯಿತ್ ಮೂಡ್ ಕತ್ತಿಯಂಡ್ ಬಾತ್.

ಪಿತ್ಯಾಂದ್ ಪೊಲಾಕ ಬುದ್ಧಂಡಲ್ಲಿಂಜಿ ಏವಾಂಗಡೆ ಇಲ್ಲತೆ ಮೋವನ

ಪೊರಡಿ ಚಿಟ್ಟತ್ ನೀಲಕ್ಕಿ "ಎಳ್! ಎಳ್! ಎಟ್ಟಾಗಂಟೆರ ಬಸ್ಸಲ್ ಪೋಯಿರತೇಂಗಿ ಮಜ್ಜಣತಾರ ಊಟಕ್ ಇಲ್ಲಿಕ್ ಎತ್ತಿರಲೂಂದ್" ಅವಸರ ಮಾಡ್ಚಿ. ವಾಸು ಒಳಿಯೇ ತೆಳ್ಚಂಡತ್. "ಹ್ಂ, ಪೊಣ್ಣ್ ಚಾತಿಯೇ. ತಾಂಡದಂದೆಣ್ಣುವಕ ಎಚ್ಚಕ್ ಕರ್ಕರೆ, ಆಶೆ? ಅದೇ ಬೋರೆ ಯಿಂಗಡದಾಚೇಂಗಿ ಆ ಕರ್ಕರೆ ಎಲ್ಲಿ ಪೋಯಿರುವದೋ? ಮೋವಡ ಬದ್ಡಕ್ ಪಾಳಾಯಿರೂಂದೆಣ್ಣುವ ಪೋಡಿಕ್ ಮೈಮಳ ಕಾಕಿಯಂಡ್ಬಪ್ಪಕ್ ಗೇನಮಾಡ್ಚಿಲ್ಲಾ ಮಮ್ಮಿ. ಅದೂ ಒರ್ ನಲ್ಲದೇಂದ್ ಬೆರಿಯ ದಂಡೊಟ್ಟಿ ತಿಂಬಂಜಿ ಪೊರಟತ್. "ಕಾಂತಿ ಇಂಇಂಗೆ ನೀಡ ಮೂಡ್ ಪೊಲವಡ್. ಶಶಿ ಅಂತ ಪಾಳಾಕ್ಣ್ಣನೊಂದೂ ಅಲ್ಲ. ಬೆರಿಯ ಮಜ್ಜಣತಾರ ಅಡಿಗೇ ತೀತಾರನಾ" ಎಣ್ಣಿಯಂಡ್ ಬಾಲ್ಯಬಂದನೆಕೆ ಓಡಿಕಳಿಚಂಡ್ ಬಲ್ಯಗದ್ದಾಳವೇ ಮಾಡಿರ್ತ್. ಮಜ್ಜಣ ಉಂಬಕ್ ಮನೆದುಂಬ ಜನ. ಮಕ್ಕಡ ಸದ್ದೊಸದ್ದೊ. ಅಂದಾಕಣೆ ತಿರೀತೂ ನೋಟತಿಂಬ ಶ್ವೇತ ಕುಂಇಿನ ಕೊದಿಲ್ ಎಡ್ತಂಡತ್ ಮುದಾಕಿ. ಆ ಕುಂಇಿ ಎಲ್ಲಾರ್ಕಿಂಜಿ ಚಾಯಿಂಜತ್. ಕುಂಇಿರ ತೆಳಿ ಕಂಡಿತ್ ನಾನೆಂತೋರ್ ಪೊಣ್ಣ್. ಈ ಪುತ್ತುಳಿಗೊಂಬೆನ ದೂರಮಾಡಿರ್ತಿಂಜ ನಲ್ಲಾಂದ್ ತಾನೇ ಬಜ್ಜಂಡತ್. ಗಂಗುಕಂತೂ ಇದ್ ಸೊಪನವಾ, ನೇರಾಂದ್ ಬೇರ್ಚಿಡುವನೆಕಾಚಿ. ಅಂದೇ ಕಾಂತಿ ವಡಿಯಂಡ ಕೂಡ ಪೋಯಿರ್ತ್. "ಓಹ್!" ಕುಂದಾರೆನೆಕೆ ಬಂದದ್ ಮಂಜಿರೆನೆಕೆ ಕರೀಚಿಲ್ಲಾಂದ್" ಕುಶಿಪಟ್ಟತ್ ನೀಲಕ್ಕಿ. ಅಂದಿಂಜಿ ಆ ಮನೆಲ್ ಎಲ್ಲಾರ್ಕೂ ಒರ್ತರ ನೆಮ್ಮದಿ ಕ್ಕಟ್ಚಿ. ಗಂಗುರ ಬಾಳಾರ ಬಾಣತ್ ಇರ್ಟ್ ಕವುಂಜಂಡಿಂಜ ಕರ್ತಮೋಡ ಎಲ್ಲಾ ಚದರಿತ್ ಬೊಳ್ಳಿಮೋಡ ಪಾಂಜತ್.

ಮಕ್ಕಡ ಪರೀಕ್ಷೆ ಎಲ್ಲಾ ತೀಂದದೂ ಕಾಂತಿ ಸಂಸಾರ ಸಮೇತ ಬಾತ್ ತಾಮನೆಕ್. ಅವಕಿಕ್ಕ ಅಣ್ಣಂಡ ಸಂಸಾರ ಚಾಯಾನದ್ ಪೆರ್ತ ಕುಶಿ. ಎನ್ನೇಂಗಾಡ್ ನಂಗಡ ಪ್ರಯತ್ನಕ್ ಫಲಕ್ಟ್ಚಿಂಜೆಂದ್ ಕುಶಿಪಟ್ಟತ್. ನಿಧಾನತ್ ನೀಲಕ್ಕಿರ ಕೂಡ ಪರಂದತವ. "ಮಮ್ಮಿ, ಶಶಿ ಪುನಃ ಮಂಗಲ ಕೈಪಕ್ ಪೊರಟದೆಲ್ಲ ಬೊರಿ ಪೊಟ್ಟ್!" "ಎಂತ ನೀನೆಣ್ಣಿಯಂಡುಳ್ಳೋ ಕಾಂತಿ?" ಚೆನ್ನ ಸಂಶಯತ್ ಕೇಟತ್. "ಅಕ್ಕ ಮಮ್ಮಿ, ನೀಡ ಬುದ್ಧಿಕ್ ಮುಸ್ಕಾಟ್ಚಿಂಜ ಅಜ್ಜಾನ, ನೀಡ ಮನಸ್ಸಕ್ ಪೊದ್ದಿತಿಂಜ ಮಂಕ್ನ ನೀಕುವಕ್ ನಂಗ ಮೂಂದಾಳೂ ಕೂಡಿತ್ ಮಾಡ್ನ ನಾಟಕ ಇದ್! ನಾಕ್ ಒರೂ ರೋಗ ಇಲ್ಲೆ. ಮಕ್ಕ ಆಪುಲೇಂದೆಣ್ಣ್ನದೆಲ್ಲ

ಪೊಟ್ವಾ. ನೀಡ ಮನೆಕ್ ಲಕ್ಷ್ಮೀರೆನಕೆ ಬಂದ ವೈಮಳ ನೀನ್ ದೂರಮಾಡಿಟಿಯಲ್ಲಾ. ಅವಳ ಪುನಃ ಮನೆಮೊಟ್ವಾಪತ್ತಿಚಿಡಂಡು. ಅಣ್ಣಂಡ ಬದಾಕ್‌ನ ಚಾಯಿ ಮಾಡಂಡೂಂದೆಣ್ಣುವ ಒರೇ ಒರ್ ಉದ್ದೇಶತ್ ನಂಗ ಈ ತರ ವೇಷ ಕಟ್ಟಂಡಿಯಾಚಿ. ನಾಡ ಸ್ವಾರ್ಥಕಲ್ಲ, ಎಲ್ಲಾ ನಾಡ ತಾಮನೆಕಾಯ್. ಇದಲ್ ನಾಡ ತಪ್ಪುಂಡೇಂಗಣ್ಣಿರ್ ಮಮ್ಮಿ" ಅವ್ವಂಡ ದಂಡ್ ಕೈನೋ ಪುಡಿಚಂಡತ್. "ಇಲ್ಲೆ ಮೋಳೆ, ನೀಡದೊಂದೂ ತಪ್ಪಿಲ್ಲೆ, ನಾಡ ಕಣ್ಣತೊರಪಿಚಿಟ್ಟ ನೀನೇ ಬಲ್ವವ. ನಾನ್ ಬಯತ್‌ಲ್ ಪೆರಿಯವಳಾಚೇಂಗಿಯೂ ನಿಂಗಡ ಅರಿವಿಕೆ, ಬುದ್ಧಿರ ಎದಿಕೆ ನಾನ್ ಚೆರಿಯವಳೇ. ನಿಂಗಲೇ ನನ್ನ ಮಾಘ್ ಮಾಡಂಡು" ಎಣ್ಣಾನದ್ ಕೇಟಿತ್ ಕಾಂತಿಕ್ ಸಮಾಧಾನ ಆಚಿ. ಗಂಗುಕೂ ನಿಧಾನತೇ ಎಲ್ಲಾ ಗೊತ್ತಾಚಿ. "ಕಾಂತಿ, ನಿನ್ನ ಕೊಂಡ್ ನಾಕ್ ಈ ಮನೆಲೊರ್ ಸ್ಥಾನ ಕೊಟ್ಟಾಚಿ. ತಾಮನೆರ ಮೀದ ನೀಕುಳ್ಳ ಅಭಿಮಾನ ಎಲ್ಲಾ ಪೊಮ್ಮಕ್ಕಕೂ ಇರಡ್‌ಂದ್ ನಾನ್ ಬಯಂದವಿ" ಎಣ್ಣಿಯಂಡ್ ಕಾಂತಿನ ತಬ್ಬಿಯಂಡತ್.

(ತೀಂದತ್)

## ಮೋವಡ ಆಶೆ

"ಸುಮೀ" ವಡಿಯ ಕಾಕುವಕ ಒಮ್ಮ ತಿರೀತ್ ನೋಟ್‌ಚಿ ಸುಮಿತ. ಆಚೇಂಗಿ ಅವಂಗ್ ಪೊಣ್ಣಾರ ಪ್ರೀತಿರ ಮೂಡ್ ಕಂಡ್‌ಲೆ. ಮೊರಟಿತ್ ಕರೆಕೆಟ್ವಾನ ಮೂಡ್ ಕಂಡಿತ್ ಆಶ್ಚರ್ಯ ಆಚಂವಂಗ್. "ಅರೆ ಸುಮೀ ಮರಟಂಡಿಂಜಿಯಾ?" ಪಕ್ಕ ಪೋಯಿತ್ ಅವಡ ಗದ್ದಕ್ ಕೈ ಇಟ್ಟಿತ್ ಮೂಡ್‌ನ ಕೊಡಿಕೆಡ್‌ತಿತ್ ಕೇಟತ್ "ಇಲ್ಲೆ. ನಾನೆನ್ನಂಗ್ ಮೊರಡಡ್?" ಎಣ್ಣವಳೇ ಅವಂಡ ಕೈನ ನೂಕಿ ಇಟ್ಬರುವಂಜಿ ಪೊರಮೆ ಓಡಿರ್‌ತ್. ಒರ್‌ಗಳಿಗೆ ಕಯಿಂಜದೂ ಒಳ್‌ಕ್ ಬಾತ್. ಅಚ್ಚಕ್ ಬೆರಿಯ ಮೂಡ್‌ಕತ್ತಿತ್ ತೇಟಿರುವಂಜಿ ಸತೀಶ್‌ರ ಪಕ್ಕ ಬಾತ್. ಅಕ್ಕಾಕಣೆಕೂ ಅವೊ ಕಲ್ಲರೆನಕೆ ನಿಂದಿತೇ ಇಂಜತ್. "ಎನ್ನಾಚಿ ಇವಕ್? ಇಕ್ಕಾಕಣೆ ಒರ್ ದಿನೇಂಗಿ ಮೊರಟಿತೋ, ಬೇಚಾರತೋ ಕಂಡಿತಿಲ್ಲೆ. ದಾರ್‌ಕೇಂಗಿ ಸೌಖ್ಯಿಲ್ಲತಾಚಾ? ಅಪ್ಪಂಗೋ, ಅಪ್ಪಂಗೋ ! ಗೇನ ಮಾಡಿಯಂಡೇ ನಿಂದಿತಿಂಜ ವಡಿಯಂಡ ಬರಿಲ್ ನಿಂದತ್. ಅವಂಡ ಕೈಲ್ ಒರ್ ಪ್ಲಾಸ್ಟಿಕ್ ಕವರಿಂಜಾನೋ ಬೆಕ್ಕತೆ ಕೈಲೇ ಪುಡಿಚಂಡಿಂಜತ್. ಆ ಕವರ್‌ನ ಕೇಟಂಡ್ ಬೆಪ್ಪಕ್ ಪೋಪಕ ಅದ್ ಚೆನ್ನ ಭಾರ ಇಂಜನೆಕೆ ಕಂಡತ್. ಆಚೇಂಗಿ ಒಳ್‌ಲೆಂತ ಉಂಡ್‌ಂದ್ ನೋಟುವಕೂ ಪೋಯಿಲೆ ಅವ. ಸತೀಶ್ ಅಲ್ಲಿಯೇ ಇಂಜ ಕುರ್ಚಿಲ್ ಅಳತತ್. ಸುಮಿ ಫ್ಯಾನ್ ಆನ್ ಮಾಡ್‌ಚಿ. ಅವಂಡ ತಡಿ ತಂಪಾಚೇಂಗಿಯೂ ಮನಸ್ಸ್ ತಂಪಾಯಿಲೆ. ಬೆರಿಯ ಪೋಯಿತ್ ಕುಡಿಪಕ್ ಎಡ್ ತಂಡ್ ಬಾತ್ ಸುಮಿ ತಾನೂ ಅಳತತ್. "ಕಾಫಿ ಕುಡಿ ಸತೀ, ತಣ್‌ಂಜೀ ಪೋಪಲ್ಲಾ" ತಾನೇ ಎಚ್ಚರ ಮಾಡ್‌ಚಿ ಎಲ್ಲಿಯೋ ಪೋಯಿರ್‌ತಿಂಜತ್ ಅವಂಡ ಗೇನ!



ಮೂಂದೇ ಗುಡ್‌ಕಾಕ್ ಕಪ್ಪು ಖಾಲಿಯಾಗಿ. ಬಾಯಿ ಮಾತ್ರ ತೊಂದರಲೆ. "ಎನ್ನಂಗ್ ಸತೀ ಮುಂಡತೆ ಅಳಾತ್‌ಟಿಯಾ?" "ಹ್ಲಾಂ, ಅದೇ ನೀನೆನ್ನಂಗ್ ಮೊರಟಂಡಿಂಜಿಯಂದ್?" "ಇಲ್ಲೆ, ನಾನ್ ಮೊರಟ್‌ತಿಲ್ಲೆ. ಕಣ್ಣೆಕೆಂತದೋ ಧೂಳ್ ಬುದ್ದತ್ ಕಾಂಬ. ಅದಂಗೇ ಉದ್ದೀ ಉದ್ದೀ....." ಚೋಂದ್ ಪೋಯಿತಿಂಜ ಕಣ್ಣೆನ ಪುನಃ ಉದ್ದಿಯಂಡತ್. "ಪೊಟ್ಪ್ ಪರೆಯತೆ ಸುಮೀ, ಇಕ್ಕಲೂ ನೀಡ ಕಣ್ಣೆಲ್ ಪೊರಮೆ ಧುಮುಕುವಕ್ ತಯಾರಾಯಿತುಂಡ್ ಕಣ್ಣೇರ್. ನಾಡ ಕೂಡೆಯೂ ಎಣ್ಣುವಕಯ್ಯತ ದುಃಖ ನಿಕೇಂತದುಳ್ಳೊ?" ಓ, ನಾಡ ಮರೆಪುಕ್ ತಿತ್ತ ಪುಡಿಕ್ಕಡ್" ಎಣ್ಣಿಯಂಡ್ ಮಾಡಿತ್ ಬೆಚ್ಚಿತಿಂಜ ತಿಂಡಿನ ಚೆರಿಯ ತಟ್ಟೆಕ್‌ಟ್ಟಿತ್ ಎಡ್‌ತ ಬಂದಿತ್ ಕೊಡ್‌ತತ್. "ಉಹುಂ, ನಾಕ್ ತಿಂಡಿ ಬೋಂಡ. ನೀನ್ ಮೊರಟಂಡಿಂಜಾಂಗ್ ಕಾರಣ ಎಣ್ಣಿಚೇಂಗಿ ಮಾತ್ರ ತಿಂಬೊ "ಎಣ್ಣಿರತ್ ಸತೀಶ್. ಸುಮಿತ ಕುರ್ಚಿಕ್ ತಾಂಗ್‌ಚಿ. ಅಂದ್ ಮಜ್ಜಣ ಪಕ್ಕತ ಮನೆರ ಜಾನಕಿ ಎಣ್ಣೆನ ತಕ್ಕ ಅವಡ ಕೆಮಿಕ್ ಬಡ್‌ಚನೆಕಾಚಿ. ಬೇರತೇ ಅಳತವಳ ಅಲ್ಲಿಯೇ ಬುಟ್ಟಾರುವಂಜಿ ಸತೀಶ್ ಮೆಲ್ಲೆ ಎದ್ದಿತ್ ಪೊರಮೆ ಕಡಂದ್‌ರಾತ್. ತಿಂಡಿ ಅಲ್ಲಿಯೇ ಆರಿತ್ ಕೋಡ್‌ಚಿ.

\* \* \*

ಅಂದ್ ಪೊಲಾಕ ಸುಮತಿ ಪಣಿ ಎಲ್ಲ ತೀತ್‌ರುವಂಜಿ ಮನೆರ ಎದಿಕೆ ಪಟ್ಟಿಕ್ ಬಾತ್. ಪಕ್ಕತ್ ಮನೆರ ಜಾನಕಿ ತಾಂಡ ದಂಡ್ ಮೂಡಿಮಕ್ಕಳ ಪೊರಡಿಚಿಟ್ಟುಂಡ್ ಎಲ್ಲಿಕೋ ಪೋಪಕ್ ಪೊರಟಿತಿಂಜತ್. ದಂಡೂ ಚಾಯಿಕರ್ತಿ ಮಕ್ಕ ರೀಟಾ, ನೀತಾ. ಅಯಿಂಗಡ ಪಕ್ಕ ಪೋಯಿತ್ ತಕ್ಕ ಪರೆಚಿಟ್ಟತ್ ಸುಮೀ. ರೀಟಂಡ ಕೈ ಪುಡಿಚಂಡ್ "ಎಲ್ಲಿಕ್ ಪೊರಟಿಯೆ ರೀಟಾ"ಂದ್ ಕೇಟತ್. "ಅವ್ವಯ್ಯಂಡ ಮನೆಕ್"ಂದೆಣ್ಣಿಚಿ ಕುಂಞಿ. "ನಾನೂ ಬಕ್ಕಡಾಂದ್" ಕೇಟಂಡ್ ಅವಡ ದವಡನೊಮ್ಮ ಮೆಲ್ಲೆತ್‌ಟಾಚಿ ಆಶೆಲ್. ಅಕ್ಕಣೆ ಜಾನಕಿ "ನೇರಾಯಿಪೋಚಿ. ಬೆರಿಯ ಬಾರೀಂ"ದೆಣ್ಣಿಯಂಡ್ ಅವಸರ ಮಾಡಿಯಂಡ್ ಮಕ್ಕಳ ಈತಂಡೇ ಪೋಯಿರಾತ್. ಅವಡ ಇರಾಟ್ ಕಡ್‌ಚ ಮೂಡ್ ಸುಮಿತಂಗ್ ಕಂಡಲೆ. ಮಕ್ಕ ಪೋಪಾನೇ ನೋಟಿಯಂಡ್ "ಎಂತ ಸ್ವೀಟ್ ಮಕ್ಕಾಂದ್ ತಾಂಡೊಟ್ಟಾಕೇ ಎಣ್ಣಿಯಂಡತ್. ಮಜ್ಜಣಾಪಕ ಕೆಲಸಕರ್ತಿ ಚೆನ್ನಿ ಓಡಿಯಂಡ್ ಬಾತ್. "ಜಾನಕಮ್ಮಂಡ ಮೋವಕ್ ಎಂತೋ ಆಯಿತ್ ಆಸ್ಪತ್ರೆಲ್ ಅಡ್ಡಿಟ್

ಮಾಡಿತ್‌ಲೋ" ಎಣ್ಣೆಚಿ ಒರೇ ಉಸ್‌ರ್‌ಲ್ ಎಂತಾಯೇಂದ್ ಕೇಪಕ ನಾಕ್ ಸೆರಿಕ್ ಗೊತ್ತಿಲ್ಲೆ" ಎಣ್ಣೆಚವ. ಅಯ್ಯೋ ಶಿವನೇ ಪೊಲಾಕ ಅಚ್ಚಕ್ ಚಾಯಿತೆ ನಾಡ ಕೂಡ ತಕ್ಕ್ ಪರಂದಂಡ್ ತೆಳುಚಂಡ್ ಪೋನ ಕುಂಞಿಕ್ ಎನ್ನಾಯಿಟ? ದಾರ್‌ನ ಅರಿವೋಂದೆಣ್ಣೆಯಂಡ್ ಜಾನಕಿರ ಮನೆಕೇ ಓಡ್‌ಚಿ. ಜಾನಕಿರ ಪೆರಿಯ ಮೋಂವೊ ಒಬ್ಬನೇ ಮನೆಲಿಂಜತ್. ಅವನ ಕೇಪಕ " ರೀಟಾ ಮಾಮಂಡ ಮೋವಡ ಕೂಡ್ ಮಾರ್ಕೆಟ್‌ಕ್ ಪೋಯಂಡಿಪ್ಪಕ ಒರ್ ಕಾರ್ ಬಂದಿತ್ ಕುಟ್ಟಿರ್‌ತ್‌ಲೋ, ಕಾಲ್ ಪೊಟ್ಟಿಪೋಯಿತ್‌ಲೋ, ಮಮ್ಮಿ ಅಲ್ಲಿಯೇ ಉಂಡ್‌ಂದೆಣ್ಣೆಚಿಂವೊ. ಸುಮಿ ಕಲ್ಲೆನಕೆ ನಿಂದ್‌ರ್‌ತ್.

ಸುಮಾರ್ ಮೂಂದ್ ಗಂಟೆಕ್ ಜಾನಕಿ ಬಂದದ್ ನೋಟಿಯಂಡ್ ಸುಮೀ ಅವಳ ತಕ್ಕ್‌ಪರೆಚಿಡುವಕ್ ಪೋಚಿ. ಅವಳ ಕಂಡದೇ ಜಾನಕಿರ ಬಾಯಿಲಿಂಜಿ ಪಟಪಟಾಂದ್ ತಕ್ಕ್ ಉದ್‌ರ್‌ಚಿ. "ಅಯ್ಯೋ, ಅಯ್ಯೋ, ನೀನ್ ಏದ್ ಗಳಿಗಲ್ ನಾಡ ಕುಂಞಿನ್ ತಾಂಡಿಟಿಯೋ, ನೀಡ ಕೈ ಸೇದಿಪೋಪಕ್, ನೀನ್ ಮಕ್ಕಳಿಲ್ಲತ ಗೊಡ್ಡಿ. ನಿನ್ನಂತಯಿಂಗಡ ಕಣ್ಣೂ ಪಾಳೇ. ನೀಡ ಕಣ್ಣುಪಟ್ಟಾತೇ ನಾಡ ಕುಂಞಿ ಕನ್ನನೆ ಆಚಿ " ಎಣ್ಣೆಯಂಡ್ ತಾಂಡ ಕುಂಞಿರ ನೊಂಬಲತ್‌ನೋ ಮರಂದಿತ್ ಸುಮಿಕ್ ಶಾಪ ಇಟ್ಟತ್. "ಇಕ್ಕೆನ್ನಂಗ್ ಬಂದಿಯಾ ಇಲ್ಲಿಕ್? ದಾಟಿಲ್ಲಿಂಜಿ" ಎಣ್ಣೆವಂಜ ಅವಡ ಮೂಡ್‌ಕೇ ಧಡ್‌ಂದ್ ಪಡಿ ಇಟ್ಪರ್‌ತ್. ಸುಮಿಕ್ ಎಂತ ಎಣ್ಣೆಂಡೊಂದೇ ಗೊತ್ತಾಕತೆ ನನ್ನಕೊಂಡ್ ರೀಟಿಂಗ್ ಅನ್ನನೆ ಆಚಾಂದ್ ಬೇರ್‌ಚಿಟ್ಟಂಡೇ ಮನೆಕ್ ಬಾತ್. ಜಾನಕಿಕ್ ಅವಡ ಮೀದ ದ್ವೇಷಕಂತೂ ಕಾರಣ ಇಲ್ಲೆ. ಎಣ್ಣೆವಂತ ಸ್ನೇಹವೂ ಇಂಜಿಲೆ. ಅವ ಆ ಮನೆಕ್ ಬಾಡಿಗಕ್ ಬಂದಿತ್ ನಾಲ್‌ತಿಂಗ ಆಯಿತಿಂಜತ್ ಅಚ್ಚಿಕೇ. ಮನೆಕ್ ಬಂದವಳೇ ಕೋಂಬರೆಕ್ ಓಡಿ ಪೋಯಿತ್ ಕಟ್ಪಲ್ ಕವುಂಜಿ ಬುದ್ಧಂಡ್ ಮೊರಟತ್. ಜಾನಕಿರ ತಕ್ಕೇ ಅವಕ್ ಕೆಮಿಕ್ ಬಡ್‌ಚನೆಕೆ ಆಯಂಡಿಂಜತ್. "ನಾನ್ ಗೊಡ್ಡಿ, ಗೊಡ್ಡಿರ ಕಣ್ಣು ನಲ್ಲದಲ್ಲ, ನಾಡ ಕಣ್ಣು ಪಟ್ಟಾಂಗೇ ಆ ಕುಂಞಿಕ್ ಆಕ್ಸಿಡೆಂಟ್ ಆಯೆ. ಇದೇ ತಕ್ಕ್ ಆ ಕೋಂಬರೆರ ಮೂಲೆ ಮೂಲೆಲಿಂಜಿ ಕೇಟನೆಕಾಚಿ ಅವಕ್, ಕೆಮಿನ ಅಂವುಂಕಿ ಪೊತ್ತಿಯಂಡತ್. ಮಂಗಲ ಕೈಂಜಿತ್ ಏಳುಕಾಲತ್ ಇಂತೋರ್ ತಕ್ಕ್ ಈ ಕೆಮಿಕ್ ಕೇಟ್‌ತಿಂಜಿಲೆ. ಅಯ್ಯೋ ನಾಡ ಕೆಮಿ ಕಿವುಡಾಯಿರ್‌ತುಂಡೇಂಗಿ ಇಂತ ಶಾಪ ಕೇಕಂಡಿಂಜಿಲೇಂದ್ ಕೂತ್‌ಟ್ಟಂಡ್ ಮೊರಟತ್ ಮೊರಟತ್ ಸುಸ್ತಾಚಿ.

ಎಚ್ಚಕ್ ನೇರಾಯಿತೋ! ಕೆಲವೈಪೂ ಅಡಂಗಿ ಪೋಯಿತಿಂಜತ್. ಅನ್ನನೇ ಎದ್ದಿತ್ ಗಂಟೆ ನೋಟ್‌ಚಿ. ಗಂಟೆ ಅಂಜಾಪಕಾಯಿತ್! ಒರ್‌ಗಳಿಗಲ್ ವಡಿಯ ಬಂದ್‌ರುವಾಂದ್ ಅಡಿಗೇ ಮನೆಕ್ ಪೋಚಿ. ಚೆನ್ನ ಉಪ್ಪಿಟ್ ಮಾಡಿತ್ ಕಾಫಿ ಮಾಡ್‌ಚಿ. ಮುಚ್ಚಿ ಬೆಚ್ಚಿತ್ ಹಾಲಾಕ್ ಬಾತ್. ಸೋಫತ್ ತಾಂಗಿ ಅಳತತ್ ಕಣ್ಣಾಕ್ ಕೈ ಪೊತ್ತಿಯಂಡ್. ಬೋಂಡಾಂದೆಣ್ಣಿ ಚೇಂಗಿ ಕೇಪಾ ಕಣ್ಣೇರ್? ತಾನಾಯಿತೇ ಪರಿವಕೂಡ್‌ಚಿ. ಅದ್‌ನ ತೋಟುವಕೂ ಪೋಯಿಲೆ. ಅದ್ ಅಲ್ಪಿಯೇ ಒಣಂಗಿತ್ ಕರೆಪುಡಿಚತ್. ಅಕ್ಕಲೇ ಸತೀಶ್‌ರ ತೇನ್‌ಸ್ವರ ಅವಕ್ ಕೇಟಿಯೆ "ಸುಮೀ".

\* \* \*

'ಛಟ್ಪ್' ಸದ್‌ರ ಕೂಡೆ ಲೈಟ್ ಕಣ್ಣಾಕ್ ಕುಕ್ಕುವಕ ಸುಮಿಕ್ ಎಚ್ಚರಾಚಿ. ನಾನ್ ಇಚ್ಚಕ್ ನೇರ ವರೀರ್‌ತಿಂಜನಾಂದ್ ಕಣ್ಣಾನ್ ಉದ್ದುವಕೂಡ್‌ಚಿ. ಕಣ್ಣಾ ಚಾಯಿಲ್ ತೊರಂದಿತ್ ನೋಟುವಕ ಎದಿಕೆ ಸತೀಶ್ ನಿಂದಿತಿಂಜದ್ ಕಂಡತ್. "ಎಂತ ಸುಮೀ, ಅಕ್ಕಲೆ ನಾನ್ ಪೋಪಕ ಅಳತಂಡಿಂಜವ ಇಂಞೂ ಇನ್ನನೇ ಅಳತಿತುಳ್ಳಿಯಾ? ವರೀತಿಂಜಿಯಾ? ನೀನ್ ಇನ್ನನೆಲ್ಲಾ ಅಳತಿತುಪ್ಪವಳೇ ಅಲ್ಲ. ಎನ್ನಾಚಿ ನೀಕ್ ಎಣ್ಣ್ ಸುಮೀ" ಅವಡ ನಿಪ್ಪು ಪುಡ್‌ಚಿತ್ ಕುಲ್‌ಕಿತ್ ಕೇಟಿತ್. ಅವಡ ಮೂಡ್‌ಲ್ ಗಾಬರಿ, ಪೋಡಿ ಎಂತಂದ್ ಗೊತ್ತಾಯಿಲೆ. ಅಂವಂಗ್ "ಮನೆಕ್ ದಾರೇಂಗಿ ಬಂದಿತಿಂಜತಾ? ನೀಕ್ ದಾರೇಂಗಿ ಎನ್ನೇಂಗಿ ಎಣ್ಣಾಚಾ? ಅಲ್ಲ ಮನೆಕ್ ಕಳ್ಳ ನುಗ್ಗಿತ್ ಎಲ್ಲಾನೋ ಬಾತಿಯಂಡ್ ಪೋಯಿರ್‌ತಾ? ಪೋಚೇಂಗಿ ಪೋಡ್. ನಾನುಳ್ಳೊ ಕಲ್ಲಗುಂಡ್‌ರೆನಕೆ ನಿನ್ನ ಚಾಕುವಕ್. ಬೊತ್ತತೆ ಎನ್ನಾಚಿ ಎಣ್ಣ್" ಅಂವಂಗ್ ಅವಡ ಮೀದ ಚೆಡಿಯಂತೂ ಬಂದ್‌ಲೆ. "ಸುಮೀ" ಆ ತೇನ್‌ಸ್ವರ ಕೇಟಿತಾಪಕ ಅವಕ್ ತಡ್‌ಪಕಯ್ಯತಾಚಿ, ದುಃಖ ಉಕ್ಕಿತ್ ಬಂದ್‌ರಾತ್; "ಇದೆಂತೋರ್ ಅವಸ್ತೆ? ನಾಡ ಎಲ್ಲಾ ಪ್ರಶ್ನೆಕೂ ನೀಡ ಕಣ್ಣೇರ್ ಉತ್ತರ. ನಾನೆನ್ನೇಂಗಿ ತಪ್ಪು ಮಾಡ್‌ನನಾ?" ಇಲ್ಲೇಂದೆಣ್ಣಿ ವನೆಕೆ ಮಂಡೆ ಉರ್‌ಟ್‌ಚಿ. "ಇಂಞಿಂತ ಎಣ್ಣ್?" ಅಕ್ಕಲೇ ನಿನ್ನ ನೋಟಿತ್ ಬೇಜಾರತ್ ಪೊರವು ಪೋನಂವೊ ಏಲೇಲೋ ಸುತ್ತಿತ್ ಇಕ್ಕ ಬಂದಿಯೆ. ಇಲ್ಲಿ ನೋಟುವಕ....? ಏಳ್, ಇನ್ನನೆ ಅಳಕತೆ, ನೀನ್ ಕಾರಣ ಎಂತಂದ್ ನೀನಾಯಿತೇ ಎಣ್ಣ್‌ವಲ್ಲಿ ಕೆತ್ತಣೆ ನಾನೊಂದೂ ಕೇಪುಲೆ. ಪೋ ಮೂಡ್ ಕತ್ತಿಯಂಡ್ ಬಾ.

ಪೊರಮೆ ತಿರ್‌ಗಾಡಿಯಂಡ್ ಬಕ್ಕನಾ." ವರಾತ ಮಾಡಿತ್ ಪೊರಡಿಚಿಟ್ಟತ್.  
ಮನಸ್ಸಿಲ್ಲತ ಮನಸ್ಸಲೇ ಪೊರಟತ್ ಸುಮೀ.

ಆಲೆಕಾಲೆ ಸುತ್ತಿತ್ ಪಕ್ಕತಿಂಜ ದೇವಸ್ಥಾನಕ್ ಪೋಚಿ. ದೇವಳ ಕಂಡತೇಂಗಿ  
ಮನಸ್ಸ ಚೆನ್ನ ತೂವೆ ಆಕೂಂದೆಣ್ಣಾವ ಗೇನತ್ ಪ್ರದಕ್ಷಿಣೆ ಬಂದಿತ್ ದೇವಡ  
ಭಂಡಾರತ್ ಕಾಣಿಕೆ ಇಡ್‌ಚಿಟ್ಟತ್ ಅವಡ ಕೈಲ್. ಬಯ್ಯಕ್ ಬಪ್ಪಕ್ ಪೊರಡುವಕ  
ಜಾನಕಿರ ವಡಿಯ ಸುರೇಶ್‌ನ ಕಂಡತ್. ಅವಂಡ ಮೂಡಲ್ ದುಃಖ ಎದ್ದ್  
ಕಾಂಬಾಂಜತ್. ಅಪ್ಪರಿಪ್ಪರ ತಕ್ಕ ಪರಂದಿತಾನದೂ "ನಾನ್ ಮೋವಡ ಪೆದತ್  
ಅರ್ಚನೆ ಮಾಡಿಚಿಡುವಕ್ ಬಂದಿಯೇ, ಅವಕ್ ಬೆರಿಯ ಗುಣ ಆಕಡ್‌ಂದ್  
ದೇವಳ ಕೇಟವನಾಂದ್ ಬಂದ. ಕಷ್ಟಬಪ್ಪಕ ದೇವ ಅಲ್ಲತೆ ಇಂಞ ದಾರ್ ನಂಗಡ  
ಕೈಪುಡಿಪೊ" ಸುರೇಶಂಡ ತಕ್ಕ ಕೇಟಿತ್ ಸತೀಶ್ ಬೆಪ್ಪಂಡೆನಕೆ ಅವಂಡ  
ಮೂಡ್‌ನೇ ನೋಟಿಯಂಡ್ ಕೇಟಿತ್ "ದಾರ್‌ಕ್ ಎಂತಾಯೆ? ಪೆರ್ತ  
ಬೇಚಾರಿತುಳ್ಳಿರಲ್ಲಾ ಸುರೇಶ್‌ಣ್?" ಅವೊ ಕಣ್ಣ್ ತೇಟಿಯಂಡ್ ನಡಂದ ಸಂಗತಿ  
ಎಣ್ಣ್‌ಚಿ. ನಾಡ ಅಚ್ಚಕ್ ಚಾಯಿಕರ್ತಿ ಕುಂಞಿಕ್ ದಾಡ ಕಣ್ಣ್ ಪಟ್ಟಾರ್‌ತೋ  
ನೋಟಿ, ಇಕ್ಕ ಕಾಲ್‌ಮುರ್‌ಚಂಡ್ ಆಸ್ತೆಲ್ ಬುದ್ದಂಡಿತ್, ನಾನ್ ಬಪ್ಪಿ,  
ಬೆರಿಯಪೋಕಂಡು" ಎಣ್ಣಿಯಂಡ್ ದುಡುದುಡೂಂದ್ ಒಳ್‌ಕ್ ಪೋಚಿ. ಅವೊ  
ಅಪ್ಪರ ಪೋನದೂ ಚೆನ್ನ ದೂರತ್ ನಿಂದಂಡ್ ತಕ್ಕ ಕೇಟಂಡಿಂಜ ಸುಮಿ ತಿತ್  
ಚೊಟ್‌ನವಡ ಮಾದಾರಿ ಸತೀಶ್‌ನ ಬಲ್‌ಚಂಡೇ ಬೆರಿಯ ರಸ್ತೆಕ್ ಬಂದಾರ್‌ತ್.  
ಒರೂ ತಕ್ಕ ಪರೆಯತೆ ಕೂಳಿಪೊದ್ವಾನವಳನೆಕೆ ದಾಪುಕಾಲ್ ಇಟ್ಟಿಂಡ್ ಮನೆಕತ್ತಟಿ  
ನಡ್‌ಪಕೂಡ್‌ಚಿ. ಮಿಂಞ ಬಯ್ಯ ಒಂದೂ ಅರಿಯತೆ ಸತೀಶನೂ ಅವಡ ಬಯ್ಯ  
ನಡಂದತ್. ಮನೆಕ್ ಎತ್ತನದೇ ಅವ ಓಡಿ ಪೋಯಿತ್ ಕಟ್ಲಲ್ ಧೊಪ್ಪಂದ್  
ಬುದ್ದತ್. ನೆತ್ತಿಲ್ ಬೆವರ್ ಮುತ್‌ಮಣಿರೆನಕೆ ಪೊರಬುದ್ದಿತಿಂಜತ್. ಸತೀಶ್  
ಅವಳ ಸೆರಿಕ್ ಬುದ್ಧವಿಚಿಡುವಂಜಿ ಪಕ್ಕತಿಂಜ ಡಾಕ್ಟರ್‌ರ ಶಾಪ್‌ಕ್ ಓಡ್‌ಚಿ.

ಡಾಕ್ಟರ್ ಪರಿಕ್ಕೆ ಮಾಡಿತ್ ಗಾಬರಿಪಡುವಂತದೊಂದೂ ಇಲ್ಲೆ. ಅಯಿಂಗ  
ಮನಸ್ಸಕ್ ಎಂತಾನೋ ಪೆರ್ತ ಬಲ್‌ಂಬನೆ ಎಡ್‌ತಂಡಿತ್. ಈ ಪಿಲ್ಸ್  
ಎಡ್‌ತಬಂದಿತ್ ಕೊಡಿ ಚಾಯಾಪ, ನಾನ್ ನಾಳೆ ಬಂದಿತ್ ನೋಟುವಿ ಎಣ್ಣಿತ್  
ಪ್ರಿಸ್ತಿಯನ್ ಎಳ್‌ದಿತ್ ಕೊಡ್‌ತತ್. ಡಾಕ್ಟರ್‌ರ ಕೂಡೇ ಪೋಯಿತ್ ಪಿಲ್ಸ್

ಎಡ್‌ತಬಂದಿತ್ ಅವ ಬೋಂಡಾಂದ್ ಬಡ್‌ಚಂಡತೇಂಗಿಯೂ ಕೇಕತ್ ತಿಂಬಿಚಿಟ್ಟಿತ್. ಪಾಲ್ ಬಿಸಿಮಾಡುವಕ್ ಪೋನವಂಗೆ ಮಜ್ಜಣ ಮಾಡಿ ಬೆಚ್ಚ ಅಡಿಗೆ ಅನ್ನನೇ ಅನಕತೆ ಮುಚ್ಚಿಬೆಚ್ಚದ್ ಕಂಡತ್. ಇವ ಮಜ್ಜಣ ಉಂಡಿತಿಲ್ಲೆಂದ್ ಗೊತ್ತಾಚಿ. ಸದ್ಯಕ್ ಪಾಲ್‌ಕುಡಿಕಡ್‌ಂದ್ ಪಾಲ್ ಬಿಸಿ ಮಾಡಿಯಂಡ್ ಬಾತ್. ಅದ್‌ನೋ ಬೋಂಡಾಂದೆಣ್ಣಿಯಂಡೇ ಕಷ್ಟತ್ ಕುಡಿಚತ್. "ಎನ್ನಂಗ್ ಮಜ್ಜಣ ಉಂಡಿತಿಲ್ಲೆ ಸುಮೀ?" ವಡಿಯಂಡ ಪಶ್ಚೆಕ್ ಮೂಡ್‌ಲ್ ಗಾಬರಿ. ಗೋಡೆಕತ್ತಟಿ ಮೂಡ್‌ಟ್ಟಿಂಡ್ ಬುದ್ದಂಡತ್. ಸತೀಶ್ ಅಲ್ಲಿಯೇ ಕುರ್ಚಿ ಬೆಚ್ಚಂಡ್ ಅಳತತ್. ಸುರೇಶ್ ಎಣ್ಣೆನದ್ ಗೇನಬಾತ್. ಇವ ಎನ್ನಂಗ್ ದೇವಸ್ಥಾನತಿಂಜಿ ಪುಚ್ಚಿರೆನಕೆ ಓಡಿ ಬಂದ್? ರೀಟಿಂಗ್ ಆಕ್ಸಿಡೆಂಟ್ ಆಯ ಎಲ್ಲಿ? ಇವಕೂ ಅದಂಗೂ ಎನ್ನ ಸಂಬಂಧ್? ಗೇನ ಎಲ್ಲಿಂಜಿ ಎಲ್ಲಿಕೋ ಎತ್ತಿತಾಕಣೆ ಸುಮಿ ಬುದ್ದಂಡಲ್ಲಿಯೇ ಪೊಡತ್‌ಕಳಿಚತ್.

ಕಣ್ಣ್ ತೊರಂದಿತ್ ನೋಟುವಕ ವಡಿಯ ಅಲ್ಲಿಯೇ ಅಳತಿಂಜದ್ ಕಂಡತ್. ಮೆಲ್ಲೆ ಎದ್ದಿತ್ ಅಳತತ್. ಮಂಡೆಭಾರ ಕಮ್ಮಿ ಆನನೆಕೆ ಆಚಿ. ಎದ್ದಿತ್ ಅಡಿಗೆ ಮನೆಕ್ ಪೊರಡುವಕ ಗಂಟೆ ಪನ್ನೊಂದ್ ಪೊಜ್ಜದ್ ಕೇಟತ್. ಮಾಡ್‌ನ ಅಡಿಗೆ ಅನ್ನನೇ ಉಂಡ್. ಬಿಸಿ ಮಾಡುವಕ್ ಬೆಚ್ಚತ್. ಇಕ್ಕ ವರುವ ಸರದಿ ಸತೀಶ್‌ಕ್. ಮೆಲ್ಲೆ ತಟ್ಟಿತ್ ಒಪ್ಪಾಚಿ. "ಏಳ್, ನೇರ ಪೆರ್ತ್ ಆಯಿಪೋಚಿ ಉಂಗನ" ಸದ್ಯ ಇಚ್ಚಕೇಂಗಿ ತಕ್ಕ ಪರಂದಿಯಲ್ಲಾ ಎಣ್ಣೆಯಂಡ್ ಎದ್ದಿತ್. ಉಂಬಕ್ ಅಳತದೊಂದೇ. ದಂಡಾಳ್‌ಕೂ ಕೂಳ್‌ತೊಂಡೆಲ್ ಇಳ್‌ಂಜಿಲೆ.

\* \* \*

ಅಡಿಗೆ ಮನೆಲ್ ಪಾತ್ರತಾರ ಸದ್ಯಕ್ ಸತೀಶ್‌ಕ್ ಎಚ್ಚರಾಚಿ. ಓ! ಇಂದೆನ್ನ ಇವ ತೊಡಿಕೆ ಎದ್‌ಟ್ಟಿತಲ್ಲಾಂದ್ ವಾಚ್ ನೋಟಾಚಿ. ನಾಲರ ಗಂಟೆ! ಎಕ್ಕೋಲು ಆರ್ ಪೊಜ್ಜಲ್ಲತೆ ಏವತವ ಇಂದೆನ್ನಂಗ್? ಅಕ್ಕಣೆ ಕಿಣಿ ಕಿಣಿ ಬಳೆ ಸದ್ಯ ಕೇಟತ್. ಕಣ್ಣ್ ಮುಚ್ಚಿಯಂಡತ್. ಮೆಲ್ಲೆ ಕಂಬಳಿ ನೀಕಾಚಿ ಸುಮಿ. ಮೂಡ್‌ಲ್ ಇಚ್ಚಕ್ ದಿನ ಕಾಂಬಾಂಜ ಮಂಕ್ ಇಲ್ಲೆ. ಚೆನ್ನ ಬಾಡಿಪೋಯಿತ್. ಎನ್ನಂಗೋ ಇಂದ್ ಏವಕೂ ಮನಸಿಲ್ಲೆ, ಎಕ್ಕೋಲು ಆಫೀಸ್ ಮನೆ, ಮನೆ ಆಫೀಸ್ ಇದೇ ಆಚಿ. ರಜ ಇಟ್ಟಿತ್ ಎಲ್ಲಿಕೇಂಗಿ ಪೋಚೇಂಗಿನ್ನೆ? ಅವಕೂ

ಚೆನ್ನ ಬದಾಲಾನನಕೆ ಆಪ. ಈ ಗೇನ ಬಂದದೇ ಅವನೂ ಎದ್ದತ್. ದೋಸೆ ತಿಂದಂಡಿಪ್ಪಕ ಸುಮೀ "ಇಂದ್ ಆಫೀಸ್‌ಲಿಂಜಿ ಬಪ್ಪಕ ಚೆನ್ನ ಪಣ್ಣಾಫಲ, ಪೂವು, ತರಕಾರಿ ಎಲ್ಲಾ ಎಡ್‌ತಂಡ್ ಬಾ"ಂದೆಣ್ಣ್ ಚಿ. ಎನ್ನಂಗ್‌ಂದ್ ಕಣ್ಣ್‌ಲೇ ಕೇಟತ್. ಇಂತದೇ ಬೋಂಡೂಂದ್ ಒರ್‌ದಿನವೂ ಕೇಟವಳಲ್ಲ. ಪೂಜೆಕ್‌ಂದೆಣ್ಣ್ ಚಿ. "ಅದಂಗ್ ತರಕಾರಿ ಎನ್ನಂಗ್? ಪಟ್ಟಿಂಗ್ ದಾನ ಮಾಡುವಕಾ?" ತೆಳ್‌ಚಂಡತಚ್ಚಿ ಕೇ.

ಸುಮೀ ಬುದ್ದವಕ್ ಬಪ್ಪಕ ಪತ್ತರೆಗಂಟೆ. ಎಂತ ಮಾಡಿಯಂಡಿಂಜಿಯಾ ಇಚ್ಚಕ್ ನೇರಂದ್ ಕೇಪಕ್ ಗೇನ. ಆಚೇಂಗಿ ಕೇಟ್‌ಲೆ. ಸುಮಿಯೇ ಎಣ್ಣ್‌ಚಿ "ನಾನ್ ನಾಳೆ ಅಮ್ಮಂಡಲ್ಲಿಕ್ ಪೋಪಿ, ಎನ್ನಂಗೋ ಅಮ್ಮನ ಪಪ್ಪನ ನೋಟುವಕ್ ಗೇನಾಯಂಡುಂಡ್" "ಹಾಂ? ಇದೆನ್ನಪ್ಪ ಇಂಜಕಿಂಜನಕೆ? ನಾನಾಯಿತೇ ಪೋವುಂದೆಣ್ಣಿ ಚೇಂಗೂ ಪೋಕತೆ, ನೀನೊಬ್ಬನೇ ಕೈಚುಟ್ಟುಂಡ್ ಅಡಿಗೆ ಮಾಡುವದ್ ನೋಟುವಕಯ್ಯುಲೇಂದೆಣ್ಣು ವಂಜವ ಇಂದ್....." ಇಲ್ಲಿ ಎಂತೋರ್ ಘಟನೆ ನಡಂದಿತ್ ಅಂದ್. ಅದೇ ಅವಡ ಮನಸ್ಸು ಪಾಳಾಪಕ್ ಕಾರಣ. ಅದನೆಲ್ಲ ಮರೆಪಕೇ ಈ ಉಪಾಯ. ನಾಡ ಕೂಡೆ ಎಣ್ಣ್‌ವಕೆನ್ನೆ? ಹುಂ, ಪೋಯಿತ್ ಬರಡ್‌ಂದ್ ಗೇನ ಮಾಡ್‌ನಂವೊ "ಇಂಚಿಕ್ಕ ಬಪ್ಪಿಯ ಸುಮೀ"ಂದ್ ಕೇಟತ್. "ನನ್ನ ಕೊಂಡೆನ್ನೇಂಗಿ ಬೇಜಾರ ದುಃಖ ಆಯಿತುಂಡೇಂಗೆಣ್ಣಿ ರಪ್ಪಾ, ಈ ಪಾಮರ ತಿದ್ದಿಯವಕ್ ಪ್ರಯತ್ನಪಟ್ಟಿವ" ಎಣ್ಣವಕ "ಛೇ, ಅನ್ನನೊಂದೂ ಇಲ್ಲೆ. ಎಂತೋ ಮನಸ್ಸೇ ಸೆರಿ ಇಲ್ಲೆ. ಎನ್ನಂಗ್‌ಂದ್ ನಾಕೇ ಗೊತ್ತಿಲ್ಲೆ" ಎಣ್ಣಿ ರಾತ್. ನಾಳೆ ನೀನೂ ಬಪ್ಪಿಯಾಂದ್ ಕೇಟತ್, ನೀನೂ ಬಾಂದೆಣ್ಣ್‌ಲೆ. "ಇಲ್ಲೆ" ಸ್ವಾಭಿಮಾನ ಬುಟ್ಟ್‌ಲೆ. "ನೀನ್ ಪೋಯಿತ್ ಬಾ, ಎಕ್ಕ ಕಯ್ಯುವ ಅಕ್ಕ ಬಾ, ಆಚೇಂಗಿ ಬಪ್ಪಕ ಮಾತ್ರ ಪಂಡೇತ ಸುಮಿ ಅಯಿತೇ ಬರಂಡು. ಇಕ್ಕ ಒರ್‌ವಾರತ್‌ಂಜಿ ನಾನ್ ಕಂಡುಂಡುಳ್ಳ ಸುಮಿ ಅಲ್ಲ, ಕೇಟತಾ?" ಮಂಡೆ ಆಟ್‌ಚಿ. ದಂಡಾಳೂ ಅಯಿಂಗಯಿಂಗಡದೇ ಚಿಂತೆಲ್ ಇರ್ ಪೋಲತ್‌ಚಿ.

ಪೊಲಾಕ ಪಾಲ್‌ಕರ್ತಿರ ಸದ್‌ಕ್ ಎಚ್ಚರಾಚಿ. ಸುಮಿ ಪಾಲ್ ಕೇಟವಕ್ ಪೋಪಕ ನಾಳೆಯಿಂಜಿ ಅರೆ ಲೀಟರ್ ಪಾಲ್ ಮದೀಂದೆಣ್ಣ್‌ಚಿ. ಬೆರಿಯ ತಾಂಡ ಕೆಲಸ ಎಲ್ಲಾ ತೀತತ್ ಮಜ್ಜಣಕ್ ಅಡಿಗಿ, ಪೊಲಾಕತ್‌ರ ತಿಂಡಿ ರೆಡಿಯಾಚಿ.

ಮಂಡೆದುಂಬ ಪೂಚೂಡಿತ್, ಅಗಲ ಕುಂಕುಮ ನೆತ್ತಿಕ್‌ಟ್ಟಿತ್ ಕುಣುಕುಣು ಓಡಿಕ್ಕಳಿಚಂಡಿಂಜ ಪೊಣ್ಣಾನೇ ನೋಟಾಚಿ ಸತೀಶ್. "ಬೆರಿಯ ಕುಳಿಪಕೆನ್ನಾ? ಬಸ್ಸಕ್ ನೇರಾಪಲ್ಲಂದ್" ಕೇಟತ್. ಅವಡ ಉಡ್‌ತ ಪಳಿಯ ಪೊಡಿಯ ನೋಟಿಯಂಡ್ "ಸುಮೀ, ನಾನಂದ್ ಎಡ್‌ತಬಂದ ಪೊಡಿಯ ಉಡ್‌ಪಕೆನ್ನಾಚಿ? ಕೇಟತ್. ಅಂವೊ ಪ್ರೀತಿಲ್ ಎಡ್‌ತಬಂದ ಪೊಡಿಯ. ಗುಲಾಬಿರಂಗ್‌ಕ್ ಪಚ್ಚಿ ಕಂಬಿ ಜರಿ ಉಳ್ಳದ್. ಅದಂಗೊತ್ತ ಬ್ಲಾಸ್ "ಏದ್ ಪೊಡಿಯಂದ್ ಕೇಟತವ, ಕೋಂಬರಲ್ ಪೋಯಿತ್ ನೋಟುವಕ ಆ ಕವರಾನ್ ಸಮೇತ ಉತ್ತತ ಅನ್ನನೇ ಬೆಚ್ಚಿತಿಂಜತದಾನ್. "ಇದ್ ನೀನೊಮ್ಮೆ ಇಷ್ಟ ಪಟ್ಟಿತ್ ಕೇಟ ರಂಗ್‌ರ ಪೊಡಿಯ. ಅಂದ್ ದುಡ್ಡಿಂಜಿಲೆ, ಇದ್‌ನೇ ಉಡ್‌ತಾ ಸುಮೀ "ಆಸೆಲ್ಣ್ಲೆಚಿ. ಒಮ್ಮೆ ಪೊಡಿಯತ್‌ನ ತೇಂಡಿತ್ ನೋಟಾನವ ಅನ್ನನೇ ಮಡ್‌ಕಿತ್ ಬೆಚ್ಚಿರ್‌ತ್, "ಬೋಂಡ, ಬಸ್ಸಲ್ ಮುದುರಿತ್ ಫಾಳಾಪ" ಮಂಡೆ ಕುಂಬ್‌ಟ್ಟಂಡ್ ಎಣ್ಣ್ಲೆಚಿ. ಪೊಡಿಯ ನೇರಾಯಿತೂ ಚಾಯಿಂಜತ್. ಆಚೇಂಗಿ ಆ ಚಾಯಿನ ಕಂಡಿತ್ ಅವಡ ಮೂಡ್ ಪೊಲಂದ್‌ಲೆ. ಬೋರೆ ದಿನ ಆಯಿತುಂಡೇಂಗಿ ಎಡ್‌ತಬಂದ ತಕ್ಷಣ ಉಡ್‌ತಿತ್ ಕನ್ನಡಿರೆದಿಕೆ ನಿಂದಂಡ್ ಸೆರಗೊಮ್ಮೆ ನೆರಿನೊಮ್ಮೆ, ಮೇಲ್‌ನೊಮ್ಮೆ ನೋಟಿತ್ ಎನ್ನನೆ ಕಾಂಬ ನನ್ನಂದ್ ಕೋಣೆಂಜಂಡ್ ಕೇಪಂಜತ್, ಇಂದ್. ಸತೀಶಂಗ್ ತಡ್‌ಪಕಯಿಂಜಿಲೆ. ಇಕ್ಕ ಅಂವಂಗೂ ಮೊರೆಬಂದ್‌ರಾತ್.

\* \* \*

"ಪಣ ಎನ್ನೇಂಗಿ ಜಾಸ್ತಿ ಬೋಂಡುವಾ?" ಕೇಟತ್ ಪೊರಡುವಕ "ಬೋಂಡ ಉಳ್ಳದ್ ಮದಿ" ಎಣ್ಣ್ಲೆಚಿ. ಪೋಯಿತ್ ಎತ್ತನದೂ ಕಾಗದ ಎಳಾದ್. ನೀನೆಕ್ಕ ಬಾಂದೆಣ್ಣ್ಲೆವಿಯಾ ಅಂದ್ ಬಪ್ಪಿ ನಿನ್ನ ಕಾಕಿಯಂಡ್ ಬಪ್ಪಕ್, ನೀನ್ ಮಾತ್ರ ಇನ್ನನೆ ಬೇಜಾರತಿಪ್ಪಕಯ್ಯ" ಪೊಣ್ಣಾರ ದವಡೆಕೊಂದ್ ಮೆಲ್ಲೆ ತಟ್ಲೆಚಿ. ಪಟ ಪಟಾಂದ್ ಕಣ್ಣೇರ್ ಅಂವಂಡ ಕೈಕ್ ಬುದ್ಧತ್. "ಸುಮೀ, ಇದೇ ನಾಕ್ ಕುಶಿ ಇಲ್ಲೆ. ನೀಕ್ ಪೋಪಕ್ ಕುಶಿ ಇಲ್ಲೇಂಗಿ ಬೋಂಡ. ನೀನಾಯಿತೇ ಪೊರಟಿತುಳ್ಳಿಯಾ, ಪೋಯಿತ್ ಕುಶಿಲಿಂಜಿತ್ ಬಾ. ಬಪ್ಪಕ ಭಾರತಿನ ಕೂಟಿಯಂಡ್ ಬಾ." ಅವಡ ಕಣ್ಣೇರ್‌ನ ತಾಂಡ ಕೈವಸ್ತ್ರತ್ ತೇಟಿಯಂಡೆಣ್ಣ್ಲೆಚಿ. ಮನೆಕ್ ಬೀಗ ಇಟ್ಟಿತ್ ದಂಡಾಳೂ ಪೊರಟತ್ ಬಸ್ಸು ಪೊರಡಣೆ ಸತೀಶ್ ಪೊರಮೆ ನಿಂದಂಡ್ ತಕ್ಕ ಪರಂದಂಡಿಂಜತ್. ಬಸ್ಸು ಪೊರಟಿತ್ ಸುಮಿತಂಡ ಮೂಡ್

ಮರೆಯಾಪದೂ ಅಂವಂಗ್ ಎಂತಾನೋ ಕಳಂದಂಡನೆಕೆ ಎದೆ ಒತ್ತಿಯವಚ್ಚಕ್ ದುಃಖ ಆಯಿರ್ತ್. ಅವ ಇಚ್ಚಕ್ ಕಾಲತ್ ಅಂವನ ಬುಟ್ಟಿತ್ ಪೋಯೆ ಇಂದೇ, ಆಫೀಸ್‌ಲ್ ಕೆಲಸ ಮಾಡುವಕೂ ಮನಸಿಲ್ಲೆ. ಅನ್ನನೇ ತಾಂಗಿ ಅಳತತ್ ಸಿಗರೇಟ್ ಪುಡಿಚಂಡ್ ಕೈಲಿಂಜ ಸಿಗರೇಟ್ ಬೆರಚುಡುವಕ ಎಚ್ಚರಾಚಿ. ಸುತ್ತು ನೋಟುವಕ ಚೊತೆಕಾರ ಎಲ್ಲಾ ಪೋಯಿರ್‌ತಿಂಜತ್. ಪಿವುನ್ ಒಬ್ಬನೇ ಪಡಿ ಇಡುವಕ್ ಕಾತಂಡಿಂಜತ್ ಇಂವೊ ಏವಾನೇ ನೋಟಿಯಂಡ್, ಮನೆಲೂ ನೆಮ್ಮದಿಲ್ ಇಪ್ಪಕಯ್ಯತಾಚಿ. ಪೋನಲ್ಲಿ ಬಂದಲ್ಲಿ ಎಲ್ಲಾ ಸುಮಿರದೇ ಗೇನ. ಎಂತ ಗುಟ್ಟ್ ಅಡಂಗಿತಿಕ್ಕು ಅವಡ ಎದೆರೊಳ್‌ಲ್? ಇದೇ ಚಿಂತೆ. ಪೋನವ ಒರ್ ಕಾಗದವೂ ಎಳ್‌ದಿಲೆ, ಇಂವೊ ಎಳ್‌ದಾನಾಂಗ್ ಜವಾಬೂ ಇಲ್ಲೆ. ರೋಸಿಪೋಯಿತ್ ಮುಂಡತೆ ಕೂಡಿರ್ತ್ ಸತೀಶ್.

ಒರ್‌ದಿನ ಆಫೀಸ್‌ಲಿಂಜಿ ಬಪ್ಪಕ ಗೇಟ್ ತೊರಂದಿತಿಂಜದ್ ಕಂಡತ್. ಸುಮಿ ಬಂದಿತಿಕ್ಕುವೆನ್ನೊಂದ್ ಆಸೆಲ್ ಒಳ್‌ಕ್ ನುಗ್ಗ್‌ಚಿ. ಒರ್ ಕಾಗದವೂ ಎಳ್‌ದತೆ ಬಂದ್‌ರಾತಲ್ಲಾಂದ್ ಬೇರ್‌ಚಿಟ್ಟಿಂಡೇ ಕಯ್ಯಾಲೆ ಪತ್ತಾನಂವಂಗ್ ಮೂಲೆಲಿಂಜ ಕುರ್ಚಿಲ್ ಮಾಂವ ಅಳತಿತಿಂಜದ್ ಕಂಡತ್. ಮಾಂವಂಡ ಕ್ಷೇಮಲಾಭ ಎಲ್ಲ ಕೇಟಿತಾನದೂ "ಎನ್ನಂಗ್ ಮಾಂವ ಒಬ್ಬನೇ ಬಂದಿರಾ? ಸುಮಿ ಎನ್ನಂಗ್ ಬಂದ್‌ಲೆ?ಂದ್ ವಿಚಾರ ಮಾಡ್‌ಚಿ. "ಅದ್‌ನೆಲ್ಲ ಅರಿಯನಾಂದೇ ನಾನ್ ಬಂದಿಯಪ್ಪ. ಸುಮಿ ಇಲ್ಲತೆ ನಿಂಗಕೂ ಬದ್‌ಕೇ ಕಷ್ಟ ಆಯಿತಿಕ್ಕುವಲ್ಲಾ. ಅಲ್ಲಿ ಅವಳೂ ಅನ್ನನೇ, ಮಂಡೆಕ್ ಮರ ಬುದ್ಧನೆಕೆ ಎಂತಾನೋ ಗೇನ ಮಾಡಿಯಂಡಿಪ್ಪ. ಮೂಡ್‌ಲ್ ಗೆಲು ಇಲ್ಲೆ, ನಂಗಡ ಕೂಡೆ ದುಂಬ ತಕ್ಕಿಲ್ಲೆ. ಭಾರತಿರ ಕೂಡೆ ಮಾತ್ರ ತಕ್ಕ. ನಾನೂ, ಪರ್ತ ಕೇಟಿತ್ ನೋಟ್‌ನ, ಒಂದಾಂಗೂ ಕಮಕ್, ಕಿಮಕ್ ಎಣ್ಣೆಲೆ. ಇಲ್ಲಿ ಎನ್ನನಿಂಜತ್? ಎಂತಾಂಗ್‌ಂದ್ ನಿಂಗಕ್ ಕಾರಣ ಗೊತ್ತುಂಡಾ? ನಿಂಗ ಜಗಳ, ಬಕ್ಕಣಕ್ ಎಣ್ಣೆನ ಆಳಲ್ಲಾಂದ್ ನಾಕ್ ಗೊತ್ತುಂಡ್, ಆಚೀಂಗಿಯೂ ಅವಡ ಅವ್ವಂಡ ಗೋಳೂ ನೋಟುವಕಯ್ಯತೆ ದಾರ್‌ಕೂ ಎಣ್ಣೆತೇ ನಾನ್ ಬಂದಿಯೆ. ನಡಂದದಂತ ಒಮ್ಮೆ ಎಣ್ಣೆವೋನೆ" ಕರುಂಬಯ್ಯ ಮೈಮಂಡ ಕೈ ಪುಡಿಚಂಡತ್.

ಕರುಂಬಯ್ಯಂಗ್ ದಂಡ್ ಮಕ್ಕ. ಸುಮಿತ, ಭಾರತಿ. ದಂಡಾಳೂ ಕಾಲೇಜ್



ಮೊಟ್ಟಾ ಪತ್ನನಯಿಂಗಳೇ. ಸುಮಿತಂಡ ಮಂಗಲ ಬೆರಿಯ ಕೈಚಿರ್ತ್. ಅವಳೂ ಸತೀಶನೂ ಒಬ್ಬನೊಬ್ಬ ಇಷ್ಟಪಟ್ಟಿತೇ ಮಂಗಲ ಕಯಿಂಜಯಿಂಗ. ಅಂವಂಗೆ ಅವ್ವ, ಅಪ್ಪ ದಾರೂ ಇಂಜಿಲೆ. ಅಂವಂಡೋರ್ ತಮ್ಮಾಂವಿಯೇ ಅಂವನ ಚಾಕಿತ್ ಮಂಗಲ ಕೈಚವ. ಅವಳೂ ಇಕ್ಕ ಇಲ್ಲೆ. ಭಾರತಿ ಡಿಗ್ರಿ ತೀಂದದೂ ಮನೆಲಳತತ್. ಅವಳ ಮಂಗಲ ಕೈಪಂವೊ ಮನೆ ಮೈಮನಾಯಿತ್ ಇರಂಡೂಂದೇ ಅಪ್ಪ ಅಪ್ಪಂಡ ಆಶೆ. ಆಚೇಂಗಿ ಅದಂಗೆ ದಾರೂ ಒತ್ತವಂಜಿಲೆ. ಅನ್ನನಾಯಿತ್ ಭಾರತಿರ ಮಂಗಲ ಮಿಂಇಕ್ ಪೋಯಂಡೇ ಇಂಜತ್. ಕರುಂಬಯ್ಯಂಗೆ, ಮುತ್ತವ್ವಂಗೆ ಇದೇ ಒರ್ ಚಿಂತೆ ಆಚಿ. ಅದಂಡಡಲೇ ಸುಮಿತನೂ ತಾಮನೆಕ್ ಬಾತ್. ಅವಳ ನೋಟುವಕ ಮನೋರೋಗಿರನಕೇ ಕಾಂಬಂಜತ್. ಏರ ತಕ್ಕಿಲ್ಲೆ, ತಮಾಷಿ ಇಲ್ಲೆ, ಊಟ ತಿಂಡಿಯೂ ಅಚ್ಚಿಚ್ಚಿಕೇ, ನಾಲ್ಗಂಟೆ ಆನನಕೇ ತಂಗನ ಕೂಟಿಯಂಡ್ ಪಕ್ಕತೇ ಇಂಜ ಸ್ಕೂಲಾರ ಕಳಿಪರಂಬುಲ್ ಪೋಯಿತ್ ಅಳತವಂಜತ್. ಅಲ್ಲಿ ಮಕ್ಕ ಎಲ್ಲ ಲಗ್ಗೆ ಇಟ್ಟಂಡ್ ಕೂತ್ ಕೊಡ್ತಂಡ್ ಕಳಿಪಾನೇ ನೋಟಿಯಂಡ್ ತನ್ನ ತಾನೇ ಮರಂದ್ರುವಂಜತ್. ಮಕ್ಕ ಎಲ್ಲಾ ಪೋಯಿತ್ ಪರಂಬು ಖಾಲಿಯಾಚೇಂಗಿಯೂ ಏವಕ್ ಮನಸಿಲ್ಲೆ. ತಂಗಕಾಕಿತ್ ಒಪ್ಪಂಡು, ತಾಂಡ ಸಿನೇತಕರ್ತಿಯಳ ಕಾಂಬಕೂ ಪೋಪಂಜಿಲೆ. ಇದ್ನೆಲ್ಲ ನೋಟಿತಾಪಕ ಅವ್ವಂಗೆ ಚೆನ್ನೆ ಸುಂಯಂಕ್ ಕಾಟ್ಪಿನನಕೆ ಆಚಿ. ತಾಂಗೊರ್ ಕುಂಇ ಆಯಿಲೇಂದೆಣ್ಣಾವ ಬೇಚಾರ ಇವಳ ಈ ಸ್ಥಿತಿಕಿತ್ತಿಚಿಟ್ಟತಾಂದ್ ಮುತ್ತವ್ವ ಬೇರ್ಚಿಟ್ಟತ್. ಆ ವಿಷಯತೆನ್ನೇಂಗಿ ವಡಿಯಂಗೂ ಪೋಣ್ಣ ಕೂ ಅಸಮಾಧಾನ ಆಯಿತಿಕ್ಕು. ಸತೀಶ್ ಎನ್ನೇಂಗಿ ಎಣ್ಣೆತಿಕ್ಕುವೆನ್ನೋ... ಅದಂಗೆ ಬೇಚಾರಪಟ್ಟಂಡ್ ಬಂದ್ವರ್ತೆನ್ನೋ. ಇಲ್ಲೇಂಗಿ ಅವಳೊಬ್ಬಳೇ ಅಯೆಪಂಜಿ ಅಂವೊ ಮುಂಡತೆ ಕೂಡಿರುವಂಜತಾಂದೆಲ್ಲ ದಂಡಾಳೂ ಪರಂದತ್. ಆಖೀರಿಕ್ ಅಲ್ಲಿಕ್ ಪೋಯಿತೇ ಬಪ್ಪಿಂದೆಣ್ಣಿಯಂಡ್ ಕರುಂಬಯ್ಯ ಮೈಸೂರ್ಕ್ ಬಾತ್.

\* \* \*

ಸತೀಶ್ ಮಾಂವನ ಅಂದ್ ಅಲ್ಲಿಯೇ ತಡ್ತಂಡತ್. ತಾಂಗೆ ಗೊತ್ತಾನಚ್ಚಕ್ ವಿಷಯ ಮಾಂವಂಗೆಣ್ಣೆ ಚಿ. "ಒಟ್ಟಾರೆ ಅವ ಇಲ್ಲಿಯೂ ನಿಂಗಕೂ ಗುಟ್ಟು ಬುಟ್ಟುತಂದ್ಲೆ, ಎಂತೋರ್ ಮೂಡಿ. ಮನಸ್ಸುಲಕ್ಕಾನ ಎಣ್ಣೆವಕೆನ್ನೆ?ಂದ್ ಬೇಚಾರತೇ ಬಯ್ಯಕ್ ಪೋಚಿ. ಅಂವೊ ಮನೆಕೆತ್ತುವಕ

ಸುಮಿ ನಲ್ಲ ವರ್ಕ್‌ಲಿಂಜತ್. ಮುದಾಕ ಮೆಲ್ಲೆ ಪೋಯಿತ್ ವರಿಯಂಡಿಂಜ ಮೋವಡ ಮೂಡ್‌ನ ಚಾಯಿಲ್ ನೋಟ್‌ಚಿ. ಎಚ್ಚಕ್ ಚಾಯಿಂಜ ಕುಂಞಿ? ಇಕ್ಕನ್ನೆ ಉಂಡ್? ನಾಳೆಯೇ ಡಾಕ್ಟರರ ಪಕ್ಕ ಕೂಟಿಯಂಡ್ ಪೋಂಡೊಂದ್ ಗೇನ ಮಾಡಿಯಂಡ್. ಕಂಬಳಿ ಚಾಯಿಲ್ ಪೊದೆಪಿಚಿಟ್ಟಿತ್ ಪೊರಮೆ ಬಾತ್. ವಡಿಯನೂ ಪೊಣ್ಣೂ ಎಚ್ಚಕೋ ನೇರಕೆತ್ತಣೆ ಪಳಮೆಪರಂದಂಡಿಂಜತ್. ಪೊಲಾಕ ಎಲ್ಲಾರೂ ಎದ್ದಿತ್ ಅಯಿಂಡಯಿಂಡ ಕಾರ್ಬಾರ್‌ಲೇ ಮುಳೇಪೋಚಿ. ಅಂದ್ ಭಾರತಿಯೂ ಏವಕ್ ಚೆನ್ನ ನೇರ ಆಯಿರ್‌ತಿಂಜತ್. ಬೆರಿಯ ಕಾಫಿ ಮಾಡಿತ್ ಅಕ್ಕಂಗ್ ಕೊಡ್‌ಪಕ್‌ಂದ್ ಕೋಂಬರೆಕ್ ಪೋಚಿ, ಸುಮಿ ಅಲ್ಲಿಂಜಿಲೆ. ಅರೆ ಇಚ್ಚಕ್ ನೇರತೆ ಎದ್ದಿತ್ ಎಂತ ಕಡಂಗ್ ಕಳೆಕಂಡಿಯದೋಂದ್ ಬರಕೂಟಿಯಂಡ್ ಸುಮೀಂದ್ ಕಾಕ್‌ಚಿ. ಸದ್ದೇ ಇಲ್ಲೆ. ಅಲ್ಲಿ ಇಲ್ಲಿ ನೋಟ್‌ಚಿ, ಅಡಿಗೆ ಮನೆಕೂ ಬಂದ್‌ಲೆ. ಅವ್ವಂಗ್ ಪೋಡಿಯಾಚಿ ವಡಿಯನ ಒಪ್ಪಾಚಿ "ಸುಮಿ ಎಲ್ಲಿಯೂ ಕಾಂಬುಲೆಲ್ಲಾ" "ಹಾಂ?" ಎಣ್ಣೆಯಂಡ್ ಧಡಕ್ಕುಂದ್ ಎದ್ದತ್. "ನೀಡ ಕೂಡೆ ಎನ್ನೇಂಗಿ ಎಣ್ಣೆಚಾ" ಕೇಟತ್ ಭಾರತಿನ. "ಇಲ್ಲೆ. ಬೈಟ್ ಎಚ್ಚಕೋ ನೇರ ಎಳಾದಿಯಂಡಿಂಜತ್. ಭಾವಂಗ್ ಕಾಗದ ಎಳಾದುವ ಕಾಂಬಾಂದ್ ನಾನ್ ನಾಡ ಕೋಂಬರೆಲ್ ಪೋಯಿತ್ ಬುದ್ದಂಡ. " ಮೊರಟಂಡೇ ಎಣ್ಣಾಚವ. ಅವಡ ಕೋಂಬರೆಲ್ ಪೋಯಿತ್ ಅಡಿಕೊಡಿ ಎಲ್ಲಾ ಜಾಲಾಡ್‌ಚಿ. ಚಿಂಗಾರಪೊಟ್ಟಿರ ಕೀಡತ್ ಒರ್ ಕಾಗದ ಉಳೇ ನೋಟಿಯಂಡಿಂಜತ್. ಅದ್ ಅಪ್ಪಂಗ್ ಎಳಾದ್‌ನ ಕಾಗದ. "ಪಪ್ಪಾ, ನಾಕ್ ಈ ಬದ್‌ಕೇ ಬುಡ್‌ಂಚಿಪೋಯಿತ್. ಅದಂಗಾಯಿತ್ ನಾನ್ ನಾಡ ತಡಿನ ಕಾಂಗತೇ ಮಾಡಿರಂಡೊಂದ್ ಪೊರಟಿಯೆ. ನನ್ನ ತೇಡುವಕ್ ಪ್ರಯತ್ನ ಪಡುವದ್ ಬೋಂಡ. ಅಂತೂ ಇಂತೂ ಭಾರತಿಕ್ ನಿಂಗ ಕಣ್ಣಿನ ತೇಡಿಯಂಡೇ ಉಳ್ಳಿರಾ. ಬೋರೆ ದಾರ್‌ಕೇಂಗಿ ಕೊಡ್‌ಪ ಎನ್ನಂಗ್? ಅವಳೂ ವಿದ್ಯಾವಂತೆ. ಸಶೀತ ಪೌನಾರಂತಾ ಗುಣ ಉಳ್ಳಂವೊ. ಅವಂಗ್ ಮೀತ ಮೈಮೊ ದಾರಿಕ್ಕು, ಭಾರತಿನ ಅವಂಗೇ ಕೊಡಿ" ನಾನ್ ಇಂಞೋರ್ ಜನ್ಮತೇಂಗಿ ಮಕ್ಕಡ ಅವ್ವನಾಯಿತ್ ಸಂತೋಷತ್ ಬದ್‌ಕ್ ನೀಸುವನೆಕೆ ಆಕಡ್" ನಿಂಗಡ ನಿರ್ಭಾಗ್ಯೆ ಮೋವ ಸುಮಿ.

ಕಾಗದ ಓದ್‌ನ ಕರುಂಬಯ್ಯ ಅಲ್ಲಿಯೇ ನೆಲಕ್ ಉರ್‌ಂಡತ್. ಅವಡ ದುಃಖಿಕ್ ಕಾರಣ ಎಂತಂದ್ ಭಾರತಿಕೂ ಗೊತ್ತಾಚಿ. ಅಪ್ಪನ ಎಡ್‌ತಿತ್

ಬುದ್ಧವಿಚಿಡುವಕ ತಲೆಮೆತ್ತರಡಿಲೋರ್ ಕಾಗದ ಕಂಡತ್. ಅದ್ ಸತೀಶಂಗ್ ಎಳ್ಳಾದ್ನ ಕಾಗದ. ಆ ಕಾಗದತ್ ಅವ ತಾಂಡ ಮನಸ್ಸೊಲಿಂಜ ಚಿಂತೆ, ದುಃಖ ಎಲ್ಲಾನೋ ಎಳ್ಳಾದಿಂಜತ್. ಇಂಇತೋರ್ ಜನ್ಮತೂ ನೀನೇ ನಾಕ್ ವಡಿಯನಾಯಿತಿಪ್ಪನೆಕೆ ದೇವ ಆಶೀರ್ವಾದ ಮಾಡಡ್. ನಾನ್ ಗೊಡ್ಡೀಂದ್ ಜನ ನನ್ನ ಕೈಕಾಟಿತ್ ಹೀಯಾಳಿಚಿಡತೆನಕೆ ಮಕ್ಕಡ ಅವ್ವನಾಯಿತ್ ದುಂಬ್ನ ಬದ್ಕ ಬದ್ಕುವನೆಕೆ ಆಕಡ್. ನನ್ನ ಕೊಂಡ್ ನೀಡ ಬದ್ಕ ಪಾಳಾಪದ್ ಬೋಂಡ ಸತೀ. ಭಾರತಿ ನೀಕ್ ತಕ್ಕ ಪೊಣ್ಣ್ ನಾಡ ಆಶೆ ಇದೇ. ಈ ಆಶೆನ ನಡತಿಯಂದ್ ನಿನ್ನ ಬೋಡಿಯವಿ. ನೀಡ ಎದಿಕೆ ನಿಂದಿತ್ ಎಣ್ಣ್ವಕ್ ಧೈರ್ಯ ಇಲ್ಲತ ಹೇಡಿ ನಾನಾಯಿಟ. ಮಾಘ್ ಮಾಡಿರ್. ಭಾರತಿರ ಕೈಪುಡ್ಚಿತ್ ಮಕ್ಕ, ಮರಿಮಕ್ಕಳಾಯಿತ್ ನೂರಾಂಡ್ ಬದ್ಕುವನೆಕೆ ಆಕಡ್. ಇಂದೂ, ಎಂದೂ ನೀಡವಳೇ ಆನ "ಸುಮೀ" ಕಣ್ಣೀರ್ ಬುದ್ಧಿತ್ ಅಲ್ಲಿ ಇಲ್ಲಿ ಚಿತ್ತಾಯಿಂಜ ಕಾಗದತ್ನ ಅವ್ವನೂ ಮೋವಳೂ ಓದ್ಚಿ.

ಡಾಕ್ಟರ್ ಬಂದಿತ್ ಉಪಚಾರ ಮಾಡಿತಾಪಕ ಕರುಂಬಯ್ಯ ಎದ್ಧಿತ್ ಅಳತತ್. "ಎಲ್ಲಿಯಾ ನಾಡ ಮೋವ?" ಇದೋರೇ ಪ್ರಶ್ನೆ ಅಂವಂಡ. ಇಚ್ಚೆಕೋರ್ ಕಾರಣಕ್ ಹೇಡಿರೆನಕೆ ಚಾವಕ್ ಪೋಚಾ? ನಂಗಲ್ಲಾ ಚತ್ತ್ ಪೋಯಿಂಜತಾ? ಎನ್ನೇಂಗೋರ್ ಪರಿಹಾರ ಕಂಡ್ಪುಡಿಕ್ಕೊಲಿಂಜತ್. "ಮಂಡೆಕೇ ಬಡ್ಚಂಡತ್. ದಾಡ ತಕ್ಕೂ ಅಂವಂಡ ಕೆಮಿಕೇ ಪಡುವಂಜಿಲೆ.

"ಟೆಲಿಗ್ರಾಂ" ಕೊಡಗ್ಕ್ ಬಪ್ಪಕಂದ್ ಪೊರಟಿಂಜ ಸತೀಶಕ್ ಕೈ ಗ್ಡ್ಪ ಕೂಡ್ಚಿ "Sumathy....missing...start...immediately." ಅದ್ನ ನೋಟ್ನದೇ ಸತೀಶಂಗ್ ಮನೆ ಎಲ್ಲಾ ತಿರೀತ್ ಮಂಡಕ್ ಬುದ್ಧಿರುವೆನ್ನೋಂದ್ ತೋಂದ್ಚಿ. ಅಂತೂ ಗುಟ್ಟ್ ಗುಟ್ಟಾಯಿತೇ ಬೆಚ್ಚಂಡ್ ನನ್ನ ಬುಟ್ಟಿತ್ ಪೋಯಿಟಿಯಾ ಸುಮೀಂದೆಣ್ಣಿಯಂಡ್ ಎದೆಕ್ಬಡಿಚಂಡತ್. ದಡಬಡಾಂದ್ ಪೊರಟತ್. ಇಲ್ಲಿ ಓರಬ್ಬ ಓರಂದ್ ಮೂಲೆಲ್ ಬುದ್ಧಂಡ್ ಅಳತಂಡ್ ಗೋಳಾಡಿಯಂಡಿಂಜತ್. "ಸುಮೀ"ಂದ್ ಕಾಕಿಯಂಡೇ ಒಳ್ಳಕ್ ನುಗ್ಗಿ ಸತೀಶ್. "ಇಂಇಲ್ಲಿಯಪ್ಪಾ ಸುಮೀ?" ಮುತ್ತವ್ವ ಮೂಕೇಂದಿಯಂಡತ್. ಕರುಂಬಯ್ಯ ತಕ್ಕೇಪರೆಯತೆ ಅಳತಂಡಿಂಜತ್. "ಮಾಂವಾ" ಪಕ್ಕ ಅಳತಂಡತ್ ಸತೀಶ್. ಅಕ್ಕಣೆ ಭಾರತಿ ಅವ ಎಳ್ಳಾದ್ನ ಕಾಗದತ್ನ

ಕೊಡತತಂವಂಗೆ ಎಲ್ಲಾ ಓದ್‌ಚಿ. ಕಡೇಕ್ ದಂಡ್‌ಗೆರೆ ಅವಂಡ ಎದೆ ಕಲಕಿರತ್. "ನಾನ್ ದುಂಬುವಕಯ್ಯತ ನೀಡ ಬಾಳ್‌ನ ಭಾರತಿ ದುಂಬುವ, ನೀಡ ಮನರ ನಂದಾದೀಪ ಅವಳೊಂಡ್ ಎಲಂಗಿ ಕತ್ತಡ್, ನೀಡ ವಂಶವ್ಯಕ್ತ ಬೊಳೆಯಡ್." ಕಾಗದ ಕೀದಕ್ ಬುದ್ಧತ್, ಕೈಲ್ ಮೂಡ್ ಮುಚ್ಚಿಯಂಡ್ ಒರೇ ಪೋಲೆ ಮೊರಟತ್ ಸತೀಶ್. "ಭಾವಾ" ಕಾಕ್‌ನ ಸದ್ಲ್ ಸುಮಿರ ಸ್ವರತ್‌ನಕೇ ಕೇಟಿತ್ ಕಣ್ಣ್‌ತೊರಂದತ್. ಕಾಫಿ, ಕಪ್ಪು ಪುಡಿಚೆಂಡ್ ನಿಂದಿತಿಂಜ ಭಾರತಿನ ಸುಮಿರನಕೇ ಕಂಡತ್. ಕಾಫಿ ತೊಂಡೆಲಿಂಜಿ ಎರಂಗ್‌ಲೆ.

ಪೊಲಾಕಿಂಜಿ ಉಪವಾಸ ಇಂಜ ಮುದಾಕ ಮುದಾಕಿ ಮೊರಟಿತೇ ಸುಸ್ತಾಯಿತಿಂಜತ್. ಎನ್ನನೆಲ್ಲೊ ಭಾರತಿಯೇ ಒರ್ ಕೂಳ್‌ಕರಿ ಮಾಡಿತ್ ಅಯಿಂಗಳ ಉಂಬಿಚಿಟ್ಟತ್. ಚೆನ್ನ ಸಮಾಧಾನ ಆನದೂ ಕರುಂಬಯ್ಯ ಮೈಮನ ಕೇಟಿತ್. "ಸುಮಿರ ಕಾಗದ ಪೂರ್ತಿ ಓದಿರಾ?" "ಹೂಂ ಮಾಂವ. ಅವ ಇಚ್ಚಕ್ ಹೇಡಿ ಎನ್ನಂಗಾಯಿಟ? ದಾರೋ ಎಂತೋ ಎಣ್ಣೆಚೀಂದ್ ಪ್ರಾಣ ಕಳಂದವದಾ? ನಾನಂತೂ ಅವಳೊಂಡ್ ನಾಡ ವಂಶ ಉದ್ಧಾರ ಆಯಿಲೇಂದ್ ಒರ್‌ದಿನ ದೂರ್‌ನಂವನಲ್ಲ. ಅದ್‌ನೇಂಗಿ ಅರ್‌ಂಜವಂಡಾ ಅವ? ಇಕ್ಯ ಎಂತ ಪರಂದಿತ್ಲೂ ಫಲ ಇಲ್ಲೆ. ಅವಡ ಆತ್ಮಕ್ ಶಾಂತಿ ಕೊಟ್ಟಡ್‌ಂದ್ ಬೋಡಿಯವನ" ಎಣ್ಣೆಚಿ. ಒರ್‌ಗಳಿಗೆ ಕಯಿಂಜದೂ ಅವಂಡ ಮನಸ್ಸೂ ಬದಲಾಯಿರತ್.

"ಅಕ್ಕುವಪ್ಪಾ, ನಂಗ ಕಿಂಇಚಿ ಬೋರೆ ಬಟ್ಟೆ ಏದುಳ್ಳೊ? ಅವಡ ಆಖೀರಿ ಆಶೆನೇಂಗಿ ನೆರವೇರಿಚಿಡನಾ"ಂದೆಣ್ಣೆಯಂಡ್ ಮೈಮಂಡ ಮೂಡೇ ನೋಟ್‌ಚಿ ಕರುಂಬಯ್ಯ. ಅವಂಡ ಜವಾಬೇ ಇಲ್ಲೆ "ಸುಮೀ, ಒರೂ ಸುಂಯ್‌ಂಕ್ ತಕ್ಕತೆ ನನ್ನ ಇಕ್ಕಳತ್ ಚಿಕ್ಕನೆನಕೆ ಮಾಡಿಟಿಯಲ್ಲಾ, ನೀನಿಲ್ಲತೆ ನಾಡ ಬಾಳ್‌ ಎನ್ನಾಕು? ನೀನಿಲ್ಲನೆಕೆ ಭಾರತಿ ನಾಡ ಮನೆದುಂಬ್‌ಚೀಂಗಿಯೂ ಮನದುಂಬುವಾ? ಸತೀಶ್ ಎಲ್ಲಿಯೋ ಶೂನ್ಯತ್ ನೋಟಿಯಂಡ್ ಬೇರ್‌ಚಿಟ್ಟತ್. ಅವನಾಯಿತೇ ತೀರ್ಮಾನ ಎಡ್‌ತವಡ್‌ಂದ್ ಅವಡೊಟ್ಟಕೇ ಬುಡುವಂಜಿ ಅಯಿಂಗ ಅಲ್ಲಿಂಜಿ ಎದ್ದತ್. ಮನರ ಒಳಲೂ, ಪೊರಮೆಲೂ ಸುದ್ದಿ ಅರಿಂಜಿತ್ ಬಂದ ಜನಕ್ ಬೆಂದಕಕ್ ವಿಷಯತ್‌ನ ಎಣ್ಣೆತ್ ಚೋತತ್. ಎಲ್ಲಾರೂ "ಚತ್ತಾರುವದಾ ಬಲ್ಯದಲ್ಲ ಇಂಜಿತ್ ಬಂದಾನ ಧೈರ್ಯತ್ ಎದರ್‌ಚಿಡಂಡು". "ಪೋಡ್‌ಬುಡಿ, ನಿಂಗಡದೊಂದೂ ತಪ್ಪಿಲ್ಲೆ. ಅವಡದೇ ತೀರ್ಮಾನ. ಅವಡ ಆಶೆನ ಪೂರ್ತಿಮಾಡಿ.

ಅಂದಕೇ ಅವಡ ಆತ್ಮಕ್ ಶಾಂತಿ. "ಅಕ್ಕು, ಅಕ್ಕು" ನಾಲಾಳ್ ಒಕ್ಕಚೇ ಎಣ್ಣೆಚಿ. ಬಂದಯಿಂಗೆಲ್ಲ ಪೋಚಿ. ಸತೀಶ್ ಎಲ್ಲಿ ಪೋಚೀಂದ್ ನೋಟುವಕ್ ಬಾತ್ ಕರುಂಬಯ್ ಪೂರಮೆ. ಅಂವೊ ಗೇಟ್‌ದಾಟಿತ್ ಪೋಯಂಡಿಂಜತ್ ಕಾಲೇತಂಡ್ "ಭಾರತೀ ಭಾವನ ಕಾಕ್ ಪೋ" ಮೋವಳ ಅಯೆಚತ್ ಕರುಂಬಯ್. ಆಚೀಂಗಿ ಅಂವಂಗ್ ಕಾಕ್‌ನದ್ ಕೇಟದೇ ಇಲ್ಲೆ. ಪೋಯಂಡೆ ಇಂಜತ್. ಅನ್ನನೇ ಪೋನಂವೊ ಮನೆಕೂ ಬಂದ್‌ಲೆ. ಅಲ್ಲಿ ಅಂವಂಡ ಮನೆಕೂ ಪೋಯಿಲೆ, ಅಂವಂಡ ಪ್ರೀತಿ ಸುಮಿನ ತೇಡಿಯಂಡೇ ಪೋಯಿರ್‌ತ್. ಅಂವನ ಮರ್ಚಿತ್ ದಾರೂ ಕಂಡ್‌ಲೆ! ಮೋವಡ ಆಶೆನ ತೀಪಕಯಿಂಜಿಲೇಂದೆಣ್ಣೆವ ಕೊರಗ್ ಮುದಾಕಂಗಕ್ ಕಡೇಕೆತ್ತಣೆ ಉಳ್‌ಂಚಿಪೋಚಿ.

## ತ್ರಿಶಂಕು

ಅಂದ್ ಆ ಊರ್ಲ್ ಒರ್ ಹೈಸ್ಕೂಲ್‌ಕ್ ಗುದ್ದಲಿಪೂಜೆರ ಕಾರ್ಯಕ್ರಮ ಇಂಜತ್. ಪಕ್ಕತ್ ಪಳೆಯ ಸ್ಕೂಲ್‌ರ ಹಾಲ್‌ರ ಒಳ್‌ಲ್ ಪೆರ್ತ ಜನ ಕೂಡಿತಿಂಜತ್. ಎನ್ನೇಂಗಿ ಗಲಾಟೆ ಆಕೂಂದ್ ಪೋಲೀಸ್‌ಕಾರ ಒಳ್‌ಲ್ ಪೊರಮೆಲ್ ಎಚ್ಚರಿಕೆಲ್ ನೋಟಿಯಂಡಿಂಜತ್. ವೇದಿಕೆರ ಕೊಡಿಲ್ ಪೆರ್ತ ಚಾಯಿಲ್ ಸೀಟ್ ಏರ್ಪಾಡ್‌ಮಾಡಿತಿಂಜತ್. ಚೆನ್ನಂಗ್ ಮುಕ್ರಿಯ ಅಡಿಕೂ ಕೊಡಿಕೂ ಒಳ್‌ಕೂ ಪೊರಮೆಕೂ ಓಡಿಕಳಿಪದೂ, ತಕ್ಕ್‌ಪರಿವದೂ ಮಾಡಿಯಂಡಿಂಜತ್. ನೇರ ಆಯಂಡ್ ಬಂದನಕೇ ಜನಡ ಗಲಾಟೆ ಶುರುವಾಚಿ. ಒರ್ ಮುಕ್ರಿ ಮೈಕ್‌ರೆದಿಕೆ ನಿಂದತ್. "ಅಟೆನ್ನನ್ ಪ್ಲೀಸ್" ಜನಡ ಸದ್ದಡಂಗ್‌ಚಿ. ನಿಂಗೆಲ್ಲ ಕಾತಿತ್ ಚೋತಿತುಳ್ಳಿರಾಂದ್ ಗೊತ್ತುಂಡ್. ಚೀಫ್‌ಗೆಸ್ಟ್ ಇಂಇಶೆನ್ಸ್ ಬಂದ್‌ರುವ. ಅಯಿಂಗಕ್ ಮಡಿಕೇರಿಲೂ ಒರ್ ಕಾರ್ಯಕ್ರಮ ಉಂಡ್. ಅದ್‌ನ ತೀತಂಡ್ ಬರಂಡು. ನಿಂಗೆಲ್ಲಾ ಸಮಾಧಾನತಿರಂಡು "ವಾಚ್ ನೋಟಿಯಂಡ್ ಎಣ್ಣೆಚಿ. ಜನ ಮುಂಡತೆ ಕಾತಂಡಿಂಜತ್. ಪುನಃ ಗುಜು ಗುಜು ಸದ್ದ್ ಜಾಸ್ತಿಯಾಚಿ. ಪೊರಮೆ ಕಾರ್, ಜೀಪು ಬಂದ ಸದ್ದ್ ಕೇಟತ್. ಓ! ಗೆಸ್ಟ್ ಬಾತ್‌ಂದ್ ಜನಡ ಕೂತ್ ಕೇಟತ್. ಅಂತೂ 'ಇಂಡಿಯನ್ ಪಂಕ್ಚುವಾಲಿಟೆ' ಎಣ್ಣೆವನಕೆ ಒರ್ ಗಂಟೆ ತಡ ಮಾಡಿತ್ ಗೆಸ್ಟ್ ಬಾತ್. (ಗೆಸ್ಟ್) ಮುಖ್ಯಬೆಂದು ಅಂವಂಡ ಕೂಟಾಳಿಯ, ಮುಕ್ರಿಯ, ಪಾರ್ಟಿಕಾರ ಅಧ್ಯಕ್ಷ ಇನ್ನನೆ ಬೋಂಡಿಯ ಜನ ಅಯಿಂಗಡ ಕೂಡೇ ಇಂಜತ್.

ಗುದ್ದಲಿಪೂಜೆ ನಡಂದತ್ "ಅಂತೂ ಈ ಊರ್‌ಕೋರ್ ಹೈಸ್ಕೂಲ್

ಬೋಂಡೂಂಡ್ ಎಚ್ಚಕ್ ಕಾಲತಿಂಜಿ ಪೋರಾಡಿತ್ ಇಕ್ಕ ಅದಂಗ್ ಕಾಲ ನೇರ ಬಂದಿತೆತ್ತಚಿ" ಎಣ್ಣೆಚಿ ಒಬ್ಬೊ. "ಇದಿಕ್ಕ ಸುರೂವತ ಮೊಟ್ಪ್. ಅದ್ ಪೂರ್ತಿಯಾಂಡುವೇಂಗಿ ಕಾಲ ಅಂಜಾರೇ ಬೋಂಡು ಕಾಂಬ" ತೆಳ್ಚೆತ್ ಒಬ್ಬೊ. ಇನ್ನನೆ ಆಳಣ್ಣ ಓರಂದ್ತರ ತಕ್ ಪರಂದಂಡ್ ಹಾಲಾರೊಳ್ಚ್ ಬಾತ್. ಮುಖ್ಯಬೆಂದು ಪಂಚಾಯಿತಿ ಅಧ್ಯಕ್ಷ ಮುಕ್ರಿಯ ಇನ್ನನೆ ಅಂಜಾರ್ಜನ ವೇದಿಕೆಲಳತತ್. ಸ್ವಾಗತ ಭಾಷಣ, ಪೂಮಾಲೆ ಅರ್ಪಣೆ ಎಲ್ಲಾ ಆಚಿ. ದಂಡ್ ಮುಕ್ರಿಯಡ ಚುಟ್ಕ ಭಾಷಣ ಆಚಿ. ಕಡೇಕ್ ಮುಖ್ಯ ಬೆಂದುರ ಭಾಷಣ ಶುರುವಾಚಿ. ಮುಖ್ಯ ಬೆಂದು ಶಾಸಕ ವಿಶ್ವನಾಥ್. ನಂಗಡ ನಾಡ್ ಚೆರಿಯದಾಚೇಂಗಿಯೂ ಕೇಳಿ ಬಲ್ಯದೇ ಪಂಡ್ ಗಾಂಧೀಜಿ ಸೊಪನ ಕಂಡ ರಾಮರಾಜ್ಯ ಆಕಂಡುವೇಂಗಿ ನಂಗೆಲ್ಲಾರೂ ಪ್ರಯತ್ನ ಪಡಂಡು. ಜಾತಿ, ಮತ, ಭೇದ ಬುಟ್ಟಿತ್ ಎಲ್ಲಾರೂ ಒತ್ತೊಮೆಲ್ ನಾಡ್ಕಾಯ್ ನೈಕಂಡು. ಗರೀಬ, ಭಲ್ಯವೊ ಎಣ್ಣಾವ ತಾರತಮ್ಮ ಬೆಪ್ಪಕಾಗ. ಇಂದ್ ಗರೀಬನಾಯಿತುಳ್ಳಂವೊ ನಾಳೆ ಮಂತ್ರಿಯಾಪಕೂ ಮದಿ. ಪೊಮ್ಮಕ್ಕಡ ವಿದ್ಯಾಭ್ಯಾಸ ಅಯಿಂಗಕ್ ಸರಕಾರ ಕೊಡ್ಕಂಡೂಂದೆಣ್ಣಾವ ಮೀಸಲಾತಿ ಕೊಟ್ಟತೇ ಕೊಟ್ಟಂಡು. ಅಯಿಂಗಳೂ ಏದ್ ಆಣ್ಕೂ ಕಮ್ಮಿ ಇಲ್ಲತೆನಕೆ ಪೋರಾಡಂಡು. ನಾಡ್ಲುಳ್ಳ ಭ್ರಷ್ಟಾಚಾರ, ಲಂಚಕೋರತನ ಇದ್ನೆಲ್ಲ ನಂಗಡ ಸಮಾಜತಿಂಜಿ ಎಡ್ತೆಚಾಡಂಡು. ಅದಂಗ್ ಇಕ್ಕತ್ತರ ಬಾಲೆಕಾರ ಬಾಲೆಕರ್ತಿಯ ಸೊಂಟಕೆಟ್ಟಂಡು" ತೊಂಡೆಲ್ ನೆರು ಬಲ್ಚೆಂಡ್ ಪರಂದತ್ ವಿಶ್ವನಾಥ್. ಪೋಟೋ 'ಕ್ಲಿಕ್' ಎಣ್ಣೆಚಿ. ಜನಡ ತಪ್ಪಳೆ ಜೋರಾಚಿ. ವಿಶ್ವನಾಥ್ ಜನಕೆಲ್ಲ ನಾಡ ಭಾಷಣ ಕೇಟೆತ್ ಕುಶಿಯಾಯಿರ್ತೆಂದ್ ತಾಂಡ ಬೆನ್ನನ ತಾನೆ ತಟ್ಟಿಯಂಡತ್ ಮನಸ್ಸಲೆ. ದಂಡ್ಗುಡ್ಕ್ ನೀರ್ ಕುಡಿಪಂಜಿ ಪುನಃ ಶುರು ಮಾಡ್ಚಿ.

"ಇಚ್ಚಕ್ ಪರೆವಂವೊ ನಂಗಡ ನಾಡ್ಕಾಯ್ ಎಂತೇಂಗಿ ನಲ್ಲ ಕಾರ್ಬಾರ್ ಮಾಡಿತಾ? ನಂಗಡ ಊರ್ ರಸ್ತೆಲ್ ದಂಡ್ ದಿನ ನಡಂದ್ ನೋಟಡ್ ಗೊತ್ತಾಪ. ಎಚ್ಚಕ್ ಗರೀಬಂಗಕ್ ಸರಕಾರತಿಂಜಿ ಕೊಟ್ಟುವ ಸಹಾಯ ಪಣ ಕೊಟ್ಟೆಂದ್ ಅರಿಂಜಿತಾ? ಇಲ್ಲಿ ನಿಂದಂಡ್ ಭಾಷಣ ಬಿಗಿವಂಜಿ ಭೇಷ್ಂದ್ ಎಣ್ಣೆ ಚಿಟ್ಟಂಡಕ ಮದಿಯಾ? ಇಯಂಗಡೆಲ್ಲ ಯೋಗ್ಯತೆ ನಂಗಕ್ ಗೊತ್ತಿಲ್ಲತದಾ?" ಇನ್ನೆಲ್ಲ ಜನ ಗುರು ಗುರು ಪರಂದಂಡಿಂಜತ್. ಪಕ್ಕತ್ ಅಳತಯಿಂಗಳೂ ಕೆಮೀನೇರ ಮಾಡ್ಚಿ. "ಅಲ್ಲಣ್ಣಾ ನಿಂಗನ್ನಂಗ್ ಅಯಿಂಗಳ ಬಯ್ಯುವೊ? ಅಯಿಂಗಳ

ಕೊಂಡ್ ನಂಗಕ್ ಇಂಞೂ ಎಂತದೆಲ್ಲ ಕಾರ್ಬಾರ್ ಆಪಕುಂಡ್? ಇಲ್ಲಿಕ್ ಇಂಞೋರ್ ಕಾಲೇಜ್ ಆಕಂಡು, ಕುಡಿಪ ನೀರಾರ ವ್ಯವಸ್ಥೆ ಆಕಂಡು, ನಿರುದ್ಯೋಗಿ ಬಾಲಕಾರ ಎಚ್ಚಕುಂಡ್? ಅಯಿಂಗಕ್ ಉದ್ಯೋಗ ಕ್ಕಟ್ಟಂಡ್? ಇಯಂಗಡ ಶಿಫಾರಸ್ಸು ಇಲ್ಲತೆ ಕಾರ್ಬಾರಾಪ? ಕೇಟತೊಬ್ಬೊ. "ಹಾಂ ಎಲ್ಲಾ ಆಪ ಕಾತಂಡಿರಿ. ಎಲ್ಲಾ ಬಾಯಿಲ್ ಮಾತ್ರ ಉತ್ತರಕುಮಾರಂಡನೆಕೆ. ಕೈಲೊಂದು ಕಿಸಿಯುಲೆ" ಒಬ್ಬೊ ಎದ್ದತ್. ಅಂವೊ ಪೋಪಾನೇ ನೋಟ್ಯಂಡಿಂಜವು ಒಬ್ಬೊ ಒಬ್ಬೊಂದ್ ಜಾಗ ಖಾಲಿ ಮಾಡ್ಚಿ. ಹಾಲ್‌ಲ್ ಗುಜು ಗುಜು ಶುರುವಾಚಿ. ಕಾಲ್‌ಗಂಟಲ್ ಎದಿಕೆ ಸಾಲ್‌ಲಳತಂಡಿಂಜ ಚೆನ್ನ ಸೂಟ್‌ಬೂಟ್‌ಕಾರಳ ಬುಟ್ಟಿತ್ ಸಾಮಾನ್ಯಂಗ ಎಲ್ಲಾ ಪೋಯಿರ್‌ತ್. ವಿಶ್ವನಾಥ್‌ಕ್ ಪಚ್ಚೆಮೀನ್ ಕಡ್‌ಚನೆಕೆ ಆಚಿ. ಬೆರಿಯ ಭಾಷಣ ತೀಪಂಜಿ ಬೆವರ್ ತ್‌ಟಿಯಂಡ್ ಅಳತತ್. ಜನ ಎಲ್ಲಾ ನನ್ನ ಕೊಂಡಾಡುವಾಂದ್ ಗೇನ ಮಾಡ್‌ನವಂಗ್ ಮೂಡ್‌ಕ್ ಚಾಣಕನ್‌ಚನೆಕೆ ಆಚಿ.

\* \* \*

ವಿಶ್ವನಾಥ್ ಬೋರೆ ಕಾರ್ಯಕ್ರಮ ತೀತಂಡ್ ಮನೆಕ್ ಬಾತ್. ಅವನ ಕಾಂಬದೂ ಪೊಣ್ಣೂ, ಮೋವಳೂ ಮೊರಡುವ ಕೂಡಿರ್‌ತ್. "ಪಪ್ಪಾ ಅಭಿನ್‌ರ ಮನೆನ ಪೋಲೀಸ್ ರೈಡ್ ಮಾಡಿತ್‌ಲೋ, ಎಚ್ಚಕೋ ಲಕ್ಷಣ ಪಣ ಕ್ಕಟ್ಟಿತ್‌ಲೋ, ಅವನೋ ಸಸ್ಪೆಂಡ್ ಮಾಡಿತ್. ನಂಗಕ್ ಇಕ್ಕ ವಿಷಯ ಗೊತ್ತಾಚಿ". ಮೋವ ಶಾಲಿನಿ ವರದಿ ಒಪ್ಪಿಚಿಟ್ಟತ್. ವಿಶ್ವನಾಥಂಗ್ ಶಾಕ್ ! ಮೋಂವಂಡ ಮನೆಕ್ ಪೋನ್ ಮಾಡ್‌ಚಿ " ಹಲೋ ಕುಮಾರಿ ನೀನಾ? ಅಭಿನ್ ಎಲ್ಲಿ ಉಂಡ್?" "ಇಲ್ಲಿಯೇ ಉಂಡ್ ಮಾಂವಾ, ನಂಗಡ ಮನೆ ಎಲ್ಲಾ....." ಆ ಬರಿಲಿಂಜಿ ಮೊರಡುವ ಸದ್ದ್ ಕೇಟತ್. "ನಾನ್ ಇಕ್ಕಲೇ ಬಂದ, ಬೇಜಾರ್ ಮಾಡತೆ" ಪೋನ್ ಬೆಚ್ಚತ್. ಅದೇ ಮಿನಿಟ್‌ಲ್ ಅಭಿನ್‌ರ ಮನೆಕ್ ಪೊರಟತ್. ಮಂಡಕ್ ಕೈಕೊಡ್‌ತಂಡ್ ಬೇರತಳತ ಮೋಂವೊ. ಮೊರಟಿತ್ ಮುದಾರಿಯಂಡಳತ ಮೈಮಳ ನೋಟಿತ್ ಬೇಜಾರಾಚಿ. "ಅಲ್ಲಪ್ಪಾ ನೀಕೆಚ್ಚಕೆಣ್ಣಾನೇ ? ಚೆನ್ನ ಎಚ್ಚರತಿರ್. ಇಕ್ಕತ್‌ರ ಕಾಲತ್ ಲಂಚ ಎಡ್‌ಕತೆ ಕಾರ್ಬಾರಾಪುಲೇಂದ್ ನಾಕ್ ಗೊತ್ತುಂಡ್. ನೀಡ ಪೊಣ್ಣಾರ ಉಪದೇಶ ಕೇಟಂಡ್ ಒಮ್ಮಕೇ ಆಕಾಶಕ್ ಏಣ ಬೆಪ್ಪಕ್ ಪೊರಟಿಯಲ್ಲಾ ಅದ್‌ಂಡ ಫಲ ಇದ್. ನಾಕಿಕ್ಕ ಪೊರಮೆ ಮೂಡ್‌ಡುವ ಕಯ್ಯುವಾ? ನೀನ್ ನಾಡ ಜೊತಲೇ ಇಂಜಿತಿಂಜಕ ಇನ್ನನೆ ಆಪಕಿಂಜಿಲೆ ನಿನ್ನ



ಬೋರೆ ಅಯೆಚದೇ ತಪ್ಪು. ಪೋಡ್ ಬುಡ್ ಆಲೆ ಬಂದದ್ ಈಲೆ ಪೋಚಿ. ಇಂಇಂಚಿಂಗಿ ಬುದ್ಧಿ ಬಕ್ಕುವಾ?" ಮೈಮಳ ಕೇಟತ್ "ವಡಿಯಂಡ ಸಂಪಾದನೆ ಪೋರಾಂದ್ ಅವನ ಪಾಳೆಬಟ್ಟೆಕ್ ಉಳೆಪಿಯಲ್ಲಾ ಪೊರಮೆ ನೀಡ ಪ್ರೆಸ್ಪೀಚ್ ಕಾಟಿಯವಕಾಯಿತ್ ಅವನ ಲಂಚತ್‌ರ ಬಲೆಕ್ ಬೂಕ್‌ನವ ನೀನ್. ಅದಂಡ ಪ್ರತಿಫಲ ಇಕ್ಕ ಉಂಬಕಾಚಿ. ಮೂಡ್‌ಕ್ ತುಪ್ಪಿಚಿಟ್ಟಂಡ್ ಬದ್‌ಕುವಕಾಚಿ. ಥತ್! ಕುಮಾರಿನ ಶತ್ರುನಕೆ ನೋಟಿಚಂವೊ. "ಅಕ್ಕು, ಇಕ್ಕ ಎಲ್ಲಾ ತಪ್ಪು ನಾಡದೇ, ನಿಂಗ ಮಾಡ್‌ನದೂ ಅದೇ ಕೇತರೆ. ಎನ್ನೋ ಅದ್ಯಷ್ಟು ಚಾಯಿಂಜತ್ ಚಿಕ್ಕಿಬುದ್‌ಲೆ. ಇಕ್ಕ ನೆಲಕ್ ಬುದ್ಧಕೋ ಮೀಸೆ ಮಣ್ಣಾಯಿಲೇಂದ್ ಬಡಾಯಿಕಳಿಪಿರಾ" "ಕುಮಾರೀ"ಂದ್ ಕೂತ್‌ಟ್ಟತ್ ಅಭಿನ್. "ಪಪ್ಪಂಗ್ ತಿರೀತ್ ಎಣ್ಣಾವಚ್ಚಕ್ ಆಯಿಟಿಯಾ?" ಎದ್‌ನಿಂದಂವನ ಅಳಿಪಿಚಿಟ್ಟತ್ ವಿಶ್ವನಾಥ್. "ಎನ್ನೋ ಜನಸಹಾಯ ಇಂಜಾಂಗ್ ಜೈಲಲ್ ಕೊಳೆವಕಾಯಿಲೆ" ಊಜಳೆ ಬುಟ್ಟಂಡತ್ ಪಾರ್ತಿಕಾರಡ, ಹಿತ್ಯೆಷಿಯಡ, ಪೋನ್‌ಕಾಲಕ್ ಜವಾಬೆಣ್ಣೆತೇ ಮದಿಯಾಚಂವಂಗ್ ವಿರೋಧ ಪಾರ್ತಿಕಾರ ಸುದ್ದಿ ಕೇಟಿತ್ ಕುಶಿಪಟ್ಟತ್.

ಪತ್ರಿಕೆಲ್ ಅಭಿನ್‌ರ ಸುದ್ದಿ ಓದ್‌ನ ನಂಜಪ್ಪಂಗ್ ಪಳೆಯ ಸಂಗತಿ ಗೇನ ಬಾತ್. ನಂಜಪ್ಪ ಆ ಊರ್‌ರ ಸ್ಕೂಲ್‌ರ ಮುಖ್ಯೋಪಾಧ್ಯ. ನಾನಂದ್ ಗರೀಬನಾಯಿತಿಂಜ ಆರಡಿರ ತಡಿನ ಮೂಂದಡಿ ಮಾಡಿಯಂಡ್ ಕೈತೊತ್ತಂಡ್ ಅಂವಂಡ ಎದಿಕೆ ನಿಂದಂಡ್ "ವಿಶೂ, ನೀನ್ ನಾಡ ಬಾಲ್ಯತ್‌ರ ಸಿನೇತಂದ್ ನಂಬಿಗಲ್ ಬಂದಿಯೆ. ನಾಡ ಮೋಂವಂಗೊರ್ ಚಾಕ್ರಿಕ್ ಶಿಫಾರಸ್ ಮಾಡಿತಾ, ನೀಡ ಉಪಕಾರ ಎಂದೂ ಮರೆಪುಲೇಂದ್ ಗೋಗರ್‌ದ್ ಬೋಡಿಯಂಡ. ಅಂವೊ ಧಿಮಾಕ್‌ಲ್ ಪರಂದ ತಕ್ಕಿಂತ?" ನೋಟ್ ನಂಜೂ ನಾಡ ಸಿನೇತಂದ್ ನೀಡ ಮೋಂವಂಗ್ ಶಿಫಾರಸ್ ಮಾಡಿಚೆಂಗಿ ಜನ ನನ್ನ ಸ್ವಾರ್ಥಿಂದೆಣ್ಣಾವಾ. ಈ ಸ್ನೇಹ, ಬೆಂದೂರ್ತ ಇಂತಾಂಗೆಲ್ಲ ನಾಡ ಪಕ್ಕ ಬಪ್ಪದ್ ಬೋಂಡ. ಅವನ ಪಟ್ಟಾಳಕಯೆ ಇಲ್ಲೇಂಗಿ ಬೋರೆ ಚಾಕ್ರಿಕ್ ಕೂಟ್. ನಾನಿಕ್ಕ ಅರ್ಜೆಂಟ್ ಪೊರಟಿಯೇ, ನಾಕ್ ಸಮಯ ಇಲ್ಲೆ. ಇಂಇಂಚೋರ್ ದಿನ ಕಾಂಗ್" ಎಣ್ಣೆತ್ ಅಳಿಪಕೂ ಎಣ್ಣೆತೆ ಅಯೆಚಿರ್‌ತ್, ನಿಂದ ಕಾಲಾಲೇ ಬಯ್ಯಕ್ ಬಂದ್‌ಟಿ. ಇಕ್ಕಿನ್ನ ನಾಡ ಮೋಂವಂಗ್ ಚಾಕ್ರಿ ಕಟ್ಟಲೆಯಾ? ಬಯ್ಯಂಜಿ ಅರಿವಕ ಅದೇ ಚಾಕ್ರಿನ ಅಂವಂಡ ಮೋಂವಂಗೇ ಮಾಡಿಕೊಡ್‌ತ ಸ್ವಾರ್ಥಿ! ಇಕ್ಕಿನ್ನಾಚಿ? ಅಂವಂಡ ಅಹಂಕಾರಕ್

ತಕ್ಕ ಫಲ ಕೊಟ್ಟಿಚೆಲ್ಲಾಂದ್ ಗೇನ ಮಾಡಿಯಂಡ್ ಪೊಣ್ಣ್ನ ಕಾಕಿತ್ ಪತ್ರಿಕೆಲಿಂಜ ಸುದ್ದಿನ ಕಾಟಕೊಡ್ತತ್.

\* \* \*

"ಪೋಕಡ್ ಬುಡಿ. ಒಬ್ಬೊ ಪಾಳಾಚೀಂದ್ ನಂಗ ಕುಶಿಪಡುವಕಾಗ. ಸದ್ಯ ನಂಗಡ ಪ್ರವೀಣ್ ಅನ್ನನೆ ಆಕತೆ ಪೋಚೇಂಗಿ ಮದಿ" ಎಣ್ಣ್ ಚವ. "ಅಂವೊ ನಾಡ ಮೋಂವೊ ಆ ಅಹಂಕಾರಿರ ಮೋಂವೊ ಅಲ್ಲ. ಆಚೇಂಗಿಯೂ ಅಂವೊ ನಾಡ ಸಿನೇತ. ಅಂವಂಗ್ ಇನ್ನನೆ ಆಕಂಡಿಂಜಿಲೇಂದ್" ಕನಿಕರತ್ ಪರಂದತ್. ಊರ್‌ಡೀ ಇದೇ ಗುಸು ಗುಸು. ಓಹೋ ಅಪ್ಪೊ ಮೀಸೆ ತಿರ್‌ಕಿಯಂಡ್ ಬಳ್ಳಾಸ್ ಪರಂದದೇ ಪರಂದ. ಭ್ರಷ್ಟಾಚಾರ, ಲಂಚಕೋರತನ ನಿರ್ಮೂಲ ಮಾಡಂಡೂಂದ್. ಅಲ್ಲಿ ಮೋಂವೊ ಲಂಚ ಎಡ್‌ಪಂಜಿ ಕೆಲಸ ಕಳಂದಂಡತ್ "ನಾಡ್ ಅಡಕುವವಂಗ್ ಬೂಡ್ ಅಡಕುವಕಯ್ಯಲ್" ಎಣ್ಣುವಲ್ಲಾ ಅನ್ನನೆ. ಚೆನ್ನ ದಿನ ಕಯಿಂಜದೂ ಊರ್‌ಜನ ಅದ್‌ನ ಮರಂದತ್. ಇಂಜಕಿಂಜನೆಕೇ ಊರ್‌ಲೆಲ್ಲಾ ಸುದ್ದಿಯೋಡ್ ಸುದ್ದಿ. ವಿಶ್ವನಾಥ್‌ರ ಮೋವ ಹೈದರಾಬಾದ್‌ಲಿಂಜ ಬಂದ ಅವಡೋರ್ ಸಿನೇತಂಡ ಕೂಡೆ ಸೈಟ್‌ಸೀಯಿಂಗ್, ಪಿಕ್‌ನಿಕ್‌ಂದೆಲ್ಲಾ ಓಡಿಕಳಿಚಂಡಿಂಜತ್‌ಲೋ. ಪೋಪಕ ಶಾಲಿನಿಯೂ ಅಂವಂಡ ಕೂಡೆ ಪೋಯಿರ್‌ತ್‌ಲೋ. ಇನ್ನನೆ ಲೋ, ಲೋ, ಎಣ್ಣೆತ್ ಎಲ್ಲಲ್ಲಿಯೂ ಸುದ್ದಿ ಪಬ್ಲಿಚಿ. "ಯ್ಯೋ, ದೇವ ನಾಕೆನ್ನಂಗ್ ಪೊಯ್ತರ ಮೀದ ಪೊಯ್ತ ತಂದಂಡುಂಡ್? ನಾಡ ದೆಸೆಚಾಯಿಲ್ಲೆ. ಚೆನ್ನ ದಿನ ಈ ಜಾಗಬುಟ್ಟಿತ್ ಎಲ್ಲಿಯೇಂಗಿ ಪೋಯಿರನಾಂದ್" ಪೊಣ್ಣ್ ಸರೋಜಿನಿರ ಕೂಡೆ ಎಣ್ಣ್ ಚಿ. "ಇಕ್ಕ ಪೋಚೇಂಗಿ ಜನಕ್ ತೆಳಿಪಕ್ ಚಾಯಾಚಿ. ನಂಗ ಮಕ್ಕಳ ಎಚ್ಚಕ್ ಚಾಯೋಡೆ ಚಾಕ್‌ಚಿ? ಅಯಿಂಗಕ್ ಒಂದೂ ಕಮ್ಮಿ ಮಾಡಿತಿಲ್ಲೆ. ಆಚೇಂಗಿಯೂ ಅಂವೊ ಅನ್ನನಾಚಿ, ಇವ ಇನ್ನನಾಚಿ. ಆ ಮೂಡಿಕ್ ನಂಗಡ ಬಾಲೆಕಾರ ದಾರೂ ಕೊಟ್ಟಿಲೆಯಾ ಮಂಗಲ ಕೈಪಕ್? ನಂಗಡ ಮೂಡ್‌ಕ್ ಮಸಿ ಮೆತ್ತುವ ಕಾರ್ಬಾರ್ ಮಾಡಿರ್‌ತ್ ದಂಡಾಳೂ. ವಡಿಯನೂ ಪೊಣ್ಣೂ ಇದ್‌ನೇ ಪರಂದ್ ಪರಂದ್ ಕಡೇಕ್ ಮುಂಡತಾಚಿ. 'ನಾನೆಚ್ಚೆಕೆಣ್ಣ್‌ನ ಈ ರಾಜಕೀಯತ್‌ರ ಸಾವಾಸ ಬೋಂಡ, ನಾಡ್‌ಲ್ ಪೋಯಿತ್ ನೆಮ್ಮ ದಿಲಿಕ್ಕನಾಂದ್, ಅಧಿಕಾರ, ಅಂತಸ್ತ್, ಬಂದಚ್ಚಕೂ ಆಸೆ ಏರ ನಿಂಗಕಿಂಜ ಆ ಚೆರಿಯ ಚಾಕ್ರಿಯೇ ಮದಿ ಇಂಜತ್. ನಾಡ ತಕ್ಕ ಕೇಕತೆ ಇಕ್ಕ ಎಲ್ಲಾ ಪಾಳಾಯಿರ್‌ತ್"ಂದ್ ಸರೋಜಿನಿ ಕೊರಗ್‌ಚಿ. "ಸದ್ದಿಲ್ಲತೇ ರಾಜೀನಾಮೆ ಕೊಡಿ, ನಾಡ್‌ಕ್ ಪೋಯಿರನಾ" ಎಣ್ಣ್ ಚಿ. ವಿಶ್ವನಾಥ್ ಒತ್ತಂಡ್‌ಲೆ.

ಅಂವಂಗ್ ಇಂಜಕಿಂಜನೆಕೇ "ಹಾರ್ಟ್ ಅಟ್ಯಾಕ್" ಆಯಿರಾತ್. ಸರೋಜಿನಿಕ್ ದಿಕ್ಕೆ ಕಾಣತಾಚಿ. ಇದೆಲ್ಲಾ ನಾಡ ಪೂರ್ವಾರ್ಜಿತ ಕರ್ಮವಾ? ಅಲ್ಲಾ ಇಯಂಗಡ ಮಿತಿಮೀರಾನ ಕಳಿಕ್ ದೇವತಂದ ಶಿಕ್ಷೆಯಾ? ಜನಡ ಶಾಪವಾ? ಒಂದೂ ಗೊತ್ತಾಕತೆ ದೇವಕ್ ಪರಕೆ ಕೆಟ್ಟತ್ ಬೆಚ್ಚತ್.

ವಿಶ್ವನಾಥ್‌ನ ಬಲ್ಯ ನರ್ಸಿಂಗ್ ಹೋಮ್‌ಕ್ ಕೂಟಿತ್ ನೀರರೆನಕೆ ಪಣ ತೊರಿಂಜತ್. ಅಂವಂಡ ಚೇಲಂಗಳೂ ಇರಾಳೂ ಪೊವುಲೂ ನೋಟಿಯವಂಜತ್. ಜನ ಮಾತ್ರ ವಿಶ್ವಾಸ ಕಳಂದಂಡತ್. ನಾನ್ ನಾಕಾಯ್ ಒಂದೂ ಮಾಡಿಯಂಡಿತಿಲ್ಲೆಂದ್ ಅಂವೊ ಎಣ್ಣಾವಂಜತ್. ಬೋರೆ ಬೋರೆ ಜಾಗತ್ ತೆಂಗತೋಟ, ಪೊಲ, ನಾಲಂಜಿ ಮನೆ ಇನ್ನನೆ ಬೋಂಡಿಯಚ್ಚಕ್ ಆಸ್ತಿ ಮಾಡಿತಿಂಜತ್. ವಿಶ್ವನಾಥ್ ಕಾಯಿಲ ವಾಸಿಯಾಯಿತ್ ಮನೆಕ್ ಬಾತ್ 'ಚಿನ್ನಂಗೇ ದಿನತ್ ಜನ ಅಂವಂಡ ಮನೆರೆದಿಕೆ ನಿಂದಂಡ್ ಕೂತ್‌ಡುವಕ್ ಶುರುಮಾಡ್‌ಚಿ. ಅಂವೊ ಮಾಡ್‌ನ ಅನ್ಯಾಯತ್‌ನೆಲ್ಲ ಪಾಡುವ ಕೂಡ್‌ಚಿ' ಜನ ಎರ ಕೂಡ್‌ನೆನಕೇ ಗಲಾಟೆಯೂ ಅಧಿಯಾಚಿ. ಪೊಲೀಸ್ ಪಡಬಾತ್ ಮನೆರ ಸುತ್ತು ನಿಂದತ್ ಗಲಾಟೆ ಅಡಕುವಕ್ ಲಾರಿ ಚಾರ್ಜ್ ಮಾಡಂಡಿಯಾಚಿ.

ಅದೇ ರಸ್ತೆಕಾಲೆ ಪೋಯಂಡಿಂಜ ನಂಜಪ್ಪ ಇದೆಂತ ಗಲಾಟೆಂದ್ ನಿಂದ್ ನೋಟ್‌ಚಿ. ಏದೋ ಒರ್ ಸೆರೆಕಾಲೆ ವಿಶ್ವನಾಥ್‌ನ ಮನೆರ ಟೆರೇಸ್‌ಕ್ ಪತ್ತಿರಾತ್. "ನಿಪ್ಪಾಚಿಡಿ ಲಾರಿ ಚಾರ್ಜ್, ಒಬ್ಬಂಡ ತಪ್ಪಾಕ್ ಆಯಿರಾಳಾಕ್ ಎನ್ನಂಗ್ ಶಿಕ್ಷೆ? ಇಕ್ಕ ಅಯಿಂಗ ತಕ್ಕ ಪರೆವ ಸ್ಥಿತಿಲಿಲ್ಲೆ. ನಿಂಗಳೂ ಗಲಾಟೆ ನಿಪ್ಪಾಚಿಡಿ". ನಂಜಪ್ಪ ಕಯ್ಯುವಚ್ಚಕ್ ಜೋರ್‌ಲ್ ತಾಂಡ ಕೋಲ್‌ನ ಓಂಗಿಯಂಡ್ ಪರಂದತ್. ಜನ ಅಂವಂಡ ತಕ್ಕಾಕ್ ಬೆಲೆ ಕೊಡ್‌ತತ್. ಮುಂಡತೆ ಕೂಡ್‌ಚಿ, ಜನಡ ಸದ್ದಿಲ್ಲತಾಪಕ ವಿಶ್ವನಾಥ್ ಮೆಲ್ಲೆ ಮೋಂವಂಡ ನಿಪ್ಪಾಕ್ ಕೈ ಬೆಚ್ಚಂಡ್ ಮೆಲ್ಲೆ ಪೊರಮೆ ಬಾತ್. ನಂಜಪ್ಪೊ ಮೆಲ್ಲೆ ಟೆರೇಸ್‌ಲಿಂಜಿ ಇಳೊಂಜಿಬಂದಂಡಿಂಜತ್.

ವಿಶ್ವನಾಥ್‌ಂಗ್ ನಂಜಪ್ಪನ ಕಂಡಿತ್ ಇಳೊಂಜಿಬಂದಂಡಿಂಜತ್. ಕೈನ ಮುರಾಕಿ ಪುಡಿಚಂಡತ್ ನಂಜು, ನೀಡ ಎದಿಕೆ ನಾನೊರ್ ಪಿಲ್ಲಾಕಳಿ" ನಂಜಪ್ಪೊ ಒಂದೂ ಎಣ್ಣಂಡಾಂದ್ ಕೈ ಓಂಗ್‌ಚಿ. "ನೀನ್ ನಾಡ ಸಿನೇತ, ಇಂದ್ ಶಾಸಕ, ನಾನೋರ್ ನಿವೃತ್ತ ಉಪಾದ್ರಿ. ಪಂಡ್ ನನ್ನ ಎನ್ನನೆ ಕಂಡ್‌ತಿಂಜಿಯಾ ಅನ್ನನೇ ಇಂದೂ ಉಳ್ಳೋ. ಆಚೇಂಗಿ ನೀನ್ ಪದವಿರ ಆಶೆ, ಪಣತ್‌ರ ಮೋಹ,

ಕುತಂತ್ರತ್ವರ ಅಧಿಕಾರ ಮದತ್ವರ ಕಷ್ಟಲ ದುಂಬಿತುಳ್ಳ ಸಮುದ್ರತ್ವ ತೇಲಾಡುವಕ್ ಪೋಯೆ. ವಾನ್, ನಾಡ ಸಂಸಾರ ಎಣ್ಣೆವ ಸ್ವಾರ್ಥತ್ ಕಣ್ಣೆಮುಚ್ಚಿತ್ ಅಳತೆಟಿಯಾ ಜನಡ ಪ್ರತಿನಿಧಿ ಎಣ್ಣೆವಾನ ಮರಂದಿಯಾ. ಅಯಿಂಗಕ್ ಬೋಂಡಿಯ ಪೊಟ್ವಾಭರವಸೆ ಅಲ್ಲ ವಿಶೂ, ಅಯಿಂಗಕ್ ಬೋಂಡಿಯ ನಾಡ್ ಅಭಿವೃದ್ಧಿ. ಅದ್ ನಿನ್ನ ಕೊಂಡ್ ಆಯಿಲೇಂದೆಣ್ಣೆವ ಚೆಡಿಲ್ ಅಯಿಂಗ ತಿರೀಬುದ್ದಾರ್ತ್. ಪೋಕಡ್, ನೀಡ ಕಾಯಿಲ ಬೆರಿಯ ವಾಸಿ ಆಕಡ್" ಎಣ್ಣೆತ್ ಮೊಟ್ವಾಳಿವಕ, ಕೂಡೆ ಇಂಜ ಆಫೀಸರ್ "ಪಪ್ಪಾ, ಎಚ್ಚರತ್ ಇಳಿ" ಎಣ್ಣೆಚಿ. ನಂಜಪ್ಪೊ ಬಯ್ಯಕ್ ತಿರುವಂಜಿ "ಇಂವೊ ನಾಡ ಮೋಂವೊ. ನೀಕ್ ಗೇನ ಇಕ್ಕುವಲ್ಲಾ, ಇಲ್ಲಿ ಡಿ.ಯಸ್.ಪಿ. ಆಯಿತುಂಡ್" ಎಣ್ಣೆಯಂಡ್ ಪ್ರವೀಣ್ ಬೆನ್ನ ತಟ್ವಚಿ. ನಾನ್ ನೀಡ ಮೀದ ಜನ ತಿರಸ್ಕಾರತ್ ತಕ್ಕ ಪರವದ್ ಕೇಟಿತ್ ಎನ್ನನಲ್ಲೊ ಕೊಡಿಕ್ ಪತ್ತಿ ಬಂದ್‌ಟ. ನಿನ್ನ ಬಜಾವು ಮಾಡುವಕ್, ಜನಡ ಹಿಂಸೆ ತಪ್ಪಿಚಿಡುವಕ್ ಇಂವೊ ನನ್ನ ಕಂಡಿತ್ ಕೂಡೇ ಬಂದ್‌ರ್ತ್. ಅವನ ಕಂಡದೂ ಜನ ಗಲಾಟೆ ನಿಪ್ಪಿಚಿಟ್ಟತ್. ಇಂಇಂಗೆ ಬುದ್ಧಿಪಡಿ, ಜನಡ ದುಡ್ಡ್ ತಿಂದಂಡ್ ಅಯಿಂಗಕ್ ಅನ್ಯಾಯ ಮಾಡತೆ" ಎಣ್ಣೆಚಿ. ವಿಶ್ವನಾಥ್ ಚತ್ತನೆಕೆ ಆಚಿ. ಅಂದ್ ಚಾಕ್ರಿಕ್ ಶಿಫಾರಸ್ ಮಾಡುಲೇಂದ್ ಬಯ್ಯಕ್ ಅಯೆಚ, ಇಂದ್ ಅಂವೊ ನಾಡ ರಕ್ಷಣೆಕ್ ಬಂದಿತ್‌ಂದ್ ಗೇನ ಮಾಡುವಕ ನಾನೆಚ್ಚಕ್ ಕಮ್ಮಿತರ? ಜನಡ ದೃಷ್ಟಿಲ್ ನಾನ್ ಎಚ್ಚಕ್ ಕೀಳೆವುಟ್ಟತುಳ್ಳೊಂದಾಚಿ. ಮುದಾಕ ಇಳಿಂಜಿತ್ ಮೆಲ್ಲೆ ಪೋಯಂಡಿಂಜದ್ ಕಂಡತ್. ಮೋಂವೊ ಅಲ್ಲಿಯೇ ನಿಂದಂಡ್ ನೋಟಂಡಿಂಜತ್. "ಪ್ರವೀಣ್" ಕಾಕೆಚಿ ವಿಶ್ವನಾಥ್ "ಐ ಯಾಮ್ ಪ್ರೌಢ್ ಆಫ್ ಯೂ ಮೈ ಬಾಯ್" ಎಣ್ಣೆತ್ ಕೈಕುಲ್‌ಕ್‌ಚಿ. "ಅಂಕಲ್, ಒಳ್ಳೆಕ್ ಪೋಯಿ ರೆಸ್ಪ್ ಎಡತೋಳಿ" ಎಣ್ಣೆತ್ ಮೆಲ್ಲೆ ಒಳ್ಳೆಕ್ ಕೂಟಿಯಂಡ್ ಪೋಯಿತ್ ಬುದ್ಧವಿಚಿಟ್ಟತ್. ಅವ "ನಾನ್ ಬಪ್ಪಿ" ಎಣ್ಣೆತ್ ಟಪ್ಪ್ ಟಪ್ಪೆಂದ್ ಬೂಟ್ ಸದ್ ಮಾಡಿಯಂಡ್ ಪೋಯಿರ್ತ್" ಚೆನ್ನಂಗೇ ದಿನತ್ ಶಾಸಕ ಪದವಿಕ್ ರಾಜೀನಾಮೆ ಕೊಡ್‌ತಿತ್ ನಾಡ್‌ಕ್ ಪೋಯಿರ್ತ್ ವಿಶ್ವನಾಥ್, ಸರೋಜಿನಿ. ಅಧಿಕಾರ, ಪದವಿ, ಎಲ್ಲಾ ಕಳಂದಂಡ್ ತ್ರಿಶಂಕುರ ಮಾದರಿ ಬದ್‌ಕುವಕಾಚಿ.

\*\*\*



# ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ

ಮಡಿಕೇರಿ

ಮೇಕೇರಿರ ಕೆ. ಕಾರ್ಯಪ್ಪ

ಕೊರವಂಡ ಡಿ. ಗಣಪತಿ

ಮಾತಂಡ ಸಿ. ಮೊಣ್ಣಪ್ಪ

ಅಜ್ಜಿನಿಕಂಡ ಸಿ. ಮಹೇಶ್ ನಾಚಯ್ಯ

ದೇಯಂಡ ರುಕ್ಮಿಣಿ ಕುಶಾಲಪ್ಪ

ಬಿದ್ದಂಡ ಸರೋಜಿನಿ ಅಚ್ಚಪ್ಪ

ಕಾಮೆಯಂಡ ಎ. ಮುತ್ತಣ್ಣ

ಕಾಕೇರ ಕೆ. ಸುಬ್ರಾಯ

ಅಚ್ಚಿಯಂಡ ಎಂ. ಅಯ್ಯಪ್ಪಮ್ಮಯ್ಯ

ಪಾಲಂದಿರ ಅಯ್ಯಪ್ಪ

ಚಿರಿಯಪಂಡ ಕೆ. ಕಾಶಿಯಪ್ಪ

ನರವಂಡ ಎಂ. ಉಮೇಶ್

ಐಮುಡಿಚಂಡ ರಾಣಿ ಮಾಚಯ್ಯ

ಅಧ್ಯಕ್ಷ

ರಿಜಿಸ್ಟ್ರಾರ್

ಸದಸ್ಯ

ಸದಸ್ಯ

ಸದಸ್ಯ

ಸದಸ್ಯ

ಸದಸ್ಯ

ಸದಸ್ಯ

ಸದಸ್ಯ

ಸದಸ್ಯ

ಸದಸ್ಯ

ಸದಸ್ಯ

ಸದಸ್ಯ